

Дундағ Алп

ШАРҚНИҢ ЭҢГ БҮЮК ҲУҚМДОРИ



ТЕМУР

84 57414к

A-54

50/6

Шаржиннэ 242
Оғзок хуаифор

2018 6 29,000

Kitob shu erda ko'rsatilgan muddatdan
kechiktirilmagan holda topshirilishi shart

ilgari berilmalar miqdori _____

7/II-894.10к


26/II-220.20к

12/II-1150.21к


154 (58 УРК
454

Дундар Ат

ШАРҚНИНГ ЭНГ БҮЮК ҲУҚМДОРИ



ТЕМУР



ТОШКЕНТ — «O'ZBEKISTON» — 2018

УЎК 821.512.161.-31

КБК 84(5Турк)

А 54

**Усмонли туркчадан Тоҳир ҚАҲХОР
ва Собир САЙХОН таржимаси**

Инсоният тарихида буюк саркарда ва жаҳонгир сифатида из қолдирган аждодимиз Амир Темур ҳақида ёзилган ҳар бир илмий ёки бадиий асар бугунги кишилар учун ибратлидир. 1912 йилда Истанбулда нашр этилган бу роман Темур мавзусида туркчада ва умуман туркий тилларда яратилган ilk романdir. Унда ёш Темурнинг жўшқинлиги, инсонпарварлиги ва бағрикенглиги, ҳар бир ишни акл тарозисида ўлчаб иш юритгани боис ўша даврнинг энг суюкли ва буюк хоқонига айлангани содда ва равон усуулда кўрсатиб берилган.

Амир Темурнинг шахсий жасурлари, у ҳукмронлик қилган даврдаги ҳалқ жасорати, меҳр-оқиёти, садоқат каби умрбоқий туйгулар ёрқин бўёқларда акс эттирилган.

Ўйлаймизки, буюк бобокалонимиз Амир Темур ҳақидаги бу асар ўзбек китобхонларини ҳам бефарқ қолдирмайди.

ISBN 978-9943-25-427-5

© Тоҳир Қаҳхор ва бошк. (тарж.), 2018
© «O‘zbekiston» НМИУ, 2018



МУҲТАРАМ ТУРКЛИККА

(С ўзбоси)

Бир неча кун муқаддам «Шарқ» театрусинда «Темурланг»¹ номли бир пийесанинг томошага қўйилшини эшишим биланоқ мен ҳам тарихини, ўтмишини бу саҳналардан ахтарган ватандошларим каби ўша ёқса ошиқдим.

Буюк хоқон Темур билан ҳашаматли султон Йилдирим Боязид орасидаги арзимас келишмовчилик боис чиққан уруш ва унинг оқибатларини бетарафона мұхокама этадирган бир саҳна ўйинини кутардим. Бироқ янглиш ёзилган тарихий воқеаларнинг хатоли талқинлари күрсатилди.

Менимча, муаллиф нотўёри, бирёқлама битилган тарихни қабул қилган ва уни кенгайтириб күрсатишни истаган бир шахсадир.

Бу икки даҳо орасидаги мағлубият тарихларидан, яъни вужудини қорасон қоплаган муаззам Усмонилар императўрлигини қутқармоқ учун тақдирнинг санчиган ништари аччиши билан ёзилган тарихларимиздан бетарафликни кутмоқ ўринсиздир, зотан улар мұқояса этилмасдан битилгандир. Аммо мен йигирманчи асрда яшаб туриб бундайин мұхокамасиз, бўхтонли тарихларни, талқинларни қабул қилолмайман, албатта.

Темурнинг Йилдирим Боязидга ёзган хатида турклар бирлиги борасидаги шоҳона таклиф бўлганилигини ва султон Йилдиримнинг, айтиб ўтганимиздек, кичик бир англашилмовчилик юзасидан унга юборган мактубидаги хитобида «дайди им» деган баландпарвозона ибора қўллагани орага нифоқ солганини назарга олсан, бор ҳақиқат ўртага чиқади. Шунча ийллардир икки турк сулоласининг чиқишолмаслигига, қар-

¹ Роман матнида ҳам жаҳонгир исми шундай ёзилган, таржимада Темур деб олинди (тарж.).

дошларнинг келишолмаслигига ягона сабаб – ана шу кичик ҳақиқатнинг катта-катта бўйхонларга, мағлубият алами билан сўйланган аччиқ-аччиқ ҳақоратларга йўл очгани эмас-микин?

Темур ва Йилдиримнинг бирни ғолиб, бирни мағлуб бўлса ҳам, Усмонлилар салтанатига кўрсатган хизматлари сиёсатчилар наздида инкорсиз бир ҳақиқатdir.

Темур Усмонлилар баданидан анчагина қонлар оқитти, бироқ бу қорасонга йўлиққан вужуддан жарроҳлик жараёнида тўкилган қон ва йирингдан бошқа нарса эмасди.

Темур Усмонлилар кўксидан бир неча яра очди, фақат бу ишини Усмонлилар жаллоди бўлмоқ учун эмас, балки унинг муҳташам ҳаётини, муқаддас мавжудиятини қўтқармоқ учун бажарди. Вазифаси-да бир жарроҳлик эди.

Бутун тарихларда истаксли ё истаксиз ўлароқ ёзилганидек, Темурнинг мақсади, фикри-зикри турклар бирлигига хизматдан иборат эди. Ана шунинг учун у бунчалар қонлар тўктириди, ана шунинг учун у буюк ва қутлув бир қардоши Йилдирим Боязид билан урушга киришиди, ана шунинг учун у Осиёни бошдан-оёқ отда босиб ўтди ва шу йўлда унинг номи қонхўрга чиқди, жуда кўп қийинчиликларга, йўқотишларга чидади.

Буларнинг барчасини турклик учун, туркларни бирлаштиromoқ учун қилди.

Бу йўлда ҳеч бир монелик, ҳеч бир қудрат уни бу муқаддас азмидан қайтаролмади, қайташиб мувваффақ бўлолмади...

Воажаб! На буюк зот эмиш бу Темур! Ватани учун, миллати учун чида бўлмас қийинчиликларга чидаған, фидокорликлар кўрсатган улув инсон! Фақат миллатини юксалтмоқ учун қардошларини, қардоши Йилдиримни ҳам аямаган қўймондон!

Бу, онаси учун – ватани учун шунчалар фидокорликлар қилган буюк Темурга шу муҳтарам онанинг авлодлари кўрсатган эҳтиром шуми? Унинг хизматларига муносабат, шукронга ҳадияси буми?

Бу қандай қадршуносликки, онасини қўтқармоққа ўзини бавшилаган бир халоскорни тухматларга, ҳақоратларга

кўёмиб ташласалар... Бу қандай кўр эҳтиросу интилишики, икки турк хонадони орасида кичик бир тушунмовчилик натижасида вужудга келган келишмовчиликни мангу давом эттирмоқ истарлар...

Бу қандай жаҳолатки, миллатнинг кўзини парда билан тўсмоқчилар, бир-бирлари ўртасига нифоқ солмоқчилар, уларни ёвлаштирмоқчилар...

* * *

Рўймонимизнинг вояси Темурнинг ҳаёти ва тутган сиёсатини кўрсатмоқдир. Ана шу мақсадда қўлга қалам оларканмиз, билдирилажак эътиrozлар хаёлга толдирди ва иккилантirdi, бироқ асардаги воқеалар ҳақиқий тарихий ҳодисаларга мос эканлигини ўйларканмиз, китобхондаги шубҳалар ҳам қуёш тафтидан эриб битган муз парчаларидаи йўқолишига қаноат ҳосил қилдик-да, ишга киришдик.

Темур ҳақидаги эътиrozларнинг энг каттаси унинг «қонхўр», «золим» бўлганлигиdir. Аммо бу ўша замонда, у яшаган ўрта асрларда табиий ҳол эканлигини эсдан чиқармаслик керак. Аслида, айрим ғаразкор тарихларда ёзилгани каби бемаъни, сабабсиз золимликни Темурда топа олмаслигинизга имонимиз комилдир.

Энди айтинг-чи, қайси жаҳонгир қонлар тўкмаган?

Қайси жанговар жонларни ўтда ёқмаган?

Бугун энг маданиятли деб танилган мамлакатларда барча замонларда ҳам кўкка кўтарилган Наполеонларга, иккичи Фредерикларга, дали Пётрлару Ҳанибалларга тўйкан қонлари учун қандайин маъзурият кўрсата олурлар? Султон Ёвузнинг Эронга юришини муҳаққақ ва сиёсат тақозоси дея эътироф этган тарихчилар, ажабо, не учун Темурга эътиroz этаверадилар?

Дейшишингиз мумкинки, Султон Ёвуз Эронга сафари билан Усмонлининг манфаатларини қўриқлади, фақат Темур... Гояи аъмоли туркларнинг бирлиги экан, нечун бунга эришолмаган ва нечун сиёсати натижаларини камоли муваффақият-ла тарихга биттира олмаган?..

Маълумдирки, воя ва муваффақият бошқа-бошқа нарсалардир.

Султон Ёвузнинг ислом бирлиги вояси байроти остида Мисрга юриш қилганини, қайси йўллар билан қандай сиёсий натижаларга эришганини тарихдан биламиз. Ёвузни, тутган сиёсатини янада шухратли қилган унинг Шаҳболодаги муваффақиятидир. Шунинг учун Ёвузни дунёning энг буюк подшоҳи дейишади.

Энди бир ўйлаб кўрайлик: Наполеон Мўскўвни олди, Пруссия қиролливини маҳв этди, Италига қўшин тортди – вояси, мақсади бир лотин бирлигини вужудга келтириш эмиш.

Буни бажара олмагани ҳолда қанча-қанча қон тўйкканини, Мўскўвга енгилганини, қанча-қанча инсонни қурбон берганини рўкач қилиб нечун Наполеонни қонхўр дейишмайди, таҳқирлашмайди – буни ҳам ўйлаб кўрайлик.

Франсузлар ҳам ва ёхуд Наполеондан ёмонлик кўрган бошқа жабрдийда қавмлар ҳам нега тарихларда уни лаънатламайди-да, Усмонлилар ўз тарихларида Темурни нечун бунчалар куткулашади? Бу ҳам етмаганидек, нечун театру саҳналарида Темур қилмаган шиларни қилди дерлар, нечун Темур умрининг ҳеч бир даврида бошидан кечирмаган, кўрмаган хаёлий воқеаларни ҳаётий дея **ваддорлик** этурлар?..

Йўқ! Мухтарам ўқувчиларим, Осиёда яшаб ўтган, сиёсат майдонида жавлон урган ҳукмдорларни кўз ўнгимиздан ўтказганимизда, Темур ҳам Султон Ёвуз каби обидаи ҳарбиядир – қаҳрамонлик ҳайкалидир!

Йилдирим Боязид билан курашга киришига сабаб Темурнинг ўзи эмас, қисматдир; бу уруш қазои қадарнинг бир ҳукмидир. Бу ҳукмга Йилдириму Темур, татару турк биргаликда баш эшишга мажбур бўлдилар.

Бунинг учун ўтмишда кечган икки қардош гавғосини деб уларнинг авлодлари ўртасига нифоқ уруғини экмакнинг ҳеч кераги йўқ.

Фалак қаҳрига учраган ва тарихда қолган қаҳрамонлар орасида ўз қозонган мавқейини танитолмаган бир хоқон бўлса, у фақат Темурдир. Даҳоси ва сиёсатининг акси зарбасига йўлиққан бир қўймондон бўлса, у ҳам Темурдир.

Темур ҳукумат ҳаётини мухофаза этмак учун шундайин асослар яратган ва шундайин мустаҳкам бир давлат биносини вужудга келтирган эдиким, агар ундан кейин келганлар

ўша йўлда хизмат этсаларди, у доҳийнинг тамалини қўймииш ўша сиёсат, ўша салтанат абадиян яшарди.

Давлатни бошқариш нуқтаи назаридан Темур буюк бир бошлангичдир, ҳикмати ҳукумат булогидир. Жаҳон халқлари ўз қиролларини, хонлари ва подшоҳларини Тангри йўлидаги бир манзил ёки Аллоҳнинг ердаги сояси деб билган бир замонларда Темур ўзини бошқача тутган, инсонларни ўзига сажда эттиришига қодир бўла туриб бу ишни қилмаган, фақат давлатни ўйлаган. Кейинги даврларда дунёда шакланаётган миллий ҳокимиятни ўз даврида у кашф этган; тузуклари, сиёсий тутумлари билан улусига қонун ҳукмронлигини кўрсатмоққа интилган, фақат бунга эришолмаган. Темур даҳосининг ёдгори бўлмиш қурултой (мажлиси маъбусон – депутатлар кенгаси) унинг қийматини, буюклигини кўрсатувчи бир тарихий ҳақиқатдир. Темурнинг кимлигини англамак учун биргина ўша шоҳ асарни – қурултойни билмак ҳам етарлидир.

* * *

Рўмонимизни ўқишига киришган мухлислар кўз олдида Темур ҳаёти акс этган воқеалар жонланаркан, бундан руҳий лаззат туюшлари шубҳасиздир. Қўлимиздан келганича тарихий ҳақиқатларни ёритшига ва китобхонни мамнун этишига интилдик.

Дундар АЛП
18 август 328¹, Қизтоши

¹ Хижрий 1328, милодий 1910 йил (тарж.).

I. НОМАЪЛУМ ОТЛИҚ

1350 милодий йили. Туркларнинг асл ватани Мовароунахрда ва унинг теграсида аҳолига таскин берувчи, тинчликка чорловчи бир руҳ ҳукмрон. Қуёш Туркистон саҳроларини қиздириб-қовуаркан, ёруғ кенгликларда юрган арслон юракли турк жангварларининг найзалари учидаги жилваланган нурлар улар манглайдаги шараф нишони каби ярқирайди.

Ҳусайн Куртнинг бош кўтаришидан фазабланган, томирларида турклик қони қайнаган барча қаҳрамонлар оёқقا қалқишиди, урушқоқлик ҳислари жўш уриб, майдонга тўпланишиди. Улар жалойир хонадони донгини юксалтирган, улуғ вазир Қазаганинг чопарини кутишмоқда.

Ниҳоят, куёшнинг ёкувчи ёғдулари остида кумуш туғини ялтиллатиб келаётган отлик – хабарини қичқириб билдираётган чопар ҳам кўринди. Унинг ҳайқириғи вазиятнинг нозиклигини тасдиқларди:

– Ҳусайн Курт юртимизга бостириб кирди! Онасини сўйган қаҳрамонлар, Тангрисини таниган жангварлар, миллатини кутқармоқ истаган арслонлар, қуролланинг! Улугимиз Қазағаң барча турк хонларини ўз жангчиларини тўплаб, ватанини кутқармоқ учун сўғишига киришини буюрадир!.. Қани, барча қўлига қурол олсин!

Халқ орасида алғов-далғов юз берди. Чопарнинг товушини эшитган ҳар ким ўз уйига, қуролланмоққа ошиқди. Жарчи илгарилаб бораркан, ҳар ўн одимда хабарини такрорларди. Уни эшитган ботирлар ўз маконларига қараб югуришар, чодирлари тирагига осиғлиқ ўқ-ёйларини, найзаларини олиб, уруш кийимларини кийишиб, отларига сакраб минганча йифноқ майдонига чопишарди.

Улус тўпланди. Эл ва беклар кенгашдилар, вазиятни муҳокама қилдилар. Юртга бостириб кирган Ҳусайн Куртга қарши урушмоққа қарор берилди.

Аслида-ку уруш бошланганди.

Давлатининг ички тизимида ўзгариш, ислоҳот ўтказишга киришган Қазаған ўз бошлаган иши билан машғул экан, ўлқадаги бошқарувнинг кучсизланганини гумон этган Ҳусайн Курт фурсатни қўлдан чиқармасликка тиришди.

Турклар юртига тўсаттан бостириб кирган Ҳусайн Курт зафар қозонишга қаттиқ умид боғлаганди. Зотан, Қазағанинг ўз идорий ишлари билан овора эканига, шу учун унчалик қаршилик кўрсата олмаслигига ҳам инонарди. Шу боис пайтдан фойдаланиб, кучига-куч қўшиб, бирданига зарба бера туриб, турклар ўлкасини тамомила эгаллаб олишга қарор қилганди.

Унинг бу ҳаракати турклар мамлакатида муҳим бир акс садо берди: халқ барча ишини ташлади, қўлига қурол олди ва ватан мудофаасига отланди. Жанговар туркларнинг босқинчи Ҳусайн Куртга нафрати кучли эди, шунинг учун қарши ҳужумлари ҳам даҳшатли бўлди. Шақаллар инига суқилиб кирганида қаҳрланган арслонлар каби туркларнинг ҳам газаби қайнаганди. Улар бирлашиб шундай уруш қилишдики, ёв бунига чидай олмасдан чекинди ва тирқираб қочиб қолди. Турклар уларни Хурросонгача қувлаб келишди. Мовароуннахр аскари Хурсон кўксига ўтқай ўқдай санчилди. Турк ўрдуси Ҳусайн Курт қўшинини янчидан ташлади, зафар қозонди.

Бироқ бу голиблик осонгина қўлга кирмади. Ўрдудаги ҳар бир ботир жонини тикиб уришди, бир кўпи сўғишиларда шаҳид тушди. Қазағанинг қўшини Туркистондаги турли турк уруғларидан тузилганди. Улар орасида барлослардан чикқан ёш, жасур бир жангчи ҳам бор, у Абу Тарагайнинг ўғли Темур эди.

* * *

Туркларнинг Хурсонга кириб боришидан уч кун олдин, эрта тонгда, катта Хурсон йўлида бир отлиқ кўринди. Суворий қушдай учиб келарди. Бомдод вақтида ҳам у отдан тушишни, бироз тин олишни ўйламасдан, ҳамон аргумоини елдириб борарди... У ўт-оловдай йўл босиб ўтаркан, воҳаларни, ҷўлларни, қирлиғу тепаларни, тоғларни отининг туёғи остига тўплагандай ўзини қудратли сезарди.

Кенг дунё унинг тўриқ оти оёқлари тагида кичкина бир майдонга айланганди гўё. У қанотланган саҳобадай учарди, учарди, учарди...

От чиқарган чанг-тўзон ўтмишларни пардалаб, келажак-нинг порлоқ саҳифаларини кўрсатмоқчи бўлгандай мовий кенгликларга юксалар, отлиқ эса олға интилар эди.

Кун ёришаркан, кимлиги номаълум бу отлиқ Хуросонга етиб борди. Шаҳар чанг ва тутун билан қопланган, атроф яхши кўринмас, уфқни қора булутлар эгаллаган эди. Ҳусайн Куртнинг одамлари келган отлиқни пайқашмади, барча ўз иши билан машгул эди. Бундан фойдаланган номаълум киши бир уйга кириб ўрнашди. Сўнгра бозорга чиқиб, хуросон-ликлар киядиган кийим-кечаклардан сотиб олди. Уларни кийиб, посбонга учрашди. Посбоннинг қашшоқ бир оиласдан эканлигини у олдиндан сўраб-сuriштириб, билиб олганди.

Қоровуллар тўпланадиган чойхонага киргач, у ўзини танимояқ учун атайлаб ҳалиги посбоннинг қаршисига бориб ўтириди. Унга синчилаб боқаркан, самимий суҳбатлашди ва орада уни синааб кўрди. Охирида унинг кўзларидан, сўзларидан очкўз киши эканлигини, озгина бир нарса, совфа бериб, бир қанча ишлар қилдириш мумкинлигини англади. Ўзини танитмасдан, яна ўтирган ерида сўраб-сuriштиришни давом эттириди.

Номаълум йигит кулумсираганича суҳбатлашиб ўтирап-кан, теваракдагиларни кузатар, вазият ҳақидаги тасаввурни янада тўлдиришга тиришар эди. Бир пайт посбон баланд овозда аллакимни ёмонлаб, ёқасини олифталарча силкаб, ифво қозонини қиздириб, ўша куни юз берган бир воқеани сўйлай бошлади. Теградагилар унга шундайми деган маъниода қизиқсиниб қараб, тинглашар эди. Номаълум йигит ҳам унинг сўзларига жон қулоғини тутаётганини билдираётгандай янада яқинроқ сурилди. Қоровул эски суҳбатдошини топиб олгандай севиниб, завқ билан гапни кўпиртирас, унга қараб хитоб қилас.

Номаълум киши суҳбат асносида қоровулни чой ва қаҳва билан сийлади. Бу унга майдай ёқди. Охири посбон номаълум йигитнинг қўлини қўлига олиб, эски дўстдай дардлаша бошлади, унга бутун ҳаёт ҳикоясини айтиб берди. Қоровул унинг эътиборини тортиш учун бор хунарини кўрсатмоқда

эди. Кўп сўзлаган кўп чалгийди деган оталар сўзи бор. Бу одам, лақмалиги етмагандай, бироз аҳмоқроқ ҳам эди. Суҳбат сўнгидаги қоровул тамоман юмшади, йўлга юрадиган ҳолга келди. Шунда номаълум киши:

– Модомики, лутф этиб, менга шунчалар қиймат бериб... – дея кулумсираб, синчковлик билан унинг юзига бокди. Кўз-кўзга тушган аснода, «фақат...», дея тараддудланди. Олдиндан тайёрлаб қўйилган бир халта ақчани унга беркитиқча тутқазди. Қоровул енг ичида узатилган қизил халтacha иссиқлигини туяркан, ақча исидан маст бўлиб, сўзини йўқотиб қўйди. Бироздан кейин ўзига келди.

– Шу, мен сал наридаги даламда кечгача ишлаб, чарчаб қоламан, денг. Йўқчилик, етишмовчилик ёмон. Шунаقا пайтлар бўладики, ишдан кеч қолмаслик учун умримнинг энг қимматли дамларидан ҳам воз кечишига тўғри келади... – дея чайналди.

– Э, яшанг! – деди кулумсираганича номаълум йигит. – Модомики, сиз умрингизнинг энг азиз онларини шунаقا ишларга бағишларкансиз, энг муҳими, шундайин бир саховатли инсон бўла туриб, нечун мендан яхшилигингизни аяйсиз?

– Астағифурulloх, тақсир, унчалик эмас-ов! Фақат бошимдан... – дея гудранди, «бошимдан ажралиб қолишдан кўрқаман» дея олмади.

– Э, Худойим-эй, қизиқ одам экансиз-ку, нима, менга ишонмайсизми? – деди номаълум киши, орада яширинча яна нимадир узатди.

– Кечирасиз, тақсирим... – дея тараддудланди қоровул ва сўзи кесилди. Чунки унинг кўзи номаълум йигит қўлидаги қизил халтачага тушиб қолганди. Севинчдан қоровулнинг юраги ўйнаб кетди. Шошилиб: – Сиздайин сахий ва олийхиммат зотнинг сўзини икки қилиб бўларканми, бу инсофдан эмас! – дея хитоб этди. – Нени истасангиз, барчаси бош устига! Қачонки қалъя девори ёнига келиб, пастдан туриб мен гариб-фақирни чақирсангиз, кифоя, дарвоза калитини бурждан ташлаб юбораман. Ичкарига кириб олгач, калитни менга қайтариб берасиз, – деди сирли қилиб.

– Кўп яхши! – деди номаълум йигит.

Шу билан суҳбат тугагандай бўлди. Иковлон кечки пайтда кўришмокқа келишиб, ўринларидан туришида ва айрилишиди.

Номаълум йигит кирага турган уйига қайтгач, ўз юртини, севгилисими ўйлаб, юраги сиқилди. Ҳаяжонини, оғир хаёллар тўлқинини босиш учун ёлғизликни ихтиёр этиб, анчагача ўйланиб ўтирди. Бутун руҳини ишқ ўти қоплаб олган, бу ўтда йигитнинг борлиғи ёнар, унинг бу қайгули ҳолати ғамга берилиб, ерда чўзилиб қолган арслонни эслатар эди.

Унинг кенг ва ҳайбатли кўкси нафас олишига мос тарзда кўтарилиб-тушар, маъюс юзида жасур қалбининг шиддатли туйгулари акс этар, бу кўриниши билан у эртаклардаги ошиқ қаҳрамонларга ўхшаб кетар эди. Йигит чиндан ҳам ошиқ эди. Руҳидаги ишқ изтироби шунчалик тўлқинланган эдики, инграётганини ўзи ҳам сезмасди. Бу аччиқ ва тотли ишқ ингроқлари нарироқда ухлаб ётган мусофиirlарни уйготиб юбориши мумкинлиги эса йигитнинг хаёлига ҳам келмасди.

У анча пайтгача ўйланиб, уф тортиб, ихтиёrsиз инграпиб ётди ва ниҳоят, ярим кечаси ухлаб қолди.



II. ТУТҚУНЛИК

Эртаси кун эрта тонгда Хурсон қалъасидан бир түп киши ташқарига чиқишиди. Улар орасида ҳалиги номаълум йигит ҳам бор эди. У от устида савлат тўкиб ўтирас, жасур бир кўрки билан барчадан ажралиб турарди.

Йигит қалъа дарвозаси қоровуллари ёнига, бурчакка яқинлашаркан, ўзини кутаётган посбонга дуч келди. Саломлашиб ўтиб кетмоқчийди, кечча олган сариқ олтинлари тотини унупотмай, ҳалигача яйраётган қоровул унга елимдай ёпишиб олди.

— Тақсир, кечқурун қайси соатларда қайтасиз? — деди у ялтоқланиб.

— Кўрамиз. Ҳозирча аниқ эмас, бироз кеч қолсам керак, — деди йигит.

— Шу яқинда, хув анави ерда даласи, боғи бор муҳтарам Саидали оқшом тўртларда ташриф буюрмоқчи эдилар-да... — дея чайналди қоровул сирли қилиб.

— У зот ким ўзи? — дея сўради йигит.

— Кечқурун унга сиздан гап очган эдим, қалъага киришлирига фақатгина мен йўл очиб бероламан, деди... — қоровул фикрини тўла айтольмай қолди, чунки йигит унинг сўзини бўлди.

— Мен бироз кеч қайтаман, — деди-да, бу ерда кўп туриб қолиш хавфли эканини туюб, қоровул олдидан тезроқ ўтиб кетиш учун отини ниқтади.

Шу куни оқшомгача атрофга тарқалган қўшинини қидирди, аммо аскарлар изини тополмади. У қаттиқ ўйланарди, фикру хаёлини бир чигал ўраб олганди. Бу чигал кечқурун соат тўртда келиб, калитни унга берадиган Саидали билан боғлиқ эди. У Саидалининг қўлидан калитни олмоқчи; бироқ ўзини унга ҳам, қоровулга ҳам таниммоқчи эмас. Ҳамма гап шунда. Агарда Саидали калитни бермаса, у билан талаши-

ши керак... Иш жанжалга бориб етса, сир очилиб қолмаслиги учун уни, албатта, ўлдириши лозим... Йигит шу қарорда түхтаб, қалъанинг пана бир ерига келиб беркинди.

Бир пайт қаршидан яхшигина кийинган киши кўринди. Ҳар ҳолда бу ўша бўлиши керак, дея кўнглидан кечирди йигит. У ўз отини панада қолдириб, олдиндаги отлик ортидан юрди.

Осмон булутли, атроф қоронги, қўрқинчли эди. Хурсон-ликлар устига бир бало ёғилаётгандай, теварак ваҳимали ту-манга бурканган, ғамгин кўринишда эди. Қоронғида бораётган-бу икки қўрқинчли кишининг орқадагиси ўлжасининг изига тушган уста овчига ўхшарди. У отликни кузатиб илгарилар-кан, кўзлари порлар, бу ўлжа қўлидан қочиб қутуолмасли-гини ўйлаб, ичидা севиниб қўярди.

Отлик бурчакда түхтаб, пастдан юқорига – қоровулга қарата овоз берди.

Бу орада номаълум йигит ўзини уларга танитмаслик учун уст-бошини ечиб, тескари кийиб олди. Сўнгра бурчакка яқинлашди.

Тепадаги қоровул қалитни ҳалиги одамга отди. Буни кўрибоқ йигит унга яқинлашди ва:

– Кечирасиз... – деди. – Рухсат берсангиз, мен ҳам ич-карига кирайин...

– Йў-ўк! – деди ҳалиги одам. – Бу соатдан кейин қалъа-га ҳеч ким киролмайди! Кириш ҳаққи ёлғиз менга берилган.

– Кириш ҳаққидан мен ҳам фойдаланмоқчиман, – деди йигит пинагини бузмасдан.

– Қандай фойдаланарканси?! – деди отлик аччиғи чиқиб.

Йигит унга талпинди ва қалитни олмоққа иштилиб:

– Очқични сиздан тортиб олиш йўли билан! – деди.

Бироқ қаршидаги киши йигитдан ҳам эпчилроқ экан шекилли, қалитни авайлаб чўнтағига солди-да, чаққонлик билан қиличини қинидан суғурди. Йигит ҳам ўқ тезлигига ҳаракат қилиб, арслондай кўксини кериб, қиличини яланғочлади. Уники қилич эмас, худди чақмоқдай, момақалдироқдай гуриллаб товуш чиқарди. Иккиси ўртасида олишув бошланиб кетди. Йигит душманини яраламоққа, қаршидаги киши эса уни ўлдирмоққа талпинарди. У ҳужумни тобора кучай-

тиаркан, йигит ўзини ҳимоялашга интилар, ҳужумга унча эътибор бермаётган эди. Кураш шунчалар қизищдик, чидаш қийинлашди. Калитли киши яраланди, яра алами ва жон қўрқувсида йигитга ташланди. Бироқ у биринчи ҳужумида тирсагидан, иккинчи зарбасида оёғидан ва учинчисида бошидан яраланди. Йигит рақибини ерга ағдарди, калитни қўлга киритиб, бир зумда кўздан фойиб бўлди.

Йигит панада қолдирган отига сакраб минди-да, шамолдай учира кетди. Бир муддат йўл юргач, тепасига боқди, кўқда бир қора булат кўзга чалинди. Тонг ёриша бошлаганди. Уфқ оқарапкан, еру кўқдаги ҳар нарса аниқ-тиниқ кўриниб қолди.

Кутилмаганда бир тўп отлиқ қий-чув солиб ўтди. Улар вазир Қазаганинг айғоқчилари эди. Отлиқлар йигитни кўришлари биланоқ ортидан қувлашди. Йигитга яқинлашишаркан, бириси каманд отди. Жасур отлиқ қўлга олинди. Боши тузоққа тушганини англаган йигит ўзини мудофаа қилишни тўхтатди.

Отлиқлар орасида шундайин тортишув бўлиб ўтди:

– Шубҳасизки, бу – урушқоқ, мард киши! Мен ўзимни шунча жангчидан бунингчалик ҳимоя қилолмасдим, – деди бири.

– Кўйсанг-чи, – деди бошқаси. – Бунақаларни кўп кўрдик. Бу бирорта жангчи бўлса керак. Ё туркмикан?

– Турк бўлмаса керак, – деди бошқа бири. – Турк бўлса, жудаям жанговарлик, жангарилик кўрсатарди. Ким экан-а?

– Ким дейди-я! Э, ана, кўзингни катта очиб қара, кийимидан кўриниб турибди-ку, бу бир хуросонлик!..

Улар мана шундай тортиша туриб асирни боғлашди. Сўнгра хон ҳузурига олиб бориши.

Ичкарига кирав-кирмас, йигит бўш қолган қўли билан чўнтагини кавлаб, Хуросон дарвозаси калитини чиқариб, Қазаганга топширмоқчи бўлди. Жангчилар эса, йигит ёнидан ханжарини сугурмокчи деган қўрқув билан тутқуннинг устига ёпирилишди, қўлидагини олмоққа интилишди. Йигит тўсатдан:

– Қазаган жаноблари! Етар энди!.. – дея бақирди.

Вазир Қазаганинг товушини эшитиши биланоқ ўрнидан сапчиб турди. Аскарларга:

– Тегма! – дея буюрди.

Сўнгра калитни кўрсата туриб:

- Бу нима? – дея сўради.
- Хуросоннинг калити, – деди йигит.
- Сен кимсан? – дея сўроқни давом эттириди Қазаган.
- Олдин мени каманддан бўшатишсин, – деди йигит. –

Кейин кимлигимни билиб олаверасизлар.

Уни боғлоқдан бўшатиши. Сўнгра у қараб турганларни ҳайратта солиб устидаги хуросонликлар кийимини ечди. Ўз уруғига-барлосларга хос белгини кўрсатди. Шунда барча ҳайратдан бақириб юборди:

- Амир Тарагайнинг ўғли Темур!..

* * *

Темурнинг қўшин аскарлари жойлашган ердан чиқиб кетиши ҳам бошқача бўлганди. Вазир Қазаганинг қизи Тоштуғой Турканни олишга интилган кишилар ўзаро курашиб, бир-бировларидан қизни қизғанишиб, ўчакишиб, бъзизда жанжал ҳам чиқаришар эди. Бир куни, ўрду аскарлари Хуросон юришига тайёргарлик кўраётган пайтда, хушторлар ўртасида яна тўқнашув юз берди. Иш шунгача бориб етдики, бир йигит ўлдирилди. Шунда аччиқланган вазир Қазаган ваҳший ошиқлар ўртасига тушиб:

– Нима бўляпти ўзи? – дея бақириб берди. Сўнгра: – Бир шартим бор, – деди. – Ҳозир Хуросон сафарига йўналмоқдамиз. У ерга борганимизда, кимки Хуросон калитини олиб келса, қизим ўшаники...

Бу шарт Тоштуғойнинг барча шайдоларига ёқиб тушди. Барি Хуросон сафарини кўзи тўрт бўлиб кута бошлади.

Тоштуғой Турканни анчадан бери севиб юрган Темур унинг кимгадир тегишини ақлига сифдиролмасди, албатта, у бирор чора истар, ўйлаб, ўйига етолмасди. Ишқ фарёди намлатган порлоқ кўзлари толиб, хаёлга ботар, бироқ дардига даво тополмасди. Зотан, у ҳали ёш эди. Йигирма ёшлардаги бу қаҳрамон қанчалар арслон юракли бўлмасин, тажрибасизлик унинг энг катта камчилиги, тадбирсизлик эса афв этилмас заифлиги ҳисобланарди.

Тўғри, Темур ҳали тажрибасиз, иссиқ-совуқни кўп кўрмаган йигит, аммо унинг бир ютуғи шуки, у кексалар сўзини икки қилмас, уларнинг ўгитига қулоқ тутарди...

Барлослар ичида танилган, Ўғуз Арслон деган бир хизматчи бор эди. Темур доимо у билан маслаҳатлашарди, тажрибасидан фойдаланаарди. Унинг тавсияларига кўра иш тутганида, мудом муваффақиятга эришган.

Бироқ бошига ишқ савдоси тушаркан, доно чол билан қанчалар маслаҳатлашишни истаса ҳам, унинг ёнига бормади. Ахир йигирма ёшли йигит ишқий ўй-у туйғуларини кекса одамга қандай ҳам тушунтиради...

Урушларда арслон бўлиб танилган ёш қаҳрамоннинг ошиқлик кўчасига кириб, бундайин чорасиз қийналишлари ҳам Яратганинг бир мўъжизасидир балки.

Ишқ, ишқ! У қандайин қувватки, энг метин руҳларни ҳам саросимага солар, энг кучли вужудларни ҳам забуну хор эта олар.

Энг улуф лоқайдларга қараб табассум этган, энг кичик савдойиларнинг оташин бўзлашларига парво ҳам қилмасдан доимо, доимо қўрқинчли ва совуқ юз билан боқсан бу ишқ, бирорта ҳам кишанланган осий қутулолмайдиган бу силсилай самовий на буюқdir, ё Раббим!..

Масту мустағриқ зарбалари билан руҳнинг энг теран нуқталарини-да эзиб-эзиб задалаган, қалбнинг энг ҳассос торларини нозик черткиси билан черта-черта узиб парчалаган бир ишққа бўйинсунмаслик... Оҳ, бу осонми? Хусусан, ёш бир йигит учун-а... Йўқ. Ана, Темур ҳам бу беомон гурзининг зарбалари остида эзилиб, бўйни букилиб, дунё қўрган, тажрибали Ўғуз Арслон қархисида зир-зир титраб турибди...

Руҳининг энг ярали нуқтасини очиши керак...

Бу ярани тешмоқ эса ишқ изтиробларининг агадийлашиб қолиши хавфи ва қўрқувсини түғдирмоқдаки, бу Темурга маъқул эмас. Шу боис у не дейишини билмас, унсиз туарди...

– Нима бўлди ўзи, болам? – дея чол ундан сўради.

– Э, ҳеч...

– Тузукмисан ўзи? Жуда ташвишли, қийналган кўринасан? Бошингта бир иш тушган шекилли. Қанчалар қўрқмас, кучли, арслонюрак бўлсанг ҳам, тажриба ва тадбирсиз муаммоларни ҳал қилиш қийин. Қани, нима дардинг бор, менга очик айтавер, болам.

– Тўгри, эҳтимол, мени тажрибасизлигим эзаётгандир. Мени қийнаб, ичимни еб битираётган дардни, албатта, айтишим керак...

– Яша, бўтам, қани, айт. Тажриба турли жумбоқларни ечишда сарфланадиган куч-куватдан ҳам муҳимроқдир.

– Ўтган қунги жанжални эшитдингизми? Анави, вазир Қазағанинг қизи Тоштуғой Туркан туфайли чиқсан уруш... Улуг вазир бир шарт қўйди, Хурросон калитини ким унга келтириб берса, қизи ўшаникйиши. Энди аллақанча йигитлар Хурросонга яқинлашувимизни кутишмоқда, мен ҳам... Шу ишни ҳал қилишнинг йўли бормикин? Агарда мендан олдин бошқа бирор калитни вазирга келтириб берса, у ҳолда ўлганим яхшироқ...

– Болам, бу дарднинг икки чораси бор: бири бу ишқдан воз кечиш ва иккинчиси калитни қўлга киритиши. Биламан ва аминманки, ишқдан воз кечиб, сўнгра унинг аламига чидаш жуда қийин. Демак, бу йўл маъқул эмас. Ундан кўра иккичи чорага бош урмоқ уйғундир. Бу иш тажрибали одам кўзи билан қараганда осон кўринса ҳам, аслида анча мушкулдир...

– Осонми, қийинми, менга барибир. Ахир аламдан оғир эмасдир, отахон, йўлини айтинг!

– Бу ишни бажариш учун, биринчидан, бу ердан тезда йўлга чиқиш ва қўшиндан олдин Хурросонга етиб бориш керак. Бундан кеттганингни ҳеч ким билмаслиги учун мен сени касал бўлиб қолди дея атрофга гап тарқатаман. Сен Хурросонга етибоқ, дарвоза қоровули кунда-шундасига айланган чойхонага борасан. Қоровул лақма, мағзава одам. Олдинига унинг эзмалигига чидаф, гапини эшитиб ўтираверасан – бу унга ёғдай ёқади. Сўнгра чой, қанд-курс билан сийлаб, унга яқинлашиб оласан. Бир неча кун ўтгач, Саидали деган бир одамга тепадан туриб калит ташлагин, дея қўлига олтин тўла ҳамённи қистирасан. Кейин Саидалининг қальяга келишини ва калитни олишини кутиб, беркиниб кутасан. Саидали қоровулдан калитни олгач, уни ўлдирасан ва калитни эгаллаб, қўшинга қараб отингни учирасан... Қани, бир кўрайин-чи, арслон болам, сен ким экансан? – дея маслаҳат берди чол.

– Мен барлос йигитман! – деди Темур.

Сайдалини битта калит дея ўлдиришни Темур ўз қаҳрамонлик руҳига сингдиролмади; уни олишувда мағлуб этиб, калитни олди-да, кўздан фойиб бўлди. Хушсиз йиқилган Сайдали қалъя девори тагидаги бир бурчакда узоқ ётди.

Тепада калитни кута-кута тоқатсизланган қоровул пастга тушди ва бошқа калит билан дарвозани очиб, бурчакда ётган Сайдалига кўзи тушди. Хушсиз ётган ярали Сайдали анчагина қон йўқотганди.

Коровул уни қучоқлаб кўтарди-да, ичкарига олиб кириб, ўз хонасига ётқизди. Унинг ярасини ювиб, боғлаш учун хотинидан кўмак истади. У титраб-қақшарди, қалъя калити йўқолганини англабоқ эси чиқиб кетганди.

Калитни топиши шарт. Шунинг учун ҳам Сайдалини жонидай асрайди, ҳеч кимга ишонмайди энди. У ўзига келиши билан калит қаердалигини, нима бўлганини сўрайди. Воқеани сир тутишни, кимсага оғиз очмасликни тайинлади...

Сайдали ҳамон бошидан ўтган у даҳшатли ҳолат таъсирида эди. Роса толиқканди. Яраси ҳам бита бошлади. Аммо у ҳеч ўзига келолмаётганди. Кўзи уйқуга илинди дегунча туш кўрар, тушида қоронгида ўзига ҳужум қилган кимсанинг товушини такрор туяр, у «Мен дарвозадан киришим керак!» дея уни қўрқитарди.

Хуллас, кутилмаганда бошига келган ўша кулфат ва сиқилишлар туфайли Сайдали ҳеч ўнглана олмаётганди. Рұхсизлиги учунми, яраси ҳам битай демасди...

Турли дори-дармон ва даволашлардан кейин, ниҳоят, у бироз ўзига келди. Коровул дарҳол ундан:

- Калит қани? – деб сўради.
- Билмайман. Мен қайдаман ўзи?.. – деди касал.
- Сенга нима бўлганини билмайсанми ҳали?
- Йўқ.
- Мен сени қалъя қапуси ёнидан топдим. Бурчакда ётган экансан... Эслайсанми?
- Ҳа, мен... Э, калит қани? – деди Сайдали довдираб.
- Сен мендан калитни сўрагандинг, тўғрими? – деди коровул.
- Тўғри.

- Мен сенга калитни тепадан ташлагандим...
- Ҳа, калитни олганимни эслаяпман... Үшанды ёнимга биттаси келди... Мен билан бирга ичкарига кираман, деди...
- Кейин-чи?
- Мен кўнмадим. Калитларни тортиб олмоқчийди, бермадим...
- Жуда яхши! Кейин нима бўлганини эслайсанми?
- У кийинишидан ўргига ўхшаган, қароқчисифат кимса эди... У бирдан ташланиб қолди, мен ҳам қиличимни суфурдим...
- Яхши... Воҳ-воҳ, нега менга хабар қилмадинг, ахир одам деган ҳеч курса тепага қараб бақиради-да!.. Э, майли, бўлар иш бўпти, кейин нима қилдинг?
- У ҳам қиличини яланғочлади, олиша кетдик. Жуда ўткир қиличбоз экан. Мени олдинига қўлимдан... кейин сонимдан, сўнгра бошимдан яралади. Хушимни йўқотибман, кейин нима бўлганини эслай олмайман.
- Мен бу ерда сени кутдим, келавермадинг. Бақирдим, чақирдим, кимса жавоб бермади. Охири дарвозани очдим, қарасам, бурчакда ётган экансан. Ичкарига олиб кирдим...
- Атрофни қидирмадингми, ҳалиги одам бирор не тушириб қолдирмаптими? – деда сўради Саидали.
- Йўқ, қарамадим. Эртага текшираман, – деди коровул. – Ҳа, у ичкарига кирмадимикин? Ҳусайн Қурт қалья калитларини йўқолганини эшитса борми, мени ўлди деявер!.. Эртага вақтли туриб, теваракни бир тинтиб чиқаман. Ҳа, у кимса юрак ютиб ичкарига киролмас-ов...
- Жуда тўғри!..
- У ҳолда, демак, агарда калит йўқолган бўлса, буни мендан бошқа фақат сиз биласиз. Ҳолбуки, сизни деб мен шу жинойи ишга қўл ургандим. Иккимиз ҳам айбормиз. Берилиши тақиқланган нарсанинг олиниши ҳам жиноятдир. Бу воқеани кимсага билдираманг! Мен у калит ўрнига янги бир калит ясаттираман, ёлиғлиқ қозон ёлиғлигича қолаверади. Шундай қилиб, мен ҳам еб турган нонимдан ажралмайман, сизнинг жиноят қилганингизни ҳам кимса туймайди. Касаллигингизга бирор жўяли баҳона ўйлаб топарман. Келишдикми?
- Келишдик. Гал битта!

– Бўлди, кўнглимнинг тинчиши учун шу сўзингиз етарли.
Энди қалайсиз?

- Яхшиман, худога шукр.
- Бошингиздаги яра оғир дейсизми?
- Ҳа, шунаقا шекилли, бошқа яраларимдан кўра ёмон қаттиқ оғрияпти.
- Ҳа, бошқа яраларингиз унчалик эмас...
- Ҳа, энди пешанайкан-да...
- Қайгураверманг, икки-уч кунда тузалиб кетасиз.
- Иншооллоҳ.
- Худойи таолодан битта тилагим бор – шу калит топил-сайди, ишқилиб.
- Худо хоҳласа, топилиб қолар.
- Ҳалиги ўғри уриб кетган бўлса, қандай топамиз ахир! –
дэя яна қоровулнинг мияси суйилди.
- Э, қўяверсангиз-чи, биз янгисини ясаттирамиз.
- Зотан, шунга қарор қилдик-ку.
- Тўғри, тўғри!..

Қоровул эрта тонгда атрофни тинтиб чиқди. Тўқилган қон-
ларни ювди, қиртишлади, изларни йўқотди. Аммо калит то-
пилмади.

Эртасига тонг отиши биланоқ иккови ҳаяжонли суҳбатга
берилишиди.

- Атрофни турклар ўраб олганмиш...
- Қандай қилиб, нега?
- Ҳусайн Қурт ҳазратлари уларнинг юртига бостириб
борган эди-ку...
- Э, ҳа, шунгами.
- Ҳа, улар ҳам энди Хурсонни босиб олишармиш.
- Эйвоҳ, куним битибди!
- Э, қўйсангиз-чи, ваҳма қилманг. Билмайсизми, турк-
лар хасталарга тегмайди, бу уларнинг энг муҳим одатла-
ридан. Қари-қартанг, хотин-бола-чақаларга ҳам, ана шу-
наقا.
- Ҳа-а-а. Мен-чи, урушмай ётавераманми?
- Ўз жонингизни ўйласангиз-чи, уруш бўлса, тузалганин-
гиздан кейин ҳам қочмас.
- Ўх-х! Ё Раббий!..

– Ҳа-ҳа, ишлар шунақа. Сен, мен ва хотинимга қийин. Чунки сен касал, мен қари, анави хотин киши бўлгани сабабли ватанимиз учун урушмоқдан маҳруммиз, эй воҳ... – деди қоровул.

- Афсус, афсус... – дея касал ҳам қайгуриб қўйди.
- Э, мана шунинг учун кўп хафаман-да.
- Қўй, эзилаверма. Ҳа, турклар бунда нима қиларкан ўзи, билмайсанми?
- Йў-ўқ, сен айтмасанг, мен қайдан билай.
- Бу ерда тўй қиласмишлар-ку?
- Шу ерда-я, ичкари кириб, шунча мол-ҳолни талаб олганларидан, шунча одамни қирғин қилгандан кейин, а?
- Айтдим-ку ахир, улар ўзларига қарши чиқмаганларга тегишмайди.
- Қарши чиққанларни нима қилишади?
- Бошини кесадилар.
- Қанақа тўй қилишармиш ўзи?
- Қиз чиқаришаркан.
- Кимни?
- Улуг вазир Қазаганинг қизи Тоштуғойни.
- Кимга беришяпти?
- Темурга!.





III. ДАҲШАТЛИ ҲУКМ

Орадан уч кун ўтди. Хурсоннинг пастқам кўчаларидан биридаги вайрона, хароб уйда бир неча кимса тўпланган. Ташқаридан туркларнинг севинчли наърларига, валинеъматлари вазир Қазаған берган тўй нашъаси билан бир овоздан қийкиришларига қарама-қарши ўлароқ бунда йигилганлар руҳидаги файирлик, кину адоват, кўзларидаги ўч диққатни жалб этарди.

Темурнинг шартни бажариши, тўйи, байрами кимлардир учун мотамга айланганди. Бу хурсандчиликдан рақиблар ноҳуши эди ва улар интиком ўтида ёниб, бу ертўлада жамланишганди. Ичларидаги ҳирс ва ҳasad томирларини ёриб чиқиб, заҳарли найранг йирингларига айланниб, ўртага тўкилмоқда эди.

Ҳаққа ва ҳақиқатга розилик кўрсатиш ўрнига унга қарши туришмоқда, ҳатто уни йўқ қилиш учун бирикишиб, гуруҳ тузишмоқда, воажаб!

Йигилганларнинг ҳар бири фойдасиз интиком оташида қовуриларди. Руҳлари жаҳаннам забонийлари каби ғаддор, қалблари шайтони ражимдай золим ва ўzlари ҳақу ҳақиқат нурларига қарши бош кўтарган осийлар эди.

Юзларига боқилса, миршаблар башарасидаги совук даҳшатдан бошқа нарса кўринмасди. Фақат баднафсликнинг – нафси амморанинг тажассумига айланган бир тимсоли маль-уния кўлкаси бор. Қалбларидаги иймон илоҳий қудрат тарафидан олиб қўйилганмикин деб ўйлайсиз. Кўзларида заррача шафқат хисси, онгу тушунчаларида урвоқча ҳамият туйғуси, сўзларида бирозгина бўлса ҳамadolat фикри сезилмасди...

Йиғилиш ўтаётган ер бинонинг ертўласи бўлиб, қоронги ва рутубатли эди. Ертўланинг қўчага қараган томонида ҳам, бошқа тарафларида ҳам дераза ё туйнуксимон бирор тешик йўқ. Қоп-қоронғу хонадаги бир хонтахта теграсига чўккан

фитначиликнинг ҳасад ва ҳирс тўла юз-кўзлари хира шам ёғдуларида аранг-аранг кўринарди.

Бу зулмат ва зах охирда ўтирганларнинг ажин босган тириш юзларида руҳларига азоб берган ҳасаду кин хасталигининг тасвири муҳрлангандай. Шайтанат эгаллаган дилларида надомат ё пушаймонлик ҳисларига ўрин қолмаган. Иблисона қиёфаларидаги қўпопллик ва шафқатсизлик шундоққина кўзга ташланиб туради.

Барчаси Ноқис деган амирлари буйругига қатъий бўйинсунган ҳолда бунда мажбуран ўтирганларини писанди қилаётгандай гўдайишган; қилт этмасдан унинг сўзларига кулоқ солишмоқда. Ўзларини унинг ҳар қанақа буйругини сўзсиз бажаришга бағишилаганлариданми, ихтиёrsизликдан руҳлари ээилган, елкалари чўкиб, қаҳрдан қунишиб ўтиришарди.

Интиқом аламига тўла кўзларидаги ҳиддат ва ваҳшат оташи ҳеч сўнмайдигандай жонларини ўртаб-куйдирмоқда, ёнган жонларининг ўтли парчалари гўё атрофга даҳшат бўлиб сочилмоқда эди.

Бу ёниқ даҳшат парчалари қоронгиликда худди мушукнинг кўзлари каби йилтилаб кўринарди; аммо, минг афсуски, бу шайтоний йилтиллашлар уларнинг руҳидаги улкан зулматни ёрита олмайдиган даражада кичик ва заиф эди.

Бу мажлиснинг ахволи руҳияси шундайин тубан, даҳшатли, иблисона фитнага тўла. Кўрқинчли, совуқ сукунатни бузиб илк бор сўз бошлигар кимса шундай деди:

– Хўп, модомики, у ғолиб келди, бўлар иш бўлди. Аммо биз нечун ундан ўч олмаслигимиз керак?

– Ие, оғайни, унинг нима айби бор? Бирор ёмон иш қилдими ё? – деди бошқа бириси. – Агарда у эмас, орамиздагилардан бири ғолиб чиқсайди, у ҳам бизга ўхшаб ўч олишни ўйлармиди

– У ҳолда, менимча, ўлиши керак бўлган бошқа кимсадир! Айб олувчида эмас, берувчиладир.

– Йўқ! Менга қолса, бу вазиятда айб олувчида ҳам, берувчида ҳам эмас. Асл гуноҳ беришга маҳкум этган қувватдадир...

– У ҳолда?..

– У ҳолда, ҳукм этган у экан, демак, жазосини тортадиган мальян ҳам ўшадир!

- Түгри!
- Түппа-түгри!..
- Үнда кенгаши давом эттирамиз ва асосий ишни ҳал қилайлик.
- Қани, қани...
- Уни биз чеккан аламларнинг энг оғирига бостириб ўлдириш керак! Бизни ёндирган аламнинг энг заҳарли ўтида күйдириб ўлдириш лозим! Қани, айтинг, қандай жазо берайлик?
- Олдинига уни бир қозиққа боғлаб, қулоғини, бир кундан оралатиб бурнини, қўлларини, оёқларини кесиш ва оч қўйиш керак!..
 - Э, бунақаси кетмайди, мумкин эмас!
 - Нега?
 - Бунинг учун аввало уни қўлга тушириш, яъни яширинча олиб қочиш керак, бироқ бу иш имконсиз...
 - Тўгри... бу имконсиз, бундай қилиб бўлмайди.
 - Үнда ўзингиз айтиб қўя қолинг...
 - Менимча, энг маъқул йўл шу: кечаси чодирини босиб, уни ўлдириб, билинтирмай қочиб қолиш керак.
 - Кўп яхши! Фақат биз истардикки, тез ўлиб қутулмасинда, қийналиб ўлсин!
 - Қўйсангиз-чи, дўстим, қийнаб-мийнаб ўтирадими, ўлсин-йўқолсин, қутулагиллиг-э!
 - Йў-ўқ, гапимиз гап: у қийналиб ўлиши керак! Ахир биз у туфайли жаҳаннам азобини тортдик-ку, унгаям тўққиз дўзахни кўрсатиб қўйиш керак!..
 - Үнда одамларимиз билан уни босиб-тутайлик-да, майдонга олиб чиқиб, роса азоблаб ўлдирайлик!
 - Ҳай-ҳай, ўзингизни босинг! Бунинг ҳеч иложи йўқ! Хозирча исён бошлаганимизни яширин сақлашимиз лозим. Дейликки, уни тута олмадик ва сиримиз очилиб қолди – бoshимиз кетади-ку, ахир!.. Шунинг учун, яхиси, ҳар ишни ими-жимида битиришга мажбурмиз.
 - Яхши, унда бу ишни бажара оладиган кишини танлашимиз даркор. Кимнинг қўлидан келади, қани? Ичимиздан ким бу ишни бўйнига олади?
 - Мен юзма-юз урушавераман-у, шу, ханжар урища машқим пастроқ...
 - Мен ҳам шунаقا...

- Сен-чи?
- Э, нима қиласиз? Бу ишни биримиз бажариб, бошқамиз қараб турса, бунақаси кетмайди!
- Ҳа, мен бир нарсани ўйлаб топдим. Барингизга ёқади бу. Шу деворни мўлжаллаб ўқ отамиз, ким нишонга уролмаса, бу ишни ўшанга топширамиз. Бўладими?
- Э, яшавор, бўлди! Агарда икки-уч киши мўлжалга уролмаса, ўзаро яна синашадилар.
- Ҳеч ким нишонга теккизолмаса-чи?..
- Синаш такрорланади.
- Бўлди, келишдик.

Бу қарорга келингач, йигилганларнинг бари ўрнидан турди. Ёйлирига ўқ жойлаб, деворга қаратса машқ сифатида бир-бир ота бошлашди...

Барчани ҳаяжон босганди. Бошида оғиз кўпиртириб сўзлаган қаҳрамонлар энди тулки каби писиб қолганди. Ўзларининг яхши ўқотар эканликларига ишонсалар ҳам, мабодо, фалокат босиб нишонга уролмасам-у шу иш менга қолса, нима қиласкинман, деган қўрқув кўнгилларга орала-ганди ва биринчи бўлиб бошлашга ҳеч ким шошилмаётганди.

Нихоят, бир йигит ўртага чиқди, барча уни олқишлиди. У ёйини кериб, қўйиб юборди, ўқ нишонга тегди. Ўқчи ғалаба наърасини отаркан, қалбидан тошган севинч тўлқинларини босиш учун четроққа йўналди.

Иккинчи... учинчи... навбати билан ўқ узиш давом этди.

Охири улардан биттаси жуда қутуриб, гуноҳкорни роса қийнаб ўлдириш керак деяётган йигит мўлжалдан янгишиди. Ундан кейин барча ўқ отганлар нишонга урди.

Шундай қилиб, фитна мажлиси ҳам тугади, бўлажак қотил ҳам аниқланди. Энди қандай ўлдиришга келишилса, бас. Йигилганлар яна кенгаша бошлашди.

Бўлажак қотил эса уларга аралашмас, бир четда сўппайиб, қотиб қолган, қон қочган сарфимтири юзи қайгуга ботган эди...

Ишнинг асосий қисми ҳал этилгани учун елкаларида-ги оғир юқдан қутулган йигитлар мамнун ҳолда масалани муҳокама қила кетишиди.

- Бу иш қачон бўлгани маъқул?
- Қайтиш пайтида...

– Энди қарор қабул қилинди, фақат, мажлисимиз бошида айтилганидек, бу иш жуда оғир, қақшатқыч ўлим билан якунланиши керак!

– Менга қолса, бунинг ҳеч кераги йўқ, ундан ўчимиизни олайлик-да, кифояланайлик...

– Ие, унда қароримиз қарор эмасми?

– Қарор...

– Бунда неча кишимиз?

– Саккиз киши.

– Баримиз шу қарорни сир сақлашга онт ичамиз, розимисизлар? Уни ўлдирадиган оғайнимиздан бошқа ҳамма қасам ичсин!

– Тўғри, ичамиз!

Шундай қилиб, сўнгти қарор ҳам қабул этилди.

– Яхши, энди тарқалайлик... – деди фитнабоши.

– Шу вазир Қазаған гўрга киргандан кейин унинг куёви нима бўларкин, қани кўрамиз... – дея бири тишини гижирлатди.

Ҳа, фитначиilar томонидан иккинчи ўлдирилажак шахс Темур эди.





IV. ҚАЛЬА ИЧИДАН ЗАБТ ЭТИЛАДИ

Туркларнинг Хуросон қальасини ўраб олганлари ҳақида қоровул билан хаста Сайдали сўйлашиб ўтирганларида, аслида, у ичидан эгалланиб бўлаёзганди. Чунки ўттизтacha турк аскари қальага кириб, ўз ишларини бажаришаётган эди...

Уларнинг қальага кириши шундай юз берганди: Темур, капитан вазир Қазағанга топширган куни, эрталаб ундан қабул қилишини сўради, изн олгач, бориб у билан кўришиди. Хуросонни эгаллаш режаси тузилди.

– Улуф вазир! – деди Темур Қазағанга. – Рухсат этсангиз, аввало, бандангиз ўттиз аскарим билан қўшиндан ажралсамда, ўқдай учиб Хуросонга етиб борсам...

– Маъқул. Аммо сизнинг боришингиздан туркларнинг келаетганини сезиб қолган Ҳусайн Курт тарафдорлари керакли тайёргарликни кўриб, бизга тўсиқ бўлмасмикин?

– Улуф вазир, изн берсангиз етарли, бу аскарлар билан мен кеча қоронғусида, кимсага билдиримасдан Хуросонга кириб бораман ва уларни қальага жойлаштираман...

– Кейин-чи?

– Эртасигаёқ қўшинга қайтиб келаман ва ҳужумни бошлиймиз...

– Ичкарига кириб олганлар нима қиласди?

– Улар кийимларини ўзгартириб, шаҳарнинг ҳар ёғига ёйилишади ва турклар ҳақида турлича миш-мишлар тарқатишади...

– Қанақа миш-миш?

– Масалан, турклар бу ерга келибdir, аммо улар ўзларига тегмаганларга ҳеч қанақа ёмонлик қилмас эмиш ва зотан одатлари шунақа эмиш, дея гап тарқатишади. Ёки: турклар Хуросонда қилинадиган бир тўйга тайёрлик кўришптиймиш, тўй кайфијатида бўлганлари учун, ҳеч кимнинг бурнини қонатишмоқчи эмасмиш, дея омманинг қулоғини қиздиришади...

- Балли! Сўнгра?
- Авомни гоҳ ваҳимага солувчи, гоҳ севинтирувчи шунақа гаплар билан овутиб, лақиллатиб туришади-да...

- Натижа нима бўладир?

- Кўшинимиз жангга кириши биланоқ улар ҳам қиличларини ялагочлаб, қалъя ичидаги ҳужумга ўтишади, дарвозаларни синдириб-бузуб очишади ва аскарларимизнинг ичкарига киришлари учун йўл тайёрлашади...

- Ўғлим, агар сен уларнинг бошида турмасанг, тартиб билан бир иш қилиш қийин. Яхиси, сен қалъада туриб бир байроқ воситасида қўшинимизга ҳужум ишорасини берсанг, сўнгра одамларингга дарвозаларни бузишни буюрсанг, ишимиз янада силлик битади деб ўйлайман.

- Бунақа қилсақ ҳам бўлаверади, отажон. Фақат, ўйлашими, менинг қўшин билан бирга юриш қилишим фойдалроқдир. Сиз айтган ишни бошқа бирорга топширсам, бўладими?..

- Майли, ўғлим, билганингча иш тутавер! Режаларинг жуда мақбул!..

- Бу ердаги аскарлар жуда интизом билан ҳаракат этишлари лозим...

- Кўнглингни тўқ тут, сен айтганингдай бўлади...

- Энг муҳими, сизларга бир отлиқ юбораман, у айтган тартибга кўра юриш қилинса, бас...

- Қанақа тартиб?

- Унинг қандайлиги менинг қалъя ичидаги бажарадиган баъзи ишларимга боғлиқ, кейин билдираман...

- Жуда яхши ўйлабсан, ўғлим. Рухсат, одамларингни ол-да, йўлга тушавер!

- Хўп бўлади, отажон!.. – деди Темур ва улуғ вазирга таъзим қилиб, чодирдан чиқа бошлади. Шу аснода Қазаганинг товуши қулоғига чалинди, у:

- Арслон Темур! Мен сени мингбоши қилиб тайинладим! – деди...

Эртаси кечки пайт Хурсонда, Ҳусайн Курт қароргоҳи атрофида нотаниш бир йигит айланиб юрарди.

Бу шахс фоятда эҳтиёткор ва жуда кўркоқ одамдай қадам ташлар, баъзан тўхтаб, теграсига қулоқ солар, мумкин қадар ими-жимида ҳаракат қилишга интилар эди. Елкасида

хуржуни ҳам бор. Диққат билан қараган киши унинг хуржунидаги юк тобора озайиб бораётганини сезиши қийин эмас...

Бироз юргач, нотаниш йигит хуржунини ерга қўйди ва эгилиб, изини йўқотиш ниятидами, қўллари билан тупроқни текислай бошлади...

Анчагача бу иш билан машфул бўлди ва ниҳоят, хуржунини яна елкасига олиб, қалъя дарвозаси тарафга йўналди. Бир муддат ўтгач, хуржун бўшади. Ортига қайтаркан, аввалгидаи эгилиб, қўллари билан тупроқни аралаштириб, ерни текислаб келди.

Сўнгра хуржунни олиб, яқинидаги бир уйга кириб, уни тўлатиб чиқди. Ярим қолган ишини давом эттириб, яна қалъя дарвозаси томонга қараб ҳаракат қилди... Ишини битириб, кўздан ғойиб бўлди.

Анчадан сўнгра яширинча ҳалиги ишларни қилган нотаниш йигит ёнида бир отлик билан қалъя дарвозаси ёнига келди. Кўлидаги калит билан дарвозани очди. Эгилишиб, отнинг туёқларига боғланган кигизларни ечишди. Сўнгра нотаниш йигит отлиққа шивирлаб топшириқлар бера бошлади:

- Дундар, энди сен билан ажralишамиз. Шу ердаёқ отга осилган хуржун тубини пичоқ уриб, тешиб қўясан...
- Хўп бўлади, мингбоши! Кейин-чи?
- Ўнгдаги хуржун бўшагач, чапдаги хуржун тагини ҳам тешасан.
- Бош устига, мингбоши!
- Хуржун ичидаги қаерда тугаса, ўша ерга белги қўясанда, қўшинга қараб от чоптирасан...
- Вазир Қазаганинг ҳузурига кираман...
- Шундай! Унга қўшинга юриш буйругини беришини ва ўрдунинг белги қўйилган майдонга келиб кутишини айтасан.
- Бош устига!
- Қайнотам, муҳтарам қўмондонимизга ҳурматимни билдири ва айтганларимни тўла етказ!
- Буйруғингизни бажараман! – деди ва отлик хуржунни тешиб, йўлга тушди.

Нотаниш йигит қўлини чўнтагига суқиб, бир нарсаларни олди ва олдин тўхтаган жойидан отлик жўнаган ергача уларни кўмиб, тупроқни излар билинмайдиган қилиб текислади.

Бу шошилинч ишлар битгач, энди бу маконда ўзи қиласынан иш қолмагани учун дарвозани беркитиб, калитни қўйнига солди-да, йўлига кетди.

* * *

Шу воќеанинг эртасига эрталаб бутун Хуресонга миш-миш тарқалиб, ахолини ҳаяжон қоплади.

Хуресон бозорларида, чойхоналарида одамлар урушга тайёргарлик ҳақида ваҳимали сўзларни айтишар, турли миш-мишларни тақрорлашар эди:

- Вой-бўй! Турклар ҳамма ерни ўраб олганмиш...
- Аскари жуда кўп эмиш, ўзимизни қачонгача ҳимоя қиласкинмиз, а?..
- Ўлгунгача...
- Улар ўлдираверарлар, ўлдираверарлар...
- Э, ўлдирса ўлдирсан!
- Бундан сенга нима фойда? Кафандан бошқа сенга не тегарди?
- Э, бўлганича бўлар.
- Балки кафан ҳам тегмас?
- Нега?
- Чунки турклар урушда ўлганларни кафандашмайди.
- Нима бўлганда ҳам биз ватанимизни мудофаа қиласверайлик-чи...
- Менга қолса, мудофаа-пудофани ўйламаган яхши, ўлишга шошиш ақлдан эмас.
- Э, оғайни, ҳамманинг жони ҳам жон, нима, турклар бизга ўхшаган одам эмасми?
- Бизга ўхшайди-ку, аммо фарқи бор-да: бизлар заиф, улар кучли.
- Нима бўпти?
- Э, қўлимиздан ҳеч нарса келмайди!
- Ҳеч нарса келмайди эмиш! Ватанимиз учун ўлиш ҳам қўлимиздан келмайдими?
- Қанчалар ватанпарварлик қиласанг-да, бошқалар не ҳам дерди? Сени ургочисини кўлдан чиқармаслик учун тиришган арслонга ўхшатади холос, шу.
- Бу гапларни қўй. Хўш, туркларнинг бу ерда нима иши бор деб ўйлайсан?

– Ие, оғайнни, туркларда не гуноҳ, ахир бизнинг Ҳусайн Курт уларга ҳужум қилди-ку, энди улар ҳам жавобини қайтармокда-да.

– Ҳм-м... Сен мудофаа тарафдоримисан?

– Балки мудофаа қилиш керакдир, фақат ўлгунгача эмас.

– Тўғри айтасан.

– Ана, гаплашганимиз яхши бўлди. Сен ҳам менга ўхшаб ўйларкансан.

– Зотан, шундай ўйлашга мажбурмиз. Аммо урушга киргандан кейин, бирор дайди ўқ тегиб қурбон бўлсанг, бунга ҳам кўниш керак, ахир, ватан учун ўлимдан қочиш айб-да!

– Ҳолбуки, мағлубият муҳаққақ!

– Унда жонга қасд қилмаган маъқул. Ўлиб кетгандан кимга фойда ахир.

– Аввал айтганимдай, бу вазиятда турклар ҳақли: бизники уларга ҳужум қилди, улар жавоб бермоқда, демак, ҳақ улар томонда бўлгач, мағлубиятимиз ҳам аниқ!

– Ҳа, сендан турклар бу ерда нима қилишмоқчи, деб сўрагандим...

– Тоштуғой Турканинг тўйини ўтказишар эмиш.

– Кейин-чи?

– Билишимча, кейин қайтиб кетадилар...

– Шунча оворагарчиликдан нима фойда бор?

– Агарда тутиб олишса, Ҳусайн Куртнинг адабини бериб қўядилар. Тутилмаса ҳам, голиблик уларга катта мукофот...

Бўлар сухбатлашиб туришаркан, тушлиқ пайти ҳам бўлиб қолганди. Бирдан қалъада катта тўполон, шиддатли тарақатуруқ бошлианди, омма инига чўп суқилган арилардай ҳар тарафга тўзғиб-қочди, бир зумда шаҳарда қиёмат қўпди. Яраланган, йиқилган, эзилган, инграган, йифлаган аҳолининг паришон ҳолидан – туркларнинг қиличи солган қўрқувдан – Хуросоннинг руҳи сингани кўриниб турарди.

Бу тўс-тўполон қайдан чиқди, бу ваҳима қайдан келди, бу маҳшарни ким келтирди ўзи?..

* * *

Темур қалъа ичидаги бир уйни нишонга олиб, уни портлатиш учун ер остидан лаҳм қазиб, уни ташқарига, дарвоза ёнигача келган бир нуқтага туташтирган эди. Бу нуқтани эса

қўмондон Қазаған қўшини қўр тўккан майдонга улаган эди. Бу яширин портлатиш йўлига борут тўкиб чиқилганди. Унга ўт берилгач, кутилмаганда дарвоза атрофини, қалъа ичкарисини портлаш гумбурлари қоплади, чақмоқ тушиб, уйларни ёққандай бўлди; Ҳусайн Куртнинг одамларидан аллақанчаси ўлди.

Темур қалъа кунчиқари бурчагидаги бир тепага чиқиб, қўлидаги байроқни ҳилпиратди. Бу қўмондон Қазаған қўшинига бир ишора эди. Шу онда қўшин турган ердан бир ўт ёниб, илондай билтанглаб, ўқдай учганича қалъага қараб йўналди ва бир зумда шахарга кирди.

Портлаш йўлларининг иплари ўргимчак тўридай шаҳарнинг барча дарвозаларига ва улардан яна чўзилиб келиб майдондаги нишонга боғланганди. Майдондаги катта портлаш ҳар ёқни остин-устун қилиб юборди...

Ха, Хуросон аҳли энди-энди мудофаа тайёрлигини қўраётган пайтда, кутилмаганда юз берган бу мудҳиш воқеанинг сабаби, аслида, Темурнинг ярим кечаси ҳозирлаган портлатиш йўли ва унга Қазаған қўшини томонидан ўт берилиши эди.

Нима бўлганини халқ билмай қолди, портлаш шаҳарда қиёмат қўпгандай ваҳима уйғотди.

Уруш ҳам бир қиёмат эмасми, аслида? Бир қисм гуноҳкор банда ўзини қутқаролмайдиган даражада ожизу мағлуб ва бир қисм заволли эса қуролланган ва голиб!.. Маҳшар шу эмасми? Бир тарафда мамнун ва масъудлар, бир ёқда эса маҳкум ва гирёнлар!..

Темурнинг иккинчи ишоратидан сўнгра камоли шавқу шиддат билан қуролларини тақиб, отларига минишиб, Хуросон қалъасига довулдай ёпирилган турклар ўзларининг зафар қозонишиларига амин эдилар. Уларнинг ўқига учганлар, найзаси ва қиличи зарбидан ўлганлар, отлари туёқлари тагида эзилиб, ерда юмалаб ётган мағлублар... Бу талатўпда эсидан айрилганича жонини асраш учун ҳар ёққа қочаётганлар, жасадларни босиб, оёқларини қонларга булав югураётган фалокатзадалар... барчаси тинимсиз югурмоқда, йўл-йўлакай урушмоқда, олишмоқда, йиқилмоқда, ўлмоқда, қочмоқда... Хуллас, ваҳимали бир ҳой-хуйу қонли бир даҳшат тўла фо-

жеотки, күз билан қўриш, бору сўз билан тасвирлаш имконизи...

Бу пайтда дарвоза қоровули билан ярали Саидали уйдан ташқари чиқмасдан, не бўлишини кутиб жим ўтиришарди. Бир неча турк уларнинг маконига ҳам бостириб кирди. Ичкарида бир бечора хотин ва ярадорни, таслим бўлган қоровулни қўришди.

Уларга ҳужум қилиш турклар одатига ётлигига қарамасдан, баъзи марҳаматсиз аскарлар босқин ва талон қилишди. Учаласини ҳам боғламоқчи бўлиб туришганди. Шу аснода орқадан бир товуш эшитилди:

– Турклар уруш пайти касаллару хотинларга, болалару қариларга тегмайдирлар. Сизлар нима қилмоқдасиз?!

Аскарлар товуш келган ёқقا қарашиди. Барчаси шалвираб, кўллари ёнларига осилиб қолди ва мулзам ҳолда салом бериб, унга:

– Кечиринг, улуф мингбошимиз! – дея хитоб этдилар.



V. КУНДУЗИ УРУШ, КЕЧАСИ ТҮЙ

Үша куни аср пайти Хурносон забт ва асир этилди. Шаҳар тозаланди, тартибга солинди, ўликлар кўмилди.

Шу кечаси ҳеч кимса ухламади.

Бу тунда вазир Қазаганни ўлдиришга ҳукм қилган саккиз исёнчининг қарори амалга оширилиши керак.

Бу оқшом Хурсоннинг ишғол этилган энг улкан, ҳашаматли саройларидан бири тўйхонага айлантирилган ва зиёфат бошланган эди. Атроф ёп-ёргуғ, зиёга фарқ; ой ёғдулари гўё бу тўйни безамоқда; гўзал, очиқ юзли моҳитоб гўё фол очиб, толенинг кулиб боқаётганини билдираётгандай, Темурнинг порлоқ келажагидан хабар берәётгандай.

Ўртадаги гулханлар шунчалар чиройли ёнардики, осмондан қаралса, ер самога ўхшаб кетарди. Гулханларнинг ҳар бири бир порлоқ юлдуз каби ёнар, тўйхона эса ой мисоли ёрқин ва мунаvvар эди... Атрофда куй-қўшиқ янграр, тантана оҳангি, шавқу тараф, нашъали кўклам ҳавоси ҳукм эди. Барча турклар қўмондонлари вазир Қазаганнинг қизи келин бўлган бу кечада ниҳоятда хурсанд, кўлдан келганча ўйин-кулги қилиб, тўйни қиздиришга интилишарди. Уларнинг сухбатларида, самимий ўтиришларида турк халқининг улуғ ва содда табиати кўриниб турарди. Улар орасидаги яқинлик ва самимият тўй туфайли янада жонлангандай, юксалгандай эди.

Темур севгилиси Тоштуғой Турканга қовушган бу кечада, тўйнинг суруру завқидан таъсирланибми, тонгтacha ухлай олмади. У хаёлан бор-йўғини севгили ёрига бахш айлар, унинг гўзаллиги берган бу пурнур, нашидали соатларнинг ҳар бир онига ўз ҳаётини ҳадя этар ва яна мадҳу тавсифида жудаям ожиз қолгани Тоштуғой Туркан гўзаллиги кўкига термула-термула унинг порлоқ юлдузларини санамоқقا бошлар ва улардан ўйларида бир гулдаста ясар эди...

Қалбининг энг маҳрам нуқталаридан тўлиб-тошиб чиққан мұхабbat түйғуларини ҳаяжон билан суйганига англатаркан, бу орада жангу жадалларни, ўз қаҳрамонликларини ҳеч тилга олмас, фақат ишқдан, фақат ҳиссиётдан, валхосил, ёлғиз ўзидан, рухидан сўзлар эди.

— Тоштуғой, — дерди у, — сенга бўлган севгимнинг берган алами қанчалар золимлигини биласанми?

— Билмайман...

— Ўҳ-ҳ, билмайсан, шундайми?.. Юрагимда сақлаган ишқимни билишинг, ҳис этишинг учун, аввало, сени ундан хабардор этишим керак эди. Ҳолбуки, мен сенга буни билдирмадим. Сен меники, фақат ўзимники бўлганингдан кейин кўнглимни очаман, дея ўйлагандим...

— Энди мен сеники бўлдим, тўғрими?

— Ҳа, Туркан, ҳа! Энди сен фақат меникисан!..

Темур бу сўзларни айтаркан, жўштан руҳининг, ёнган қалбининг ҳароратига чидай олмади ва гўзал малагини кучди, ўпди, сўнгра бошини унинг тиззасига қўйиб, юрагини кўрсатиб:

— Мен ҳам сеники! — деди. — Тонгда, шудринги чамаларда ўтирган пайтларимда булбуллар сайраркан, улар сенинг гўзаллигингни куйлаялти дея рашик қиласадим! Офтобнинг маҳмур юзидан оққан хандали, гулгун ёғдулари сенинг нозик чеҳрангга азият беради дея, сенга, сенинг париларни кидан ҳам юмшоқ ва латиф баданингга ҳарорати савдоси-ла хиёнат этадир дея ўртаниб-қизғанардим!..

Гулдаги гулгун латофат сендан ўғирлангандир дея, ой ўзидаги ойдинлигу софликни сендан олиб акс эттираёттир дея, баҳордаги янгидан жонланиш, тирилиш сенинг дийдорингдан ҳосил бўлган дея қизғанардим...

Булар ва бутун олам сенинг гўзаллигинг туфайли гўзаллашаётганини ва бундан ўзимнинг маҳрум эканлигимни кўра туриб, кўп хафа бўлардим, йиглардим... Урушдан, гавғодан, жангу жадалдан ҳеч қайтмаган, сесканмаган бу қаттиқ кўнглим сенинг савдои ишқинг золимлиги қаршисида титраб, ожиз қолаверарди...

Тасаввур этки, тиз чўкканича Тангрисига ёлвораётган бир гуноҳкор вазиятида эдим... Мана шундай, Туркан, сенинг учун, фақат сен учун мен бу алам остида ҳар куни эзилдим,

йилларча мотам тутдим... сенинг юзингни күролмаслик менга энг оғир жазо эди. У жазони чеккан пайтларимда, ўша азобли ҳижрон зинданыда бўғилган замонларимда қалбимдаги фарёд ва изтироб, руҳимдаги аффону оғулар кўксимни ёқар, қовурап, ўзлигимдан, ўзимдан заррача бир нарса қолмас ва мен бутунлай сенга айланиб қолардим ва фақат сени ўйлардим...

– Нега?..

– Нега? Ўх-х, жоним, нега, нечун? Қалбим чаманидаги аламлар, ишқлар, руҳлар тараниум этган жоним булбулининг маҳфий ҳижронини сенинг у товуш етмас қулоғингга эшилтира олмаганим учун! Ишқим денгизидаги айрилиқ тўлқинларининг зарбалари кўнглимни яралаган дақиқаларда кимсасиз, умидсиз, имконсиз қолганим ва бечора руҳимдаги қийналишларни сенга, сенинг руҳингга сездира олмаганим учун! Борлигим осмонини қоплаган булатлар орасида ўртанарканман, ойдек йироқ юзингни кўрмоқ иштиёқида йиғлаган кўзларимдаги ҳижрон дардини сенга билдира олмаганим учун!..

Нечун дейсанми? Зулмати ҳижронда ожиз қолганим учун!

Нечун дейсанми? Бекаслигим учун!

Нечун дейсанми? Сенсилизигим учун!

– Мана энди менга эга бўлдинг...

– Ҳа! Сенга етишдим ва қалбим чаманидаги руҳим булбули ўз сирли қўшиқларини сенга айтмоқда энди. Хотираларимни сенга сўйламоқдаман. Ўх-х, хиралашган кўзларим висолинг нури билан тўлиб, аввалгида порлай бошлади энди! Энди юрагимдаги қайғу ўрнида гуллар очилди. Ундан ингроклар эмас, шавқу суур садолари юксалмоқда. Кўзларимдаги соғ ишқнинг шаффоғ ёғдулари сенга, сенинг қарашларингдаги нурларга бориб бирлашмоқда... Шундай қилиб, орадаги бутун ҳижрон азоблари битди, висолнинг ёрқин кунлари келиб етди! Қалбимдаги қора, мазлум булатлар қолмади, руҳимдаги жаҳаннамий оташлар сўнди, ишқимдаги зиндан ҳаволари тарқалди, кўксимдаги савдо заҳарлари йўқолди ва буларнинг барига сабаб сенинг порлаган толе офтобинг, сенинг дийдори ҳуснинг...

– Демакки, энди эски фам-аламларинг йўқ; демакки, бу кеча баҳтлисан. У ҳолда, нечун менга ўша дарду ҳузунларингдан, қоронфиликларингдан, ўлимларингдан сўйларсан?

— Ўҳ-ҳ! Ҳа, Тоштуғой, ҳа, энди улар бари ўтди, энди баҳтимиз билан бирга бўлайлик! Ўтмиш бир туш, келажак эса қоронгулик. Шундай экан, шу ҳолат дейилган ҳозирги онларнинг топилмас завқу шавқларини, суурурларини қандайдир тушга, аллақандай қоронғиликка фидо этиб бўларканми! Асло!..

Ҳа, жуда тўғри, Тоштуғой, жуда тўғри!..

Икки севишган висол кечасида шундайин сухбатлашиб ўти-раркан, тонг оқаринқираб, қуёшнинг заррин зиёлари уфқни ёрита бошлади... Тонг гўё келажакнинг порлоқ саҳифаларини, гулгун табассумларини ва Темур учун тайёрланган ёрқин истиқболни кўрсатмоқчига ўхшарди... Шу билан баробар, унинг юзида сарғимтир бир қулумсаш ҳам бор эдики, бу кеча оқшом бунда тўй қилинаркан, бошқа бир ерда вазир Қазаганинг қатлига қарор қилинганига, толенинг бадбаҳтилигига мудхиш ва самимий ишорат, шафқат аломати эди...



VI. МАШЬУМ КЕЧА

Хурсоңдан қайтилғанды... Хусайн Қуртни енгиб, зафар қозонған оқшомда она томонидан жалойирларга мансуб Тоштуғой билан Темурнинг түйи тантаналарини ўтказиб, сүнгра юртга равона бўлинганди.

Уруш тугаши биланоқ, суйумсиз қон ҳидидан қутулар-қутулмас, Қазаган ҳазратлари шошилинич суратда ўз ҳолига ташлаб кетилган ватанига қайтди. Улуг вазир ўзи йўқлиги замонида юзага чиққан масалаларни дарҳол ҳал этишга, бошқарув ишларини мустаҳкамлашга киришди.

Энди ҳар куни тонг оқаргач ўриндан туарар, қуёш чиққандан шомгача ҳокимият идораси билан машгул бўлар, ой ботгунгача ўринга ётмас эди.

Коронги бир кечада; вазир Қазаган ўтирган ердан нарироқда юзи-кўзи ўралган бир кимса сездирмасдан, шарпадай кезиб юрибди...

Болалигидан бери чодирда ухлашта ўрганган Қазаган уйкуга толаркан, ҳалиги шарпа товушсиз яқинлашиб, чодирнинг орқа тарафига ўтди. Кулоқ тутди, вазирнинг ухлаётганига қаноат ҳосил қилгач, ичкарига кириш учун чодир тагидан тешик очди.

Сўнгра номаълум киши атрофга қулоқ солди, бирор хавф йўқлигини аниқлагач, оҳиста ичкарига эмаклаб кирди ва чодир ичини кўздан кечира бошлади...

У очган тешик вазир Қазаган ётган ернинг ёнида эди. Қора ниятли шахс чодирда вазир ва ўзидан бошқа ҳеч ким йўқлигига амин бўлгач, қоронгиликда қўли билан ўлчаб, тахмин этилган нишонга, вазир Қазаганнинг қоқ юрагига ханжарини санчди.

Мудҳиш зарбадан бирдан уйғониб, ўрнидан сапчиб турган вазир қоронгиликда номаълум шахс билан бўғиша кетди. Қотил ишнинг пачава бўлиши мумкинлигини ўйлаб, фазаби янада қайнаб-тошиб, иккинчи бор ханжар урди...

Иккинчи зарбани еган кекса вазир ихтиёrsиз ерга чўзилиб қолди, бироз инграпиб, типирчилагач:

- Сен... кимсан?.. – деди.
- Менми? Сенинг қотилинг! – деди номаълум шахс.
- Нега... мени... ўлдирмоқчисан?..
- Қизингни бермаганинг учун!
- Сенинг... шерикларинг ким?..
- Қазагани истаган неча киши бўлса – бариси!
- Унда... бари... менинг амирларимдан...
- Шундай, бари! Зотан, эртага ҳар бири ўз одамлари билан исён бошлайдир!..
- Эй воҳ, юрагим... Ким бор...
- Ўл, э!..

Қотил шундай дея яна бир ханжар урди.

Сўнгра, бу ерда туришга ортиқ ҳожат қолмаганидан, чаққон эмаклаб тешикдан ўтди ва қоронгиликда фойиб бўлди.

Нохуш товушдан хавотирланган Темур ва Тоштуғой шошилиб, вазир Қазаганинг чодирига етиб келишди. Қазаган сўнгти нафасларини оларкан, Темурга қараб:

- Мени... ўлдирғанлар... эртага... сендан айриладилар, – деди. – Ўғлим, ўзингта... эҳтиёт бўл... Қизим... алвидо... Ўчимни... ўчимни олингиз!..

Вазирнинг сўнгти сўзлари бўғзидан хириллаш аралаш чиқди ва ҳурмат билан бош эгиб турган күёви Темур билан қизи Тоштуғой кўз ўнгида тўлғона-тўлғона жон берди. Бечора чолнинг боши ёстиқда қимиirlамай қотиб қолди. Тоштуғой ва Темур шу онда онт ичишди.

- Отамнинг ўчини оласан, а, Темур? – деди Тоштуғой.
- Ха, ўч оламан!
- Мени севасан, а?
- Ха, севаман!
- Сендан менинг бошим учун отамнинг ўчини олишингни истайман!
- Онт ичаман: отамизнинг ўчини оламан!
- Мен ҳам онт ичаман: ҳар доим сен билан биргаман, ҳар хусусда ёрдамчингман...
- Отамизнинг ўчини олмасдан қўймаймиз! Уни ҳечам унутмаймиз! Унинг интиқомини олгунгача фақат унинг учун яшаймиз!

– Ҳа, Темур, фақат унинг учун яшаймиз!
Иковлон аҳду қарор қилиб турган шу дақиқаларда қўлида машъала тутган Тоштугойнинг укаси чодирга кирди ва аҳволдан воқиф бўларкан:

– Тўғри, Темур, фақат ўч олиш учун яшаш керак, – деди.

Машъала чодир ичини ёритаркан, Темур бирдан бақириб юборди:

– Ҳаҳ!.. Аллоҳ гуноҳкорларни ўз айбларини беркитишида доимо янгилиш йўлларга солмишдир. Ана, қотил шу ерда! Оҳ... мана, қотил ханжарини отамизнинг кўксидаги қолдириб кетибди..

– Нима? Ханжарини-я?..

– Ҳа.

Темур вазир Қазағанинг кўксидан ханжарни суғуриб олди, унга синчиклаб қаради.

– Бу улуғ вазир Сулаймонга тегишли қурол, – деди.

– Демак, қотил у!..

– Ханжарга ва ундаги ёзувга қараганда, қотил у... фақат у ёлғиз эмас...

– Яхши, шериклари ким деб ўйлайсан?..

– Бу ишни аниқлаштиришни бизнинг Ўғуз Арслонга топшириш керак. Тонг отгунча ҳал қиласди.

– Онт ичамизки, улардан даҳшатли ўч олурмиз!..

– Ҳа, мудҳиши интиқом олурмиз!..





VII. МУДХИШ ИНТИКОМ

Эртаси тонгданоқ вазир Қазағаннинг қатл қилингани хабари ёйилар-ёйилмас қўшинда шунақаям саросима, талатўп бошландики, гурур ва иззат-нафслари задаланган турклар Темурнинг ёнига ёпирилиб келдилар ва ўч олишга қасам ичишиб, уни ўч олишга ташвиқ ва тарғиб этдилар.

Бу чоғда Темурнинг чодирига тўпланган беклар, мингбосилар ва бошқа улуғлар қотилнинг ва хоинларнинг кимлигини аниқлаш ниятида Ўғуз Арслон аниқлаган далиллар устида муҳокама юритишмокда эди.

— Болам, — деди Ўғуз Арслон, — буйруғингизни бажариш учун кийимларимни ўзгартириб, бошқа қиёфада жангчилар орасига бордим...

Хеч нарсани билмагандай кезинарканман, қоронфида, бир катта тош ортида беркиниб турган номаълум шахснинг: «Ким у!?» дея бақирганини эшитдим.

Унинг овози титрарди. Дарров ҳушёр тортдим, бир нарласи бор шунинг, дея ўйладим. «Менман», дедим-да, секингина унга яқинлашарканман, таниб қолмаслиги учун қоронфироқ тарафга йўналдим.

Каршисида тўхтаб, кўрдимки, Сулаймон турибди! «Нима қилдинг, Сулаймон? Анави ишни битирдингми?..» дедим шивирлаб.

Шу сўзимдан кейин унинг кўнгли тинчиб: «Ха! Битирдим! Аммо менинг ҳам ишм битди энди...» деди.

У мени ҳалиям танимаганди, ўзининг фитначи шерикларидан бири дея хаёл қилганди. Юз-кўзим белбоғ билан ўралгани учун соқолим кўринмасди, чаққон ҳаракатларим мени ёш кўрсатарди.

«Ошналаримизнинг хабари борми?» дедим.

«Йўғ-э, қаёғда. Бу ерга ўзим аранг келиб олдим-ку» деди.

«Бу ерда ҳеч ким йўқ, тинч. Уларни ҳам чақирсак бўлмасмикин?» дедим.

«Бўлади...» деди у.

«Кечқурун йигилиш бор деб айттириб юборишганди, бироқ мен боролмадим. Мана шу куни тунда ҳукми бажарилиши кераклигини билдиришганди, шунни ўйлаб, агар иш ўйлаганимиздай чиқмай қолса, нима бўларкин, дея роса кўрқдим-а... Шомдан бери шу атрофда дайдиб юрибман-да. Аммо ўзингам жуда чаққон, ҳар ишни сездирмай қиласидиган устасан-да, қачон келганингни билмай қолибман...» дедим.

«Ха, нима демоқчийдим... Унда бориб уларни чақириб келай. Бугунги йигилиш қайда?» деб сўради у.

«Қоя Алп чодирида» дедим.

У кетди.

Мен сўнгра чодирга бориб, фитначиларни кўрдим...

Ўғуз Арслон сўзини тугатиши билан Темур ундан:

– Улар кимлар экан? – дея сўради.

– Улугим, сиз уларнинг барини танийсиз...

– Йўғ-э! Кимлар?

– Бари сизнинг рақибларингиз. Тоштуғой Турканни истаб, қуруқ қолганлар, анави ғавфода Оқа Кундузни ўлдириб қўйиб, қўли қонга буланган саккиз жиноятчи... Сулаймон ўшалардан бири эмасми?..

– Ха, энди англайпман гап нимадалигини... Демак, Қазаган вазирни қизи учун ўлдиришган, шундайми? У ҳолда қотилларга омон йўқ!.. – деди Темур.

– Аллоҳ йўлингни очиқ қилсин! – деди Ўғуз Арслон.

Темур ўрнидан қўзғолгач, Ўғуз Арслон ҳам унинг ортидан әргашди ва чодирдан ташқарига чиқишиди. Аскарлар дарҳол уларни ўраб олди.

– Қотилдан ўч олишни истаймиз! – деган товушлар янгради.

Бунга жавобан Темурнинг:

– Ўч олингай! Отларингизни миниб, тўпланинг! – деган ҳайбатли овози жаранглади.

Барча севиниб тарқалди ва оқшомга яқин урушга тайёр бўлишиб тўпланишиди.

– Ўч олиш учун, вазир Қазаганинг интиқоми учун олға!.. – деган Темурнинг жасурона буйруғи эшистилди.

Улар уфқقا қараб учиб боришаркан, қаршидан бир отлик күринди ва яқинлашиб:

— Темур арслонни кўрмоқчи эдим, — деди.

Уни Темурнинг ёнига олиб боришиди. Отлик қўйнидан чиқарган буйруқни Темурга топширди. Уни ўқиган Темур амакиси ҳожи Сайфиддин Барлос, Боязид Жалойирий, кутбулақтоб Зайниддин Абу Бакр ва Мирсаид Шарифдан иборат маслаҳатчилари билан вазиятни муҳокама қилишга киришиди. Икки соатлик кенгашдан кейин маслаҳатчиларини эргаштириб бир тепаликка чиқди ва аскарларга қаратса шундай деди:

— Арслонлар, қаҳрамонлар! Шу онда орқага қайтмоқ биз учун мувофиқдир. Бу ишнинг тўғрилигини маслаҳатчиларим, мамлакатимизнинг энг ақллилари бўлган шу зотлар ҳам тасдиқлашдик, бу қарорда ҳикмат бор.

Сўнгра отига миниб, йўлга чоғланди. Гарчи бу тарзда қайтиш баъзиларга ёқмаган, миш-миш чиқарган бўлса ҳам, барча аскар отланишиб, унинг ортидан эргашдилар.



VIII. ҚОТИЛЛАРГА НИМА БҮЛДИ

Сулаймон кутилмаганды учраб қолган Ўғуз Арслоннинг сўзларидан бироз шубҳалаганди, фақат ўша пайтда қотиллик изтиробида ўртанаётгани ва эси унчалар ўзида эмаслиги учун унинг кимлигини ўйлаб кўролмаганди. Бир муддат кутди, лекин у тарафдан ҳеч кимнинг келмаганини ва бу туришда келмаслигини ҳам англаб етгач, бу ерда бир гап бор, деб қўйди. Дарҳол сергак тортиб, турган жойидан заҳарли илон каби қўзғолиб, бошини ҳар ёқقا буриб, теграсига иблисона қўз ташлади-да, шипиллаганича юра кетди...

Қоя Алпнинг чодирига борди. Эшик ёнида турганича ичкарига қулоқ тутди. Чодирда уни кутаётгандар тоқатсизланиб, ўз гапларини маъқуллашарди:

- Ҳалиям келмади-я, ишқилиб бир фалокат бўлмасинда...
- Кўйсанг-чи, дўстим, ҳар ишда шунаقا кечикиш Сулаймоннинг эски одати-ку! Зотан, қўлидан нимаям келарди...
- Ие, ўйлаб гапиряпсанми? Агар у шу пайтда бу ишда бирор хатога йўл қўйса, биз жуда кўп нарса йўқотамиз!..
- Э, азизим, бекорга хавотир оляпсиз. Кутайлик, юрган одам, келиб қолар ахир...

Зотан, бир жамият, қанчалар событ ва мустаҳкам бўлмасин, агарда у ёмонлик пойдевори устида тикланса, ҳақиқий тўғрилик foясига таянмаса, унинг аъзолари ўртасида нифоқ чиқаверади. Бири у дейди, бири бу дейди; бири у ёқقا, бири бошиқа ёқقا тортади... Улар доимо бир-бирларига қаршидirlар. Яхшиликтан муддао ёмонлик-ла мусобақага киришмоқ бўлар...

Шундай қилиб, Сулаймоннинг қотиллик мартабасига эришуви ошналарига турлича таъсир этган, баъзилари ҳасад қилиб, ҳалитдан уни чайнай бошлишганди:

- Кўрайлик, қачон келаркин? Оқшомдан бери кутяпмиз, тонг ҳам оқарди, ҳалиям келади!..

- Албатта, келади, қаёққа борарди. Ишқилиб бизга хиёнат қилмаса, бас.
- Сен нима деяпсан ўзи? Оғзингга қараб гапир!
- Менимча, ундан ҳар нарсани кутиш мумкин.
- Бу нима деганинг?
- Биз қасам ичган пайтимиизда унга дикқат билан қараган-мидингиз?
- Ха, эсимда, фоят турқи совук эди.
- Турқини күяверу онт ҳам ичмаганди! Мен ўшандан бері бу ишнинг охири нима билан тугаркин дея бошкотираман.
- У ҳолда, тағин қочиб кеттган бўлмасин, а?
- Балки қочгандир, балки хиёнат қилгандир.
- Йўқ, ўртоқлар, йўқ, у бунчаликкка бормас. Сулаймон, эҳтимол, сизларга хиёнат қиласар, бироқ ошиқона интиком сўзидан қайтиш ҳечам кўлидан келмайди! Ундаги ишқ руҳсиз олтиндан бошқа нарса эмас: у фақат қиличдай кесади, фақат ўлдиради, фақат у ишқ буйргуни бажаради!

Сулаймон чодир ёнида тураркан, унга номаълум бир одам учрагани ва бу ерга у йўллаганини айтишга қарор қилганди, бироқ ўртоқлари уни кўришлари биланоқ, оғиз очтирмасдан, сўроққа тутишди:

- Иш битдими?
- Айтақол, нима бўлди?
- Қаршилик кўрсатдими?
- Сени танидими?

Сўроқ дўли остида қолган Сулаймон, буларнинг эзмалигидан, вақт зиклигидан сиқилиб:

– Дўстларим, – деди писандисизларча, – сизларга ишнинг қандай бўлганини айтиб беришга ҳозир вақтим йўқ. Қани, туринг, ҳозироқ баримиз отга миниб, йўлга тушамиз!.. Бу ердан қочишдан бошқа чора қолмади...

- Нима бўлди ўзи, тушунтиранг-чи!
- Нима бўларди, дард бўлди! Сизлар бу ерда суҳбатлашар экансиз, чодир ёнида бир шарпа сўзларингизни тинглаб турганини кўрдим. Табиийки, сизлар бунда анча-мунча сўзларни гапиргансиз, у ҳам бекордан-бекорга тинглаб турмагандирор... Албатта, бир мақсади бор. Чувимиз чиқмасдан отни чуҳлайлик! Менимча, Темур бу ишдан хабардор бўлди. Шу-

нинг учун ҳаммамиз Темурнинг олдига борайлик, масалани бошқача тушунтириб, ҳечкурса унинг ғазабидан қутурайлик... Зотан, шу ишни қылганимдан ўзим ҳам пушаймонман, ахир уни ўлдиридим нимаю ўлдирамадим нима, ҳеч бир фойдаси йўқ, ҳеч!..

Қоя Алп ўртага отилиб, унинг сўзини маъқуллади:

– Тўппа-тўғри, бундан бошқа чора йўқ, дўстлар! Қочайлик қутурайлик!

Бари чодирдан чиқишиб, отларига сакраб минишди. Орқаларидан бир неча хизматчиларини ҳам эргаштириб, мальун бир тўда ҳолида отларини учиртириб, қоча бошладилар.

* * *

Қуёшли бир кун. Самоларда, унда-бунда оппоқ булат парчалари учеб юрибди. Ерда эса, номига бўлса-да, бирор қўлка деган мўъжиза кўзга ташланмайди.

Ҳар ёқ қуёш ҳароратидан ёнмоқда, жазирамада қовурилмоқда. Ўрдugoҳдан ярим кунлик масофа узоқлиқдаги Туғлук Темурнинг пойтахтида эса камоли азму иқбол ила шодумонлик ҳукмрон.

Туғлук Темур самовий ва беҳиштий тахтида ўтираракан, аллакимни интизор қутаётгани, сабрсизланаётгани ва сикилаётгани кўриниб турарди.

Хизматчилардан бири келиб, унинг ҳузурига кирмоқ тилаган икки-уч кишининг мунтазир эканлигини билдириди. У киришларини амр айлади. Хизматчи чиқиб кетди ва бир муддат сўнгра қайтиб:

– Кирсалар бўлурми? – деди.
– Бунга келтир уларни! – деди Темур Туғлук.
– Бош устига!

Хизматчи шундай дея ташқари чиқди ва сўнгра ичкарига Сулаймон, Қоя Алп ва бошқа фитнадошлар кириб келишиди. Туғлук Темур хизматчиларига:

– Бизни ёлғиз қўйинг! – дея буюрди.
– Бош устига! – дея хизматчилар ташқарига йўналишиди.

Ёлғиз қолишгач, Туғлук Темур келганларни сўроққа тутди:

- Нима бўлди? Нега бунақа тўдаланиб келдингиз?
 - Дўстлари сен бир нима де, дегандай Сулаймонга қараши.
 - Тақсир, – деди Сулаймон, – биз билан бирга беш юз киши келди, Темурдан қочишга мажбур бўлиб қолдик...
 - Нега?
 - Темур қилган ишимиздан хабардор...
 - Демак, бу ишда менинг ҳам қўлим борлигини у биладир?
 - Йўқ, тақсирим! Темур содда бир йигит. Унинг бу ишдан хабардорлиги шундаки, унинг одамларидан бириси тасодифан бизникларнинг чодирда гаплашиб ўтирганини эшитиб олган ва қотилнинг бизлардан эканини сезиб қолган; у бориб Темурга шуни билдирган, холос.
 - Демакки, Темурни мен ҳалиям қўғирчоқдай ўйната оламан. У ҳолда, шуни била туриб, бу ерга келмоғингиздан мақсадингиз – мени ҳам фош этмоқ, сиз билан биргалигимни кўз-кўзламоқ, шундоғми?
 - Йўғ-э, тақсир, биз бу ерга фақат марҳаматингизга сигиниб, сиздан паноҳ тилаб келдик! Табиийки, ҳимоятингиздан умидвормиз...
 - Ҳозирча сизга изн бердим. Мен билан бирга бўлсангиз (фақат буни ҳеч ким билмаслиги керак), яқинда вазир Қазаган замонида саркашлигини бошлаган ерлардаги аҳолини ўзимга тобе этмоқ, бошқа баъзи ерларни ҳам итоатимга олмоқ ва аввалги қудрату шавкатимга эришмоқ учун катта юришга тайёргарликка киришурман. Ўшанда бизга қўшилишга имконингиз бор.
 - Раҳмат, тақсир!
 - Темурга эса ҳеч бир ғаразим йўқ. Фақат, кўрамиз, кела жакда даврон бошимизга неларни согтай.
 - Тақсир, унинг сизга қарши исён кўтариши аниқ...
 - Ўшанда кўрамиз!
- Туглуқ Темур шундай дея бир ишорати-ла хизматчини чорлади, келганларни кузатиб қўйишни буюрди. Улар чиқиб кетганидан кейин:
- Ана, ишлар мундоқ бўпти, Қазаган бобо! – дея мамнун жилмайди. – Мен босиб олган ерларимни қайтиб олиш учун ҳеч недан қайтмайман! Ҳеч не, ҳеч ким бунга моне бўлолмас! Агарда қуёвинг Темур ҳам менга қарши заррача осийлик кўрсатса, бош кўтарса, боши кетадир, эҳ!..

Сўнгра яна хизматчини чорлади. Унга:

– Энг чаққон чопарларимдан бирини тезда бунга юбор! –
дея амр этди.

Бироздан сўнгра ичкарига чопар кириб келди. Туғлук Темур ҳузурида арзи эҳтиром айлади. Туғлук Темур суюниб ўтирган ёстифи остидан бир ҳамённи олиб, унга узатди ва шундай деди:

– Ҳозироқ отга мин! Учганингча қўшинга етиб бор! Темурга учраш. Қайнотасининг ўлдирилиши муносабати билан унга ва хотини Тоштуғой Турканга таъзиямни билдир. Мовароунинаҳр ўлкаси бошқарувини унга топширганимни етказ! Турган еридан ҳеч ёқقا жилмасин. Мен уруш бошлаяпман, ундан анчагина хизматлар талаб қилурман. Тез йўлга туш!..

– Бош устига! Бу сўзларни фақат Темурга айтайми?

– Ҳа, фақат Темурга айт!

Чопар султон Туғлук Темурнинг этакларини ўпиб, ташқарига чиқди. Султон деразадан унинг отига миниб, ошиқич йўлга тушганини кўрди.

* * *

Мўғул саркардаси султон Туғлук, эски мўғул оталидан ўтган қонидаги ўжарлик, қайрилмас шиддат билан Олмалиқдан Самарқанд устига юрди.

Туғлук Темур барча режаларини унутиб қўйган рассомдай иш тутганича йўлида учраган ҳар нени ёқиб, йиқитиб, теваракка даҳшат сочиб борарди.

Унинг аскарлари шу ерлик турклардан ташкил топганди. Ораларида мусулмонликка унча аҳамият бермайдиганлари, талончилар ҳам учраб туарди. Бироқ бари Туғлук Темурга садоқатли, унинг бир амрига қонини, жонини фидо қиласидиган, унга ҳаёти билан боғланган жанговарлар эди.

Темур амридаги вазир Қазағанинг аскарлари, султон Туғлук қўшинининг бу муваффакиятли, ўлжага бой юришини кўрар-кўрмас, оғизларининг сувлари қочиб, дарҳол истилочилар ёнига от қўйдилар.

Манфаатчилар орасида Темурнинг амакиси ҳожи Сайфиддин Барлос билан Боязид Жалойирий ҳам бор эди. Темур уларнинг бу ишидан жудаям хафа бўлди. Бу режасиз ҳаракат,

ҳар ерни босиш ва талашга йўналтирилган гаддорона юриш натижасида Туғлук Темур, бир пайт келиб, ўз тифини ёш Темурга қаратиши ҳам мумкин эди...

Шуларни ўйларкан, Темур машваратчиларидан кутбулақтоб Зайниддин Абу Бакр ва нақшбандий тариқати мансуби Саид Шарифлар маслаҳатига кириб, вақтингча қайнотасининг қотилларига қарши урушдан воз кечди, сulton Туғлук Темур билан эса иложи борича яхши муносабат ўрнатишини муносиб кўрди. Бу икки уста маслаҳатчи воситасида ўзини Туғлук Темурга содик кўрсатишга, пайтдан фойдаланиб, ўз аҳволини тартибга келтиришга интилиб, сultonning яқинлари билан алоқа боғлади ва анча-мунча муваффақиятга ҳам эришди. Сulton айғоқчилари орқали аниқланган сирларни Темурга ҳам билдириб турарди. Темур бериладиган ақча ва тортиқларни орттира-орттира сultonning одамларини қўлга киритгани каби бора-бора Туғлук Темурни ҳам ўзига оғдириб олди...

Булар, тортиқлар учун сарфланган ақчаю олтинлар тариқат кишиларидан, вақфлардан йигилиб келарди. Темурни диндор аҳоли яхши кўрарди ва уни доимо қўллаб-қувватларди. Темур ҳам уларнинг ҳусни назарини жалб этишга, кўнглини олишга интиларди. Шу тариқа у киришган ҳар ишида ютуқларга эриша бошлади.

Бир куни Темур хос маслаҳатчилари билан кенгаш қиласкан, сўз айланиб шу гапларга тақалгач, бир маслаҳатчиси ўта ишонч билан шундай деди:

– Сultonning аҳволи қанақалигини билиш учун уларнинг вазиятини кўз ўнгимизга келтириш кифоядир деб ўйлайман.

– Бу хусусда мен ҳам айни фикрдаман, – деди Темур. – Ҳар ҳолда Туғлук алданди.

– Қанақасига алданади?

– Э, шунақаям алдандики, ҳатто қайнотамнинг қотилларини ҳимоятида тута келгани ҳам менга маълум эмаслигига ишонадир деб ўйлайман.

– Менимча, сultonning бунаقا алданиши мумкин эмас, эҳтимоли ҳам файриқабулдир. Туғлукнинг бунчалар аҳмоқликка боришини хаёлимга ҳам келтиролмайман. Аммо сиз бунга муваффақ бўла билдингизми, агарда шу ишни ба-

жарган эрсангиз, амалга ошишини имконсиз кўрганим ва қойил қолганим бу муваффақиятга қандай нойил бўлдингиз?

– Қандай бўларди, бу жараён ўз-ўзидан юзага келди. Султоннинг одамлари нуфузимни жуда юксак тасаввур этишарди ва устунлигimu бойлигимдан кўзлари қамашарди. Олтину тортиқларим юрак-юракларига кириб борганди. Хонга ҳам ҳадияларни ҳеч аямасдан юбордим. Мана энди ким яхши, Темур яхши, ҳар хусусда фикримни сўрайди, райимга қарайди, кўпинча мен айтгандай иш тутишни мақбул кўради. Муваффақият қозониш учун татбиқ этган ўша ҳийлаларни менга сиз ўргатгандингиз-ку ахир. Ҳар ишда доимо диндорлардан, уларнинг таъсиридан ва кўз қамаштирувчи сийму зардан, ҳадиялардан фойдалан, дея сиз маслаҳат бергандингиз-ку!

– Бўлди, қўлга тушдик, биз таслим! Фақат бунчалар оз вакт ичида бунчалар катта муваффақиятга эриша олишингиз хаёлимизга ҳам келмаганди.

– Сиз у йўл-йўриқни, душманга қарши ҳийлани билардингиз. Фақат қандай амалга оширишни аниқ билмасдингиз. Мабодо сиз менинг ўрнимда бўлсайдингиз, бу ишни юзага чиқариш учун фурсат тополмай бошингиз қотарди. Бунга икки баравар кўп замон берилгандаям муваффақият қозонмоқ осонмас. Бир сиёсий ҳийлани амалга татбиқи учун кунлар эмас, балки йиллар ҳам оз. Ўйчи ўйини битиргунча, таваккалчи ишини битиради. Бунақа ишда ҳар доим жасорат, таваккалчилик, олдин ҳужум уюштириш катта аҳамиятга молик. Мен худди шундай қилдим. Ўлгунимча мана шундай йўл тутишга қарор қилганман ва ўлгунимча муваффақият қозонишга умидворман. Руҳим, фикрим ҳам урушни бошқарадиган қўлларим каби кучли ва метин бўлиши кераклигини биламан!

– Жуда соз! Кутлаймиз! Сизнинг бу ютуқларингиз биз учун ҳам шарафдир!

– Яна шунисиям борки, султон Туғлук ҳар неки хусусда менинг қарашимни ё маслаҳатимни сўраган бўлса, унга айтган сўзларим билан унинг ҳукумати ва манфаатини эмас, ўз муваффақиятларимни қўёладим.

– Ўхў! Бунга қандай эришдингиз?

– Масалан, ҳар доим менга берган амрларини бажарганимни билдириккан, фикру зикримни унинг ватанимдан, Мовароуннахрдан чиқиб кетишига қаратардим. Ҳеч ўйлаб кўрдингизми, Маҳмудшоҳ бу ерларга ўз-ўзича келиб қолдими, Туғлук уни ўз ташаббуси билан бунга жўнатдими?

– Не билайлик, қани, ўзингиздан эшитайлик...

– Бу ишни олдиндан пиширдим. Юртимизда етишган, бу ўлканинг шароитини яхши биладиган, ўз уруғимдан бўлган Маҳмудшоҳ Барлосни сultonга тавсия этдим. Унинг қўмон-донликка кўтарилишига роса ҳаракат қилдим ва ниятимга етдим. Унинг бу мартабага эришувига бу ўлкадаги аҳволни яхши билиши омил бўлди.

– Сизнинг тимсолингизда шу ватанинни қутқариш учун юборилган улуф халоскор шахсни қўрмоқдаман ва қасам ичаманки, шу ондан ўлгунгача сиз ва сизнинг муваффақиятларингиз учун хизмат қиласман!

– Раҳмат! – дея Темур доно маслаҳатчиларига эҳтиромини изҳор этди.

Шундай қилиб, Темур уруғдоши Маҳмудшоҳни қўмон-донликка тайинлатган кунларда сultonга баъзи хирожларини тўлай олмаган мулк эгалари саросимага берилиб, борбудларидан айрилиб қолиш қўркувсига тушган, ётиб қолгунча отиб қол, қабилида иш тутиб, қипчоқ босқинчилари устига ҳужум уюштиришган ва қипчоқлар орасида талатўпу исён чиқаришган эди.

Сulton бу кўзғолонни бостириш учун Мовароуннахрдан келадиган даромадга кўз тутаётганди. Ҳолбуки, Туғлук истасаю истамаса, бу ўлкани идора эта оладиган энг мақбул шахс Темур эди.

Темур ҳам уламонинг хурматини, ҳам аҳолининг муҳаббатини қозонганди. Жасорати, маҳорати туфайли ҳукумат амалдорлари ва сulton наздида катта мавқега эга эди.

Сultonнинг буйругига кўра Темур Мовароуннахрга волий этиб тайинланди ва қўлига ҳокимлик муҳри, амрига ўн минг кишилик қўшин топширилди.



IX. ФАЛОКАТ

Еру кўкни қалин туман ва кўз-кўзни кўролмас бир зулмат қоплаган мудхиш, қўрқинчли кеча... Замину самовотни тўлдирган бу бўғиқ ҳаводан қандайдир фалокатнинг сассик қўлансаси анқийди, шамоллар ўлим бадбўйини келтираётгандай, атрофда бир жаҳаннамий қоронгулик ҳукмфармо...

Мана шундай ваҳимали, зим-зиё туннинг қоронгу зинданда, унинг қора қумларида вишиллаб судралган илонлар каби икки-уч кишининг изғиб бораётгани шарпаси сезилади...

Бу ерлар Темур ҳокимлик қилаётган Мовароуннахр ўлкаси чегарасига яқин бир макон. Бу қумлик водийда кичик-кичик тепаликлар кўзга ташланади. Тепаликлар панасида писиб ётадиган қароқчилар бундан ахён-ахёнда ўтадиган йўловчиларни тунаб, қашқирлардай кун кечиришади. Ҳалиги қоронгиликда тимирскиланиб юрганлар итларни дай ўт-кир кўзлари билан туманликда бир отлиқнинг келганини илғашди. Дарҳол олдиндан тайёрланган пастқамликка ўзларини олиб, писувда кута бошлишади. Отлиқ эса, ҳеч нарсадан хабарсиз ўлида давом этарди...

Ҳалиги пастқам ёнидан ўтаётганида бўйнига бир нарса келиб тушганини сезди...

Қароқчи унинг бўйнига каманд отганди. Отлиқ бечора гупиллаб ерга йиқилди, нима бўлаётганини билолмай ҳам қолди, ўзини у ёққа-бу ёққа урди, типирчилади, бироқ кўксига ва бўйнига урилган икки-уч ханжар зарбасидан кейин мангуга тинчили-қолди.

Йўлтўсрлар заволли ўликнинг уст-бошини тинтиб кўришди, бироз пул ва қўйнидан мактуб чиқди. Хат араб ёзувида, бу ўлкада пахтадан ишлаб чиқарилган қофозга битилган эди. Қотиллар йўловчининг ўлигини судраганча олдиндан тайёрлаб кўйилган чуқурга олиб келиб ташлишади ва бирпасда уни кўмиб, жиноят изини беркитишиди. Сўнгра жасад

кўмилган ерни ҳар эҳтимолга қарши яна бир бор кўздан кечириб, ўлжасини овлаган қашқирлардай қоронгиликда, туман орасида ғойиб бўлишиди. Бироз юришгач, қурбон кетган одамнинг отини етаклаб олган қароқчи:

- Яна қанча юрамиз, тонг отиб қолди-ку, – деди.
- Тўхташ йўқ! – деди бошқаси. – Темурнинг ерларидан чиқиб кетгунча юришга мажбурмиз.
- Ҳа, шундай қилганимиз тузук. Шундай иш тутишимиз нисбатан хавфсизроқ ва қутулишнинг йўли ҳам шу.

Йўлда давом этишиди. Бир муддат ўтгач, учинчи кимса шундай деди:

- Бу кечани шу атрофда, эронлик Хизирнинг уйида ўтказсан, нима дейсизлар? Унинг жойи Темурнинг ерларидан ташқарида. Менга қолса, шундай қилиш керак.
- Жуда яхши. Ўзиям итдай чарчадик. Манави ҳайвонниям бизга фойдасидан кўра зарари тегди, ҳеч йўлимиз кўпаймади.
- Келишдик. Қани, ўша ёққа жўнадик!

Қароқчилар гайрат билан йўл босиб, ўн дақиқадан сўнгра эронлик Хизирнинг уйига етиб боришиди.

Дарвозани тақиллатиб, очтиришиди ва ичкарига киришиди. Эронлик Хизир ҳам йўлтўсарларга ўхшаган, қоронгида кун ўтказадиган заҳарли илонлардан эди. Фақат у қароқчилардан ақллироқ эди, ўқиш-ёзишни биларди. Бу хилват, гадойтоп-мас маконга ҳийлагарликда янада етукликка эришиш ва зийрак кўзлардан узокроқда туриш ниятида келиб қолганди. У бунақа аҳмоқ қароқчилардан бир нечасини ҳар бармоғида ўйнатарди-ю, бироқ бу найрангини ёнидаги бирор кимсага сездирмасди.

Эронлик Хизир йўлтўсарларни қани-қани қилиб кутиб олди ва хонага олиб кириб ўтқазаркан:

- Шу кечаси ов бароридан келибди-ёв, кўзимга жуда бойигандай кўриняпсизлар, – деди синчиклаб.
- Э, гўр бўлармиди, – деди қирриқ қароқчи. – Қанчалик бойиганимиз маълуммас, ҳали ўлжага тузук-куруқ қарамадик ҳам. Кўрайлик-чи, киши бошига қанчадан тегаркин?
- Э, олинг унда, мен тақсим қила қолай! – деди Хизир.

Йўлтўсарлар ўлжаларини чолнинг олдига тўкишиди. Нарсалар орасида ҳалиги мактуб ҳам бор эди. Қария хатга зийракларча кўз ташлаб, ўғриларга билдирамасдан дарҳол уни

бир ёққа айириб қўйди. Ўртадаги ўлжани, пулларни тақсимлади, сўнгра мактубни қўлига олиб:

– Шуям меники бўлсин! – деди. – Биласизки, мен шунаقا нарсаларга қизиқаман. Ўзи, бундайин эски-туски қофознинг сизларга ҳеч кераги йўқ деб ўйлайман.

– Э, отахон, олавер! – деди бир қароқчи.

– Зотан, биз уни отиб юбормоқчийдик, – деди бошқаси.

– Бизга фойдаси йўқ қофознинг нима кераги бор, ортиқча юк! – деди учинчиси.

– Тўғри! – деди чол. – Сизлар учун бу ташлаб юбориладиган кераксиз нарса, ортиқча юк! Аммо мен уни Эронга юборсам, бирор қимматга эга бўлиши мумкин. Шу боисдан, уни менга берганингиз учун сизларга ташаккур билдираман.

– Э, отахон, шу сеники, олавер!

– Гапиришгаям арзимайди-ку бу! Э, эзвордиларинг-да...

– Хў, қулоқни единг-ку, нега бақирасан?!

– Ўчир! Нега томогингни йиртасан? Бўғиб қўяйми ё!..

Қароқчилар ўртада тақсим қилинган ўлжага қаноат қиласдан, бир-бировиникидан кўз узолмай, феъллари айниб турганди, дарҳол даҳанаки жангга киришдилар. Сал бўлмаса ёқалашиб кетишарди-ю, Хизир:

– Э, қўйинглар, ўзларинг жўмард одамларсизлар, арзимас нарсага жиқиллашманглар, – дея уларнинг шаштини қайтарди. – Биламан, менга жонларингниям фидо қиласизлар. Бўпти, мен энди борайин, сизлар ҳам дам олинглар.

Хизир қароқчиларни ўз ҳолига ташлаб, хонасига кирди-да, қўйинидан мактубни олиб, индамасдан кўз югуртирди. Сўнгра бирдан:

– Эй воҳ, Темур! Бошингга фалокат тушибди-ку!.. – дея ҳайқириб юборди.





X. МАКТУБНИНГ СИРИ

Темурнинг фавқулодда иқтидор эгаси эканлигини англатган ва унинг келажаги учун хизматини аямасликни ваъда қилган икки зот бор эди: уларнинг бири нақшбандийлар тариқатига мансуб Саид Шариф, иккинчиси Темурнинг бош маслаҳатчиси, кутбулақтоб Зайниддин Абу Бакр эди...

Бу икки зот барча одамлари билан биргаликда Темурнинг истиқболи учун хизмат қилишарди ва унинг иқболи учун қуюнишиб, жонбозлик кўрсатишарди.

Бир ойча олдин бу икки зот Темур ҳаётидаги муҳим масалалар мавзусида маслаҳатлашиб ўтириб, тортишиб ҳам қолишганди. Ўшанда Саид Шариф:

— Темурнинг бунчалар қисқа вақтда ҳоким бўлиши тақдирдан. Унинг толеси шунаقا, менимча. Аммо ҳар нарсага тайёр туриш ҳам керак. Зотан, ҳар қанака одам тақдиридаги саодатдан юз ўтира олмаганидек, пешонасига ёзилган фалокатдан ҳам кутулолмайди ва ўзи йўқ толени бор қилиш қийин... — деди. — Менинг фикрим шу: агар тақдир лойиқ кўрса, Темур буюк бир султон бўлса бўлаверадир. Мабодо тақдири бошқача эрса, биз қанча хизмат қилмайлик, қанча уринмайлик, хеч иш чиқмайдир...

— Тўғри, жуда тўғри! Фақат тадбирда қусурга йўл қўймаслик даркор! Эҳтимолки, тақдир ўша саодатга эришиш учун тадбирни шарт этиб қўйгандир. У ҳолда Темурнинг муваффақияти учун нечун ҳаракат қилмаслигимиз керак? Нечун фалокатга йўлиқса йўлиқаверсин, дея индамай ўтиришимиз лозим? Темурнинг подшоҳ бўлиши тақдирда ёзилмаган эрса, унда кичик бир муваффақият туфайли шундайин ҳокимликка тайинланишига не дейилур?..

— Воқеан, бу ҳокимлик унинг келажакка отган илк одимидир! Фақат толесининг порлок нурларидан кўзи қамашса, Чингизона қаҳрамонлик хаёлотига берилиб кетса, у вақтда

мағлуб бўлур. Зотан, унинг кураши энди бошланмоқда, у эндигина майдонга тушди...

– Ўйлашимча, Темур бутун умрини халқнинг ҳукмдори бўлиб ўтказадир. У бутун ташаббусоти, ижрооти – қиладиган ишларининг ҳисобини беришни, халқ олдидаги масъулиятини доимо назари эътиборга олмишdir. Яна шулким, унинг гояси ва ватан истиқболи учун тасаввур айлаган лойиҳаси борким, албатта, унда Бухоро ва Нахшаб томонларнинг бирлашуви ҳам мавжуд...

– Жуда яхши-да! Фақат мақбул вазият ҳануз пишиб етилмаган, у лойиҳадаги ишларни амалга ошириш учун Темур ҳали кўп сабр этмоғи керак!

– Э, бўлмаса-чи? Табийики, сабр этмоқ яхшидир. Темур ҳам шу йўл тарафдори.

– Бу ишлар амалга ошиши биланоқ, мана, кўрасиз, турклар ва мўғуллар билан Чингизхон ўртасида тузилган битим ҳукмлари ўз кучини йўқотадир. Чингизхон қўл остидаги муқаддас Чин салтанати ҳам аввалги қуввати ва эътиборидан айриладир, парчаланадир, ана ундан кейин Осиёда бир неча кичик давлатларнинг пайдо бўлишига ҳеч кимса монелик эта олмайдир!

– Буни кўп яхши айтдингиз. Фикру қарашларимизда ўхшашлик, бирлик борлиги каби Темурнинг мулоҳазалари ва тушунчалари ҳам бизнигига монанд ва иттифоқдир, у ҳам кўп нарсани биздек ўйлайдир. Зотан, ҳеч бир замон, ўзингизга ҳам яхши аёнким, Темур уламонинг насиҳатиндан қочмади, доимо бизларни ўзига маслаҳатчи деб билди.

– Тўппа-тўғри. Бу хусусда Темурдан кўнглим тўқ. Хар бир ишга оқилона тадбир ила ёндошаётгани ҳам бунинг далили эмасми ахир. Мен унинг ўзига ҳам иқболи баландлигидан, келажаги порлоқлигидан сўйлагандим. Аммо олдиндаги юқсак мақсад шошқалоқликни кўтармайди, буни унутмайлик.

– Тўғри, бу азим мақсадга восил бўлмоқ учун биргина жасоратнинг ўзи етмас. Бироз диққат билан ҳаракат қилинса, сабрни йўлбошловчи ва йўлдош этилса, ҳар ҳолда, Темур кўзлаган гоясига эришгай, иншооллоҳ.

– Тўғри, худо хоҳласа, шундоқ бўлгай. Хусусан, яна бир масала бор. У ҳам бўлса, аҳоли кўз ўнгида бир эътибор қозонмоқ, унинг меҳру ҳурматига эришмоқ. Мухими, буюк

ғоялар йўлига тушган зот энг аввал эгаллаши шарт бўлган яна бир нарса борки, бу ўйин аталур! Қачон, ким билан, қандай ўйнашни ўрганиб олгач, бошқа ишлар енгил кўчгай. Чунки у қаерга бормасин, йўлдошлар ва ёрдамчилар бўлгай. Қаердаки бирор хатар ё фалокат ёпишса, уни қутқарадиган, ҳеч курса, битта одам топилгай. Ана энди мана шу нарсага дикқат қилинг: юқоридаги ҳолатларда вазият, чегара аниқ. Аммо буни уруш билан муқояса этмоқ мумкин эмас. Урушда жуда кўп одам қатнашади. Кўпчиликнинг эътиборини қозонмоқ – шу жиҳатдан муҳим.

– Афкори умумийни, эл эътиборини қозонмоқ учун Темур имкони қадар фидокорлик кўрсатмоқда. Бироқ биздан исталаётган фидокорликлар бошқа турлидир...

– Яъни, қанақа?..

– Айни шу хусусда унга ёрдам қилишимизни истайдир...

– Қандайин кўмак бера олурмиз?

– Кўлдан келганича-да...

– Ишонингки, бу борада ҳеч нарсадаң хабарим йўқ...

– Унчалик эмас, лоқайдисиз холос.

– Йўр-э! Темур ҳазратлари мафкурада, одамлар орасида юксак мавқега қай тариқа эришгайлар – мен буни қайдан билайн? Бу ўринда менинг қандай хизматим бўлиши мумкин...

– Тақсирим! Камина қулингиз икки-уч кундирки кўча айланиб, эл тилига қулоқ тутдим, бу юртда анча-мунча дўстларим, таниш-билишларим бор, улар билан суҳбатлашдим. Барига Темурнинг фазилатларидан сўйладим. Энди энг ишончли дўстларимга бутун ўлкада шу иш билан шуғулланишларини тавсия қилгаймен. Бошқа таниш-билишларга ҳам Темурни шундай мақтайнки, уларнинг тилидан ҳам Темур тушмай қолсин.

– Жуда соз! Мен ҳам сиз билан бирга ишга киришавераманда?

– Ҳай-ҳай-ҳай, тақсирим, ўзингизни уринтириб нима қиласиз? Мен йилларча елиб-югуриб, куйиб-пишиб юзага чиқарадиган иш сизнинг шунчаки бир оғиз сўзингиз билан битади. Ҳозирги вазиятда сизнинг биргина сўзингиз кифоя.

– Қанақа сўз?

– Ҳа-ҳа, биргина сўзингиз етарли. Биз олдин Темурга сиёсатда диннинг таъсир кучидан фойдаланишни уқтиргандик, тўгрими?

- Тўғри.
 - Темурнинг сиёсий нуфузга эришмоғи учун қилинадиган ишлар хусусида менинг пишган фикрларим бор. Диний томондан эътибор топиши учун эса, мамлакатмизда дину диёнатда, уламолар орасида олий мавқе ва мақом соҳиби бўлган, авом оммаю бутун халқ этагини ўпадиган сиздай зотнинг олижанобларча ҳиммати кифоят этар!
 - Астағфируллоҳ... Мен сиз айтган гапларни уddeлашим учун нималар қилишим керак, шуни билмайроқ турибманда... Ахир мен сиз каби сиёсат майдонида улғаймадимки, бунақа ишларни осонгина бажараверсам...
 - Тақсирим, бунинг ҳеч осон-қийини йўқ. Зоти олийлари озгина ҳиммат билан бу ишни қила оласиз.
 - Қанақасига?
 - Яъни, лутф этсангиз-да, муридларингизнинг ҳар бирiga Темурнинг фазилатларидан ва дину диёнат йўлида жонфидоликларидан куйиб-пишганидан сўйласангиз ва уларнинг кўз ўнгида уни юксалсангиз – ана шу билан, амин бўлингки, Темур ҳазратлари учун қилинадиган энг катта хизматни ҳиммат-ла бажарган бўласиз.
 - Агарки бунчалик экан, унда икковимизнинг маънавий фарзандимизга айланган Темур учун бундайин арзимас хизматни ҳеч пайсалга солмасдан бажаргаймен...
 - Раҳмат, тақсирим, иншооллоҳ, бу ишни охирига етказгаймиз...
 - Иншооллоҳ...
- Шундай дея Темурнинг икки устози ўзаро келишиб олишиди.
- Зайнiddин Абу Бакр Темурга бу гапларни етказгач, у ўз истиқболи учун илк уруғлар экилганини англаб, устозидан:
- Энди кимнинг олдига борурсиз? – дея сўради.
 - Олмалиқда менинг бир устозим бор, foятда муҳтарам, обрўли зот. Унинг хузурига бораман, этагини ўпаман, дуо оламан. Сўнгра қайтиб, керакли одамлар билан бирма-бир кўришиш учун сафарга чиққаним яхши деб ўйлайман. Бу мевали дараҳтни ким экканини кимса билмас...
 - Ишқилиб, ўзингизни эҳтиёт қилинг. Борган ерингизда узоқ қолиб кетманг...

– Сиз унақа шошилманг. Пешонага ёзилганини қўрамиз, хечдан кўра кеч авло.

– Яхши. Шу ватанни қутқазиш учун ҳаракатни бир кун бўлсаям олдинроқ бошлаганим дуруст.

– Маъқул. Энди мен борай...

Зайнiddин Абу Бакр ўша кунданоқ ишга киришди.

Сайд Шариф ҳам муридларига фоятда аҳамиятли, таъсирли ваъзу насиҳатлар қилди. Иккаласининг уринишлари ҳам бир хилда яхши натижалар берди.

Зайнiddин Абу Бакр сафарга кетгандан кейин Темурга ундан бир неча мактуб келди. Доимо Темурнинг келажаги учун қайfurган устознинг хатлари ақлу ўгитга тўла эди, уларда Темурнинг қандай хатти-ҳаракат қилиши кераклиги очиқ-ойдин кўрсатилганди. Шунинг учун ҳам Темур мактублардан айри яшолмай қолди.

Бир куни икки-уч киши водийда кетаркан, қон изларига қўзлари тушди. Улар издан бориб, қабрни очишиди ва ўлдирилган одам жасадини Темурга олиб келишди.

Темур ўликни таниди: у Зайнiddин Абу Бакр билан ўзи орасида хат ташиб юрган хабарчи эди. Дарҳол қотилларни топиш борасида буйруқ берди. Маълум бўлишича, қотил қароқчилар чегарада яшайдиган эронийнинг уйидаги қўноқ бўлишган, сўнгра ўзаро жанжаллашиб қолишган, иш бир-бирларини ўлдиришгача бориб етган. Фақат биттаси яраги ҳолда кутулиб қолганмиш, бироқ қаерга кетгани мавҳум.

Темур Зайнiddин Абу Бакрнинг хати Туғлук тарафдорлари қўлига тушса қандай фалокатлар юз беришини ўйларкан, буни сир тутишга қарор қилди. Эронлини қидиртириб топтироммагач, устозига хабарчи йўллаб, вазиятнинг нозиклигини тушунтириди ва сўнгги хатини қайтадан юборишини сўради. Эртасига мактубни олди, ўқиди ва унчалар таҳлика йўқлигини англаркан, кўнгли тинчиди, бу масалаларга ортиқ эътибор қилмасликни муносаб кўрди...

Хуллас, эроний Хизирнинг қўлига тушган мактуб шу эди...

Шу воқеадан уч кун ўтиб, Туғлук Темур ўз саройида Қазаған вазирнинг қотиллари билан сухбатлашди. Бу фитначи иблисларнинг ҳар бири унга Темурни роса ёмонлади, турли ёлғон-яшиқни сўйлаб, ҳатто уни хоинга, қўлидан иш

келмас ландавурга чиқариб, султон қўз ўнгидаги Темурни ерга уришиди:

— Султоним, сиз бизга ишонинг, шу кетишида Темур тахту хукмронлигингиз учун бир бало-қазо бўлади! Биз қулларингиз уни болалигидан бери биламиз, у ярамас, сотқин, ипириски одам! Темурнинг салтанатга, сизга садоқат кўрсатиши пуч гап! Султонимизнинг энг ожиз қулларидан бири сифатида шуни арз этайки, унга қанчалар лутфу марҳамат кўрсатсангиз ҳам, уни қанчалар суйсангиз ва қанчалар яхшилик қилсангиз ҳам, буларнинг барчасига жавоби гаддорлик ва нонқўрлик бўлишини кўрурсиз...

— Мен Темурни сиз айтганчалик одам деб ўйламасмен, — деди султон Туғлуқ.

— Ана, аттангу афсус дейдиган жойи шунда-да, султоним! Биз-ку, майли, отнинг қашқасимиз: ишимиз яширин, қонли ва таҳликали. Султоним, агар у ҳақда яхши фикрингиз бор бўлса, ҳеч шубҳасиз, бу ўринисиз тушунча тезда йўқолажак! Агарда унга заррача ишончингиз бор экан, билингизки, бу жудаям ачинарли ҳолдир. Чунки у бадкирдор ҳеч қанақа яхши фикрга лойиқ эмас, у фирт хоин, ҳеч қандайин садоқат кутилмайдиган бир манфаатпараст!..

Шунда Туғлуқ Темур сухбатга аралашмай жим турган Қоя Аллга қараб:

— Сиз нима дейсиз? — деб сўради.
— Менимча, ҳар гап очиқ айтилди. Аммо мен уларнинг Темур кучли эмас, деган сўзига қўшилолмайман.
— Шундай денг?

Темур қандай одам, деб мендан сўралса, Темур фавқулодда кучли одам деган бўлардим. Айтиш мумкинки, Мовароуннахр ўлкасини идора эта оладиган амирлар орасида энг нодири у, ундан яхшиси йўқ...

Шу пайт хизматчи кириб, бир эронийнинг султон ҳузурига кириш учун изн истаётганини билдириди. Бу ердаги барча амирлар ташқарига чиқиб кетгач, султон эронийнинг ўз ҳузурига келтирилишини амр этти.

Эроний кириши билан султон ундан:

— Мендан нима тилагинг бор? — дея сўради.
— Жаноби олийлари билан бир хусусда маслаҳатлашмоқчи эдим. Атоқли кишиларингиздан биттасининг сизга

хиёнатини исботглайдиган бир мактуб қўлимга тушиб қолди.
Шу хатни сизга сотмоқчиман...

- Жуда соз! Қанақа мактуб экан?
- Жаноби олийлари, мактуб мана, ичида ёзилган гаплар жуда муҳим. Фақат у сизники бўлмагунча, пулини бермагу-нингизча уларни билолмайсиз...
- Тилагингни айт!
- Жаноби олийлари, озгина...
- Бўларини айт!
- Сардорликка тайинласангиз девдим...
- Бўлди, сен бугундан бошлаб сардорсан!
- Худо умрингизни узун қилсин, сultonим...
- Э, чўзма, мактубни бер! Нега яна тўнкадай қимиirlамай турибсан?
- Сultonим, яна бир талабим бор эди-да...
- Сўйла, нима дейсан?
- Жаноби олийлари, оиласми Эрондан бу ёққа кўчириб келиш ва уларнинг бунда яшашини таъминлаш учун минг ол-тинга эҳтиёжим бор-да...
- Минг олтин сеники, қани, мактубни бер энди!
- Улуф сultonим, яна кичкинагина бир тилагим бор эди...
- Э, лўлидай тиландинг-да, яна нима керак сенга ўзи?
- Анави куни ярадор бўлиб қўлга тушган қароқчининг гуноҳидан кечсангиз...
- Тушунарли...
- Минг раҳмат, жаноби олийлари!..

Туғлук сulton хизматчини чақирди. Унга:

- Бу одамга минг олтин эҳсон этилсин, уни сардорликка тайинланисин, кечаги куни қўлга олинган қароқчи озод қилинисин ва унга топширилсин, – дея буюрди.

- Бош устига, зоти олийлари! – деди хизматчи.

Эроний мактубни икки қўллаб Туғлук Темурга узатаркан:

- Сultonим, мана мактуб, – дея таъзим қилди.

Хизматчи ва эроний ташқарига чиқишиди.

Туғлук Темур мактубни ўқиб, ўйланиб қолди. Унда шу сўзлар битилганди:

«Темур ўәлим!

Сабр қил, болам, ҳукмдорлик фани шартларидан бири сабр ва саботдир. Бошқа бир шарти эса, кўрганингни

күрмәётгандай қилиб ўзингни тутмоқдир. Янаям түөриси, билганингни билмагандай бўлиб кўринмоқдир.

Зайниддин».

Хатнинг маъноси аён. Султон Туғлук бу сатрларда ўзига қарши бирор хиёнат ё ёмонлик белгисини илғамади.

Бир муддат ўтгач, у сал аввал чиқиб кетган фитначиларни ҳузурига чақиртирди ва мактуб билан уларни танишитирди. Бу хатда ўзига зарар келтирувчи ҳеч нима сезмаганини айтаркан, Темурдан шубҳаси борлигини шаъма қилишни ҳам унутмади.

Ёnidаги фитначилар фурсатни бой бермасликка тиришиб, шоша-пиша Темурни ёмонлай бошлашди.

— Зоти олийлари, биз сизга айтувдик-ку ахир унинг чаёнлигини...

— Унинг башарасини очиб ташлаганимизга қарамай, Темурнинг хоинлигини исботлаб берсак ҳам, сиз уни ҳимоя қилаётган эдингиз-а, султоним!..

— Ундоқ эса, мен ҳам Мовароуннаҳр ҳокимлигини ўғлим Иллөсхўжага бердим! — дея фикрини тамоман ўзгартирди султон. — Амрим шу, бугуноқ ҳукмдорлик юритиш учун йўлга чиқсин!

Ҳар бири ўз манфаати учун елиб-юргран, ҳар ишдан ўзига бирор нарса ундириб ўрганган фитначилар бу буйруқдан ҳайрон бўлиб қолишли. Туғлук Темурнинг хаёлида эса «Ховучи қон тўла туғилган» деган ибора чарх урарди ва ичиди бу сўзни такрорларди, аммо буни атрофидаги одамлар эшитмаётганди, албатта.

Султон ҳузуридаги фитначиларга қаттиқ қараб:

— Ховучи тўла қон туғилган ким ўзи? Ким бўлиши мумкин? — дея сўради.

Султоннинг важоҳатидан, бу кутилмаган сўроқдан барча ваҳимага тушиб, зир-зир титгради ва бари бир оғиздан:

— Темур, зоти олийлари! — дея жавоб беришли.

Бу жавобда яширин бир маъно бор эди, аммо буни султон ҳам, фитначи беклар ҳам билишмасди.

XI. СУЛТОН ТУҒЛУҚНИНГ БҮЙРУГИ

Чигатой мамлакати ҳукмдори султон Туғлукнинг ўғли Илёсхўжанинг бошига ҳам бирдан баҳт қуши қўниб, Мовароуннаҳрга ҳоким этиб тайинланди.

Темур ўзининг султон назаридан қолганини англар-англамас дарҳол хушёр тортиди ва устози Зайниддин Абу Бакрга янада қаттиқроқ боғланиб, фақат унинг ўғитлари ва маслаҳатлари бўйича иш тутмоққа киришди.

Масалан, устози ёзган ва султон Туғлук қўлига тушиб қолган ўша мактубнинг такрорий нусхасидаги иккинчи ўғита, яъни ҳукмдорлик шартларидан яна бири «...кўрганингни кўрмаётгандай қилиб ўзингни тутмоқдир. Янаям тўгериси, билганингни билмагандай бўлиб кўринмоқдир» дейилган маслаҳатга амал қилди.

Темур шунинг учун ҳам ҳокимлик ва ҳукумат ишларини лоқайдгина тарк этди ва ўзини фақат ҳарбий соҳага бағишлади.

Ҳолбуки, Илёсхўжа Мовароуннаҳрга йўналаркан, фитначи беклар гурухини ҳам бирга олиб келди. Талончилик қилиб яшашга ўрганган бу одамлар ваҳшиёна гайрат билан мамлакатни ўмаришга киришиб кетишиди.

Кийналган аҳоли арзу шикоятларини айтиб, ҳар қанча фарёду фифон кўтармасин, бу золим ўғрилар зулмидан кутулиш мумкин бўлмаётганди.

Илёсхўжа эса, қўли боғлиқ қўғирчоқдай, ҳар қанақа ҳокимият ва нуфуздан маҳрум эди.

Фитначи ва яғмочи беклар гурухи худди қўй подасига ёпирилган оч қашқирлардай тинмасдан халқни қийратарди, улар кирмаган эшик, таламаган уй қолмаганди. Илёсхўжа бу бўри галаси халқ қонини тўкаётган майдонда қўлидан ҳеч иш келмайдиган жонсиз қўриқчига айланганди...

Агарда ҳарбий ҳокимият Илёсхўжа қўлига ўтган тақдирда ҳам, барибир у ўзи ёнида олиб келган тарафдорларига қарши қилич қўтара олмасди.

Илёсхўжа ўлкани тўлдирган бунча фарёду шикоятларни эшитгани, илғагани билан йиглаётган чорасизларга, еру юртсиз қолганларга, ватани талангандан ва вайрон этилган бу заволли халққа кўмак кўрсатишга имконсиз эди... Йўлидан адашган йўловчидай нима қилишини билолмай гаранг эди.

Бир тарафда ёрдам беради деган умидда ўзи билан бирга олиб келган анави боши бузук, талончи беклар; улар энди унинг сўзига кирмай қўйишган, итоатсиз ва исёнчи тўдага айланган.

Бир томонда эса, айниган, чириган бошқарувчи умаро; улар Илёсхўжанинг сўзини эшитишади-ю, эшитмаганга олишади, ҳокимииятни идора этишда Темурдан ўтиб кетай дея берган буйруқларини бажаришмайди, фақат ўз фойдаларини кўзлаб иш тутадилар...

Бечора Илёсхўжа икки масжид ўртасида таҳоратсиз, овораю сарсон югураётган, аммо бирортасига ҳам киролмаётган бенамозга ўхшарди.

Бироқ Темурни ёрдамга чақиришни ўйласа ҳам чақира олмас, бунга гуури ийл кўймасди. Фитначи беклар гурухининг ўғирлигу талончиликларига эса қаршилик кўрсатолмас, кучи етмасди.

Устига-устак, қачондир отасининг ҳузурида хижолат бўлишини ўйларкан, қўрқувдан асаби бузилиб, вужуди иситмада ёнгандай ўртаниб, дир-дир титрарди...

Ниҳоят, бир ҳийла ўйлаб топди: бутун бу ёмонликлар, талончиликлар ва ўғирликларни Темурнинг устига ағдаради-кўяди!..

Илёсхўжа Темурнинг номидан бир мактуб тайёрлатди-да, маслаҳатчиларини ҳузурига чақириди.

- Ана энди барча муаммо ҳал бўлади!.. – деди.
- Қандай тарзда, зоти олийлари?
- Бироз аввал ҳузуримга бир дарвеш кирди, жуда мухим хужжат келтирибди, ёлғон эмаслиги кўриниб турибди...
- Қанақа ҳужжат экан, олий ҳазрат?
- Ўлкамизда исён ва ғавғо чиқарган боши бузукларга доир ҳужжат!
- Сиз зоти олийларининг бир куни, албатта, муаммоларни мана шундай ҳал қилишингизни олдиндан сезгандик, барча қулларингиз буни билиб юардик...
- Ҳа, бу сафар ҳам ғавғоларни ким ташкил этганини аниқладим.

- Ким экан?..
- Бу мамлакатда барқарорлик, тинчлик ва фаровонлик хукмрон, халқ ҳузур ичида яшаётган, кимсанинг мушугини бирор пишт демаётган бир пайтда...
- Ҳаққаст рост, зоти олийлари, түппа-түғри!
- Буни мен билгандим, бунчалар дод-войнинг сабабини илғагандим. Халқ осиляпти, кесиляпти, таланяпти, эзилиб кетди деган гапларнинг ҳаммаси ёлғон!.. Қани, қани, бирорта мисол келтиринглар-чи? Ёлғон эмасми ахир бу бўхтонлар, тўхматлар?..

Илёсхўжанинг бу ёлғончилигига амирлар ичидан фақат бир киши эътиroz билдириди:

- Халқнинг норозилиги, шикояту фарёдлари бу гапнинг тўғрилигига далилу исбот эмасми?

- Ким у, қайдан чиқди бу жиннича гап!.. Уларнинг у исботлари, у далилларининг барчаси ёлғон! Халқнинг ҳеч қанақа дарди йўқ, ахир бунданам яхши ҳаёт бўладими, айтинг, барака топкурлар! Бунаقا ифво гапларни чиқараётганлар анави аламзада Темурнинг одамлари...

- ЁпираЙ!.. Ростдан-а?
- Роппа-рост! Кўлимдаги хужжат бунинг исботидир! Мана, бу Темурнинг хати, буларни мен ёзмадим...

Маслаҳатчилар тўпланишиб, мактубни ўқишиди. Унда шу сўзлар битилганди:

«Эндиликда мен ўзимни ҳеч нарсани билмаётган-дай тутмоқдамен ва зимдан муҳим бир ишга киришиб, Илёсхўжанинг ўз тобелари томонидан ўлдирилишини кутмоқдамен».

- Зоти олийлари, агар бу Темурнинг амри эрса, буни отангизга билдиришингиз керак, йўқса, ҳаётингиз хавф остида демакдир...

- Мен ҳам отамга бу ҳақда нима деб ёзсан экан, дея сизларни маслаҳатта чақирдим. Фикрларингизни айтинг.

- Жаноби олийлари, бу масалани жудаям тез отангизга билдиришингиз лозим! Унинг ўлимини талаб этинг!..

- Тўғри, сultonимиз амр этсинлар, биз бу ерда унинг бошини кесайлик!

- Бағоят тўғри, унинг ўлимини тилаш муносибидир...

Шу пайтгача бир қарорга келолмаётгандай турган Илёсхўжа, ниҳоят:

— Майқул, мен унинг ўлимини талаб қиласман, — деди. — Кўрамиз, отам не деркин.

Мажлис тугаб, йигилганлар тарқалга, Илёсхўжа отаси Туғлуқ сultonга хат битди. Унда шу гапларни ёзди:

«*Бу ерга келар-келмас эски ҳоким Темурнинг қаршилигига учраб, бошим фитнаю ғавғодан чиқмай қолди. У тинмасдан халқни исёнга ташвиқ этмоқда ва мамлакатда қўзғолон кўтармоқча интилмоқда. Бу фалокатларнинг олдини олиш учун Темурни ўлимга буюришингизни сўраймен, деб*

Илёсхўжа».

* * *

Шу воқеалардан уч кун кейин, Темур мавжуд вазиятни таҳлил этаркан, мамлакатни ортиқ бу шаклда бошқариб бўйлмаслигини англаб, бу бошбошдоқликка чек қўйиш керак, деган қарорга келди. Зотан, ўз кучини, нуфузини кўрсатишнинг пайти етилганди. Ерли туркий аҳолига босқин уюштиравериб жонига теккан айrim ўзбек уруғларига ҳужум қилиб, уларнинг адабини бериб қўйди ва мазлум оммани улар зулмидан кутқаришга эришди.

Бутун халқ Темурни олқишлий бошлади, омманинг ундан мамнунлиги тилларда достон бўлди. У эса севинган халқнинг ҳурмату мақтovларига жавобан:

— Темур ҳам Тангрининг бир қули... — дея тавозе кўрсатар, миллатта хизмат этиш бурчи эканлигини таъкидлар эди.

Бунга сари унга эл меҳри ортгандан ортиб борарди.

Темурни ҳаддан зиёда яхши кўргувчи олиму уламо унинг урушдаги зафару муваффақиятларидан хурсандликларини ичларига сиёдиромлас, омма тўпланган ҳар йифноқда уни мақташар, уни Абу Мансур дея улуғлайлик, дея хитоб айлашарди. Саид Шариф Журжонийнинг нақшбандий муридлари ҳам халқ орасида унинг фазлу қаҳрамонликларидан сўйлашарди, натижада, Темурнинг обрўси ошиб, шуҳрати кенг ёйилиб бормоқда эди. Фитначию қароқчиларга аралашиб қолган кимсалар ҳам, ҳатто рақиби бўлмиш ўзбеклар ичида ҳам Темур тўғрисида фавқулодда самимий, яхши фикрлар тарқала бошлаганди.

Темур Мовароуннаҳрдаги ўз ўрнини мана шундай зафарли муваффақиятлар билан мустаҳкамлаб олган бир чоғда,

султон Туғлук ҳузуридан йўлга чиққан бир отлик аргумогини тўхтамасдан учириб борар, тогу тошлардан, дараю водийлардан, тепалардан ошиб, күш каби манзилга интилмоқда эди.

Отидан, ўзининг баданидан тер қуилаётганига қарамасдан, у ҳовлиқиб ошиқар, бечора ҳайвонни янада тезроқ чопишга ундан, ғаддорларча аёвсиз қамчиларди. У ана шундай тезлик ва шиддат билан оғир йўллардан ҳам енгилгина ўтиб борарди... Суворийнинг бу шавқу шиддати гёё барча маконларни ҳайратга солгандай, улар уни кучоқ очиб кутиб олаётгандай эди. Бироқ ҳовлиқкан отлик бир ерда қўним топишини истамас, макондан-маконга шошилар эди...

Бу шахс султон Туғлук хизматига янги кирган, қалби тоза, ёш, кучли ва жасур, феъли тўғри одам эди. У Мовароуннахрга, кўзлаган масканига етгач, соқчиға амирни кўрмоқчи эканлигини айтди. Соқчи эса уни Темурнинг ҳузурига етаклади. Чунки Илёсхўжанинг оти бор-у ўзи йўқдай эди, бечора мамлакат ҳокими аталса ҳам, заррача обрўси қолмаганди. Агар у олдин Темурнинг ўлимга буюрилишини истаб, отасига мактуб ёзмaganдайди, кейин юз берган воқеалардан сўнгра, ҳеч шубҳасиз, Тангри таолодан Темурнинг жаҳаннамга жўнатишини тиларди... Илёсхўжа Темурни шунчалар ёмон кўриб қолганди; аслида, унинг кўнглини ҳасаду нафратга тўлдирган, эсидан оғдираёзган сабаб Темур эмас, унинг қозонган ғалабалари, эришган муваффақиятлари эди...

Хуллас, соқчи хабарчини Илёсхўжанинг эмас, Темурнинг ҳузурига олиб борди. Зотан хабарчи Илёсхўжани танимасди, у амирни кўрмоқчиман, дер-демас, дарҳол Темурнинг олдига киритганлари учун, уни ҳоким дея ўйлаб, қўйнидаги мактубни Темурга узатди.

Темур хатни очмасдан туриб ундан:

- Қайдин келурсен? – деб сўради.
- Султоннинг ёнидан, – деди хабарчи.
- Бу султоннинг буйруғими?
- Ҳа.
- Жуда соз! Чикавер... – деди Темур.

Сўнгра хатни очиб ўқиди. Унда шундай ёзилганди: «Ўелим, сен истаганингдай Темурнинг ўлимига буйруқ берилди. Ҳукмни бажариш эса сенга ҳавола.

Туғлук Темур».



XII. ТАКАЛ БАҲОДИРНИНГ ҚЎШИНИ

Орадан ўн-ўн беш кунча ўтган; Такал Баҳодир қўл остида-
ги ўн минг аскар билан Туркистон жанубидаги тоғлар ичи-
даги оғир йўллардан ўтиб бораради...

Такал Баҳодир – Султон Туғлуқнинг энг атоқли умаро-
сидан бири, кўп жангларда зафар қозонган ёш қўмондон, арс-
лон каби кучли шахс.

Унинг қўшинидаги аскарларнинг аксари урушларда пиш-
ган, айримлари қароқчилар тўдасидан чиқсан, танланган,
халқ ичидаги донғи кетган яғмочи қаҳрамонлардан иборат эди.

Туғлуқ Темур бир куни Такал Баҳодирни хузурига
чақириди.

– Сени ғоят муҳим бир жангта юбораман, аммо мутлақо
ғалаба қозонишинг шарт! – деди.

– Урушда ғалабага эришиш толе ва қисматга боғлиқдир,
султоним, – деди у.

– Нима қилиб бўлсаям шу жангда ютиб чиқишинг шарт! –
дэя таъкидлади султон.

– Бизнинг қўлимиздан келадигани шуки, жангда зафарга
эришиш учун эҳтиётлик билан ҳаракат қилиб, бор ҳийлаю
жасоратимизни ишга солиб, юришни бошлашдир...

– Мен сенга жанг деяпман! Бу уруш олий мақсад йўлида
қилинмоқда, шуни бил!

– Бу уруш кимга қарши ўзи?

– Шу жанубдаги тоғларни макон этган қабила ва уруғларга
қарши.

– Уларни тору мор эттандан сўнг не бўлади?

– Албатта, у ерлар сенини бўлмайди, сенинг вазифанг –
у қавмни ё асир олишинг ва ёхуд қириб ташлашинг, қисқаси
мағлуб этишинг шарт! Фақат шуни бажарасан, қолгани би-
лан ишинг бўлмасин, тушундингми? – деди Султон Туғлуқ.

- Ҳа. Бу ишни бажараман, аммо баъзи шартларим бор... - деди қўмондон Такал Баҳодир.
- Йўқ! Менга шарт-парт дема! Бир амир урушда қиласидан ишини шарт-шароит демасдан бажаришга мажбур! Бажарасан, тамом-вассалом!
- Албатта, бажараман, султоним!
- Вазифангни янада билиб олдинг, қани, энди ишга кириш!..

Такал Баҳодир султон хузуридан чиққанидан кейин урушга тайёргарликни хаёлигаям келтирмади, бемалол айшини суриб ётаверди. Ҳукмдор икки-уч кун куттанидан кейин, унинг нега жангга кетмаганини суриштириш учун одамларига амр берди. Такал Баҳодир эса, кимсага кўринмас, беркиниб олиб, йўналиши керак бўлган бу оғату фавогга боришни хоҳламаганини сездириб қўйишни истарди. Ниҳоят бир куни султоннинг одамлари Такал Баҳодирни топишидди. Тутилган жойида уни қисти-бастига олишиди. Маъмурлардан бири унга:

- Ие, бир қаҳрамон қўмондонга султони амр этса, у буйруқни киши жон-жон деб бажармайдирми? Сенинг шу қилифинг жоизмидир? - деди.

Яна бири:

- Ҳақиқатан ҳам, султоннинг амрига итоатсизлик этиб, катта гуноҳ қилдингиз! - деди.
- Бунинг сизларга ҳеч бир алоқаси йўқ, ишингиз бўлмасин. Ҳа, энди Туғлук Темур ҳазратлари мени чақириларми? - дея сўради Такал Баҳодир.
- Ҳа, тақсир!
- Яхши, сизлар кетаверинг, мен ҳам бораман...
- Афсуски, бу амрингизни бажара олмаймиз...
- Нечун? Менинг сўзимга кирмасдан, ёмон иш қилаётганингизга ақлингиз етмаяптими, а? Мендек бир қўмондоннинг буйруғига итоат этмасдан, сизларни ўлдиришга ҳаққи-хукуқи бўлмаган бир каттаконнинг амрига бўйинсунганингиз, билингки, мудҳиш бир айб! Ҳолбуки, мен, бир ўйлаб кўринг ахир, мени ўлдирмоқ ва йўқотмоқ хукуқига ва тушунчасига эга бўлолмаган бир одамнинг олдига шу чурук аскарлар билан қандай бора олурман ва бу хусусда, Султон Туғлукни-ку қўятуринг, ҳатто шу жаҳоннинг жаҳонгири буюрганда ҳам, унинг уҳдасидан қандай чиқа олурман...

– Түгри айтаяпсиз, тақсир, гапингизда жон бор...

Аввалига Такал Баҳодирга ўдагайлаб, уни султоннинг олдига боришга зўрлаган калтафаҳмлар энди «жуда тўгри айтаяпсиз, тақсир» деган сўзни тақрорлаганларича унинг фикрини тасдиқлашга ўтишди. Такал Баҳодир фикрини давом эттириб:

– Султон Туғлук нечун бошқасини юбормади? А?.. Чунки сиздан бошқа бу ишни қиласидиган бирор кимсани тополмади! Тушундингизми?.. Ҳа, фақат биргина Темур бор эди, бироқ у ҳам... Ҳа, майли. Ана энди сиз ҳам кўриб турибсизки, у бу гавғони ҳал этиш учун муносиб бир қўмондонни танлашга мажбурдир! Хўш, аҳвол шундай экан, нечун менга аскар танлашга руҳсат бермаяпти?!

– Сўзларингиз жуда тўгри, тақсир... – дея чулдурашди вакиллар.

– Унда чиқинг-да, кетинг! Мен ҳам бораман...

– Йўқ, тақсир, биз бу ердан ҳеч қаёқка кетолмаймиз...

– Хўп, унда айтинг, султон мени нега чақиртиряпти?

– Сизнинг нега жангга кетмаганингизни сўрамоқчи...

– Яхши. Модомики, масала шу арзимаган гап устида экан, сизлар энди бунда қолманг, жўнанг, мен ҳам ортингиздан бораман...

– Биз сизсиз ҳеч қайга боролмаймиз, тақсир...

– Нечун?

– Чунки сизни қаердан топсак ҳам дарҳол султон ҳузурига олиб бориш бизга топширилган... Ҳеч не бунга моне бўлолмас, сизни кимса қутқаролмас...

– Мен сиздан кутулишни жуда яхши биламан...

– Бизни ўлдиргандан кейин балки кутуларсиз...

Такал Баҳодир ниҳоят борищдан бошқа чора йўқлигини англағандай бир оҳангда:

– У ҳолда, майли, қани, кетдик, – деди.

Учовлон йўлга тушдилар ва султон ҳузурига чиқдилар. Султон икки вакилга бир ҳамёндан олтин эҳсон қилганидан кейин, энди бораверинглар, дея амр этди ва Такал Баҳодирга бошдан-оёқ разм солди. Сўнгра зардали товушда:

– Асири ва ёхуд бизга сиғинганлардан келтирмадингми? – дея сўради.

- Қанақасига, ҳазратим? — дея ўзини гўлликка солди
Такал Баҳодир.
- Йўқса мағлуб бўлдингми?
 - Қаерда?
 - Сени жангта юборгандим, тўғрими?
 - Тўғри...
 - Нима қилдинг?
 - Мен жангта бормадим...
 - Нечун?
 - Чунки кўриб-билатуриб ўлим ёнига чопмайман, у қадар ақлсиз, тентак эмасман.
 - Султон сенга амр этмоқда!
 - Султон менга амр этмоқ ҳаққига эга экан, мен ҳам шонли бир ўлим топмоқ, бу имкондан фойдаланмоқ ҳуқуқига ноилман. Султоним, бир қошиқ қонимдан кечиб, ўйлаб кўринг ахир: яғмогарликдан бошқа бир иш қўлидан келмайдиган сахрои ҳалқни мен қай усулда идора этиб, у билан қандай жангта кираман? Бунинг учун, тождор зоти олийлариға баъзи шартларим бор, дегандим, афсуски, тингламак истамадингиз; амрингизни бажаришни ортга сурмақдан мақсадим эса, айни дақиқалардаги суҳбат бўлувини тахмин этиб, буни кутаётганим эди...
 - Шартларингни сўйла, — деди султон инсофга кириб.
 - Жангга борадиган аскарларни ўзим танлайман...
 - Жуда соз. Бор, қўшиннинг ичига кириб, истаганингни танлаб олабер.
 - Хўп бўлади, султоним...
 - Ўн минг кишини амрингга бераман...
 - Икки мингта аскарни танлаб олсан, менга ўша етарлидир, султоним, улар билан бирга вазифамни бажарурман...
 - Жуда яхши, унда боравер, тангри йўлингни берсин...
- Туғлук Темур шу сўзларни айтиши биланоқ Такал Баҳодир унинг этагини ўпди. Султон ташқаридан бир хизматчисини чақириди.
- Кўмондонга бир от, уруш анжомлари билан ўн минг олтин берилсин! — деди.
- Шундай қилиб, Такал Баҳодир жанубдаги тоғликларга қарши юришга киришди. Тоғ-тошлиқ, қиялик тор йўллардан

қўл остидаги қўшинини танланган икки минг аскарининг маҳорати билан бир амаллаб олиб ўтди.

Тепалардан оралаб, қояликларга яқинлашиб боришаркан, бирданига гувиллаган даҳшатли товуш таралиб, оёқлари тагидаги ер қалқиниб-ёрилди, барча ваҳимаю чанг-тўзон ичидаголди. Зилзила фалокатидан кутулиб, ҳаяжонлари босилиб, яна йўлга тушдилар. Хужумга киришдилар. Аммо бу сафар хира чанг-тўзонга эмас, ярқираган қаттол қиличларга дуч келдилар. Аскар тум-тарақай қочди. Шу кулфатли дамларда Такал Баҳодир кўксидан қилич зарбаси еб, қони оққанича ерда юмалаб ётарди...

Урушда тоғлиқлар зафар қозонди. Жанг майдонида музаффарлик нашидаси ила кезишаркан, айримлари ярадорларини ва қурбонларини ташиб-тўпламоққа киришган эди.

Такал Баҳодир инграниб, ярим ҳұшсиз ётган ерга бир нотаниш жанговар яқинлашди. Ёвкур товушда:

— Сен бу қароқчиларнинг бошлиғимисан? Султон Туғлук менга қарши сени юборгандими? — дея сўради.

— Ҳа, — дея Такал Баҳодир нотаниш шахсга ўтирилиб қаради.

— Э, Такал, сен-а, сен менга қарши жанг майдонига тушдингми ҳали!.. Шундайми? — дея ғазаб-ла сўради.

Такал Баҳодир қаршисидаги кишини танир-танимас, уни қучоқлаб-кўришмоққа чоғланди, аммо бошини сал кўтара олди холос — кўп қон йўқотганди, мажолсизликдан боши шилқ этиб яна ерга тушди. Нотаниш жанговар яқинлашиб, эгилиб, уни меҳр-ла бағрига олди...

Такал Баҳодир унинг қулоғига шивирлаб, афсусу пушаймонини англатмоққа тиришиди:

— Қондошим, сенга қарши қурол қўтариш... бироқ мен билмагандим... кечир мени... — деркан, оғзидан қони келди. Ҳиқиллаб, нафаси тиқиларкан, сўнгги сўзи отилиб чиқди: — Алвидо, Темур...

XIII. ЎЛИМ ҲУКМИДАН СҮНГ

Султон Туғлук тарафидан битилган ўлим ҳукмининг фавқулодда Темурнинг қўлига тушиб қолгани ҳалқ орасида у ҳақдаги гап-сўзларни кўпайтирди, унинг шуҳратини ошириб юборди. Зотан, Темур қонуний ҳукмдор бўлган Туғлук сultonга доимо содиқ эди, ҳеч қачон итоатсизлик кўрсатмаганди...

Чунки Темурнинг ўзи тўғри ва одил одам эди, жиноят ва пасткашликдан жудаям ҳазар қиласарди, агарда шаръий ҳукмдорга қарши бош кўтарса, эл ичида обрўсизланишини яхши биларди. Шунинг учун ҳам у ҳар замон одамгарчилик йўлида сабит эди.

Аммо энди вазият бошқача тус олганди. Агарда исёнга бош уриб дарҳол қочмаса, ўлдирилиши кундай аён. Зотан ўлим ҳукми битилмиш. Аммо исёndан кейинги виждан азоблари ни кўтариб яшаш ҳам бор... Ҳеч қурса бир тасалли топилар деган ниятда у улуғлар билан маслаҳатлашди. Нақшбандий уламодан бири Сайд Шарифга мурожаат қилиб:

– Ҳолатим сизга аён, ўзимни сақлаш учун бир айб ё исён этсам, жазога мустаҳиқ бўлурманми? – дея сўради.

– Шу аҳволингда жазога тортилмайсан, чунки жонни таҳликага қўйиш шаръян жоиз эмас. Хусусан, агарда сен қочмасанг, ўлдириласан. Шу боис қочганинг мақбулдир, – деди Сайд Шариф.

– Қандай...

– Қандай бўлса бўлсин... Қочиш, исён, яъни бўйсунмаслик... қўзғолон...

– Ҳозирчалик қўзғолон кўтаришга имкон йўқ. Аммо қочиш... ҳа, қочиш ҳам – бўйсунмаслик-ку? Бундайин исёнга ҳаққимиз борми?

– Нега бўлмасин, бор. Барлос сулоласининг нуфузи ва ҳақ-ҳуқуқини улардан қайтиб олиш, барлослар уругини ку чайтириш сизларнинг ҳаққингиз ва вазифангиз эмасми?

— Бунга ҳозирда ҳаққим бўлгани каби келажакда ҳам ҳаққим борми?

— Охираттагча ҳаққингиз бор!

— У ҳолда, мен бу мақсад йўлида ўзимни, бутун умримни бағишлайман! Бироқ сиз бу ишда менга ёрдам берасизми? — дея сўради Темур муҳтарам уламодан.

— Албатта. Биз бу ерда юксалишингизнинг таъмини учун қулай вазият яратишга уринамиз... — деди Сайд Шариф.

Шундай қилиб, сulton Туғлук билан алоқа узилганидан кейин, Темур қиличидан бошқа ҳеч нега суяномасликка қарор берди. Такал Баҳодирни мағлуб этганидан сўнг уч йилга яқин умри қаҳрамонларча жанг майдонларида кечди. Кўрсатган ҳарбий жасорати ва маҳорати билан Мовароуннаҳрда ва ҳатто Эрон тарафларда олий шуҳратлар қозонди. Номи тилдан-тилга ўтиб, машҳури замон қаҳрамонга айланди. Шу билан бирга, аввалги қадрдонларидан айрилмади, берган сўзларига содик қолди, уламолар ва Мовароуннаҳр халқи билан ҳам алоқаю муносабатини янада жисплаштириди. Булар туфайли унинг шавкати ортгандан ортди.

* * *

Шу пайтларда Темур Самарқанддаги уламо Алишоҳдан мактуб олди. Бу хат Темурнинг истиқболи назарда тутилиб ёзилганди. Темурнинг кўзлари истиқтол нашъасидан чараклаб, ўзини қўярга жой тополмай қолди. Азбаройи ҳаяжонланганидан, кўнгли келажак хаёллари билан қайнаб-тошиб, эҳтиёткорликни ҳам унугиб, рафиқасини отининг орқасига миндири-да, Самарқанд йўлига тушди.

Туманли ҳаво атрофга рутубат ва нам ёяр, кўкда оқ булутлар у ёққа-бу ёққа енгил-енгил учар, офтоб эса, рутубатли ҳовургага ўралганича, баъзан кулиб юз очар, баъзан паҳтадай булутлар орасига кириб кетар эди...

Кеча ёқкан ёмгир ерларни, хусусан, Туркистоннинг серҳосил, қизғиш тупроғини лой дарёсига айлантирган, юриш ўта қийинлашган, оёққа ёпишаётган палаҳса-палаҳса лой одим отишга монелик қиласар эди.

Отининг орқасига хотинини миндириб олган Темур шундайин расво кунда, лойга ботиб бўлса-да, керакли манзилга етиб бориш учун ошиқмоқда.

От ҳам чарчади. Рафиқасида истироҳат истаги пайдо бўлганини сезган Темур отидан тушди. Хотинини ҳам ерга индириб, отни ўтласин учун озод қўйиб юборди. Сўнгра қаршидаги дарахтзор сари йўналди.

От ёмғирдан сўнг тирилган, ярқираб яшнаган ўтлоқда яйраб ўтлаб юраркан, Темур ва хотини оёқларининг чигилини ёзиб, дам ола бошлишди. Бироз сухбатдан сўнгра чўзилишди ва кўзлари илинди.

Ярим соат ўтмай нохушланиб уйғонишиди; атрофда шарпалар кезиб юрганини, отнинг олиб кетилганини сезишиди. Бирдан аллакимларнинг шундоққина бошларига келиб, тикка турганлигини кўришиди. Бир кимса совуқ товушда:

– Ўрнингдан тур! – дея буюрди.

Темур ва рафиқаси оёққа турмоққа интилишди, бироқ ти-тиричилаб-тиричилаб ҳолдан тойишиди. Зотан, оёқ-қўллари боғланган, қимирашга мажоллари ҳам қолмаганди. Шунда Темур уларга қаратади:

– Биздан нима истайсизлар ўзи? – дея сўради.

Аммо унга ҳеч ким жавоб бермади. Вужудига ўралашган каманд иплари бўйинни тобора сиқиб бормоқда эди. Нотаниш босқинчилар тўсатдан Темур билан хотинини ел-каларига олиб, бироз юришиди; асиirlарни хуржун мисоли осилтириб отларга ортдилар-да, уловларига миниб, йўлга тушдилар.

Ҳеч бир гап-сўз, чурқ этган товуш эшитилмасди. Азоб-уқубатли бир йўлдан сўнгра бошлиқларининг ҳузурига олиб киришиди. Бурчакда кеккайиб ўтирган бошлиқ – қароқбоши, бир мулкдор бой эди. Бақрайган ва аланг-жаланг кўзига қараганда, унинг шаҳватпараст ва хотинбоз эканлиги кўриниб турарди. Бой Темурга тепадан қараб, камоли фуур билан:

– Бу киминг бўлади? – дея сўради.

– Рафиқам, – деди Темур.

– Қайдан келяпсан-у қайга борасанлар?

– Биз самарқандликмиз. Бироз саёҳат қилмоқчи бўлиб, айланиб чиқкан эдик...

– Ҳозир қайга боряпсанлар?

– Самарқандга қайтаямиз.

– Унда, хўш, бизнинг отларимиз ўтлаб юрган далада нима учун тўхтаб, отларингизни бебош қўйиб юбордингиз?

- Бу мулк сизники эканлигини билмовдик...
- Нега билмайсизлар?..

Бой шу сўзларни айта туриб, имлаб, ўз одамини чақирди, унга Тоштуғойни кўрсатиб, қулогига нелардир дея пиширлади.

- Хўп, бўпти, – деди хизматчи.

Бой нарироқдаги одамларига қараб:

- Буни ташқарига олиб чиқинг! – дея буюрди.

Темур жон-жаҳди билан қаршилик кўрсатишга уринса-да, эплай олмади. Атрофдаги темир панжали ёвузлар бечоранинг боғлиқ қўлларидан тутиб, судрай-судрай чодир ташқарисига олиб чиқишиди.

Бир муддат ташқаридаги кутиб туришгач, ичкаридан эши-тилган буйруққа кўра, Темурни бошқа бир чодирга олиб киришди ва юзтубан ётқизиб қўйишиди.

Темур хотинининг ёлғиз қолганини ўйларкан, юраги санчиди ва зўрга ўрнидан туриб, чодир эшигигача борди. Ташқаридаги, бир неча аёл қуршовида, рафиқасининг ўтиб кетаётганини кўрди. Бир зум кўз-кўзга тушди, Тоштуғой имо билан бироз сабр қилиши лозимлигини англатди. Шунда бирдан Темурнинг боши айланиб, чодир ичида йиқилаёзди...

Бундан салгина аввал, бойнинг чодирида у билан ёлғиз қолган Тоштуғой Туркан эса, ҳеч нарса юз бермагандай, қаршисидаги кимсага лоқайд, иродасига ҳоким, виқор билан жим турар эди. Бундан озорланган бой, газабини хизматкорларига сочиб:

– Бу хотинининг қўлларини нега ечмайсанлар? – дея ўшқирди.

– Тақсир, бу эридан ҳам ёмон, эҳтиёт бўлиш керак! – деди бир хизматчи.

– Еч, эшшаклар! – дея бўкирди бой. – Шундай чиройли вужуд, қўллар каманд ипи орасида эзилиши тўғрими?

- Хўп, тақсир, мана, ҳозир ечамиз...

Хизматдагилар аёлнинг қўлларини бўшатишаркан, қаттиқ ваҳимада бир-бирларига аланглаб қўйишаради. Уларнинг кўзларидаги кўркув машъаласи жуда катта гуноҳларга ботганликларини, қотилликлар қилганликларини кўрсатиб турарди. Улар титраб-титраб каманд ипларини ечишиди ва худ-

пааст, ўзига мағрур бошлиқларининг амрини кута бошлашиди. Бари тиланчидай бўйни букик, муте эди. Ниҳоят:

– Сизлар энди жўнанг! – дея буюрди бой.

Ҳамма чиқиб кетди. Қароқчилар бошлиғи ва Тоштуғой ёлғиз қолишиди. Бой унга ҳурматини билдираётгандай илтифот кўрсата бошлади. Бу Темурнинг рафиқасига умид берди, нималар қилиш мумкин, дея ўйга толди. Ўзи ва ҳёт йўлдоши бу бедаволар қўлидан қутулиши керак. Анави аҳмоқ восита сида бу иш осонлашармикин? Одобсиз кимсанинг оч қарашлари ва шаҳват тўла кўзларини назардан қочирмасдан ўйланаркан, Туркан босиқ товушда, сирли қилиб:

– Кечасини кут... – деди. – Ҳаммаси яхши бўлади. Сен айш-ишрат тайёргарлигини кўравер...

Бу сўзларни эшитган бой бирдан тентаксираб, жинни бўлаёзди. Сўнгра тўфонда қолган эс-ҳушини йигиб, дарҳол хизматчи аёлларни чақириди.

– Бу хотинни олиб бориб, нима деса, айтганини қилинг! – дея уларга буюрди.

– Хўп, тақсир...

– Ҳурматини жойига кўйинглар, бўлмаса кўрасанлар, а!..

– Бош устига, тақсир! Бош устига...

Сўнгра иchlаридан биттасини чақириб:

– Қани, менга қара-чи сен... – деди пастроқ товушда.

– Буюринг, бой ота, – деди хизматчи аёл.

– Сен кечқурунга узум шароби тайёрла! Ёнида керакли ичкиликларни ҳам унутма. Жўна энди!..

Барча чиқиб кетди.

...Худди ана шу пайтда, ана шу ҳолатда Тоштуғой Туркан ва Темур бир-бирини кўриб қолишиди ва хотин эрига ишора билан керакли гапни англатди.

* * *

Ичкилик ва бошқа керакли егуликларни тайёрлаш буюрилган хизматчи қиз бойнинг хотини томон ошиқди.

– Бой ота жаноблари бу кеча жудаям чиройли бир хотин билан ишрат қилмоқчилар, – деди ҳовлиқиб.

– Нима?! Нима дединг?

– Жудаям чиройли хотин...

- Ўша хотин ўлгур ҳозир қайда?
- Хизматкор аёллар билан бирга, сайдарда...
- Тез бориб аёлларга айт, уни олиб келишсин!
- Баш устига...

Бечора қыз югуриб бориб уларни топди ва бу амрни арз этди. Тоштугой бу сүзларни эшитар-эшитмас, дархол ўзича бир режа тузди. Уни пишитаркан, нима қилиш кераклиги ҳақида бир қарорға келди. Барча бойвучча ойимнинг чодирига қараб йўналди. Ичкарига кирилганда, Тоштугой парвосизча юриб олдинга ўтди. Бойнинг хотини унга душманига қарагандай олайиб, ҳирсу газаб билан тикилиб турарди. Тоштугой викор билан бедаво хотинга кўз ташлади, беписанд оҳангда:

– Лутфан тингласангиз, сизга баъзи гапларни арз этмоқчиман, – деди.

– Яхши, қани, айтинг-чи, – деди бойнинг хотини.

– Ёлғиз бўлишимиз керак. Амрингизни кутаман...

Бойнинг хотини ўйланқираб қолди, иккиланди, аммо бир Тоштугойнинг қадди-қоматига, бир ўзига зимдан қараб, хавотирга тушди ва чўзиб ўтирасдан, кўнмаганини англатароқ:

– Сўзингизни ёлғиз менга айтасизми? – дея ўсмоқчилади.

– Ҳа.

– Ёнимга келиб, махфиёна сўйлашингиз мумкин.

– Йўқ, бўлмайди. Шундай гаплар борки, паст овозда айтиш мумкин эмас. Шу учун лутфан илтимосимга қулоқ беринг.

Бойнинг хотини хизматкорларга қаратади:

– Чиқинглар, ҳар ким ўз ишига... – деди.

Ёлғиз қолишгач, икки аёл бир-бирига синчковона назар солдилар. Тоштугойнинг қарашлари меҳрибон, тараддуидли эди. У мулоим товушда:

– Хоним, гапларимни юрагингизда сир қилиб сақлашга сўз берасизми? – дея сўради ундан.

– Ҳа, мен ёлғон гапирмайман, ор-номусли, таг-тугли одамларданмиз.

– Мен кимман, биласизми?

– Йўқ, билмайман...

– Мен эса сизни танидим. Менга яхшилаб қаранг...

Шу лаҳзагача бойнинг хотини қаршисидаги аёлни танимаганди. Аммо, тикилиброқ қааркан, ҳа-ҳа, энди уни эслади. Бирдан довдираб, ўзини йўқотганча:

– Э-э... сиз... сиз... сиз бу ерда... – дея ютқиниб, мул замлиқдан қизарған бойнинг хотини ўзининг эски валинеъматини, Турканни таниб қолди. – Кечирасиз, бу ерда нима ишиңгиз бор эди... Хусусан, хизматкордан олган хабаримга қараганда бошқачароқ...

– Ҳа, шундай. Эринг мени ёқтириб қолди. Гап ташлаб күрди. Эрим Темур қаршидаги чодирда боғлаб қўйилган, ётибди. Уни қутқазиш учун эрингга кечкурунги айш-ишратга ваъда бердим, чолғу ва ичкиликлар тайёрланиши кераклигини, уни хурсанд қилишимни билдиридим. Хуллас, шунаقا гаплар. Бир бало қилиб уни ухлатиб, эримни қутқараман...

– Хоним, ўзи бу ерга нимага келгандинглар? – дея сўради бойнинг хотини.

– Самарқандга кетаётгандик, – деди Тоштуғой Туркан.
– Йўлда ҳордик чиқарайлик деб тўхтагандик. Ухлаб қолибмиз. Ўйғонганда ўзимизни одамларингиз оёғи остида, каманд тузогида кўрдик. Бизни эринг ҳузурига олиб келишди. Мана, Самарқанддан, Алишоҳ имзоси билан хат...

Шундай дея, Тоштуғой Туркан қўйнидан олган мактубни собиқ хизматчисига кўрсатди. Сўнг яна қўйнига солиб қўйди.

– Энди режамизни ўйлайлик. Қани айт-чи, бу ердан қандай қочсак бўлади? – сўради Туркан.

– Не билай... – дея бойнинг хотини тараддуудланди.
– Сен бизга иккита яхши чопадиган от тайёрлай оласанми?

– Бу осон гап-ку.
– Бўпти. Яхши. Яна бир нарса керак... Иккита қурол топасан. Битта йўл кўрсатувчи ҳам.
– Хоним, қўнглингиз тўқ бўлсин. Икки от, қурол тайёр деяверинг. Ўзим сизга йўл кўрсатувчилик қиласман. Чунки бу борада бошқаларга ишониш хатодир, охири фалокат бўлиши мумкин...

– Раҳмат сенга. Унда оқшомни кутамиз...
– Бош устига.
– Ҳа, бизники қаршидаги чодирда, демак... Қандай қилиб қутқазасиз? Қоровуллар бормикин?
– Бу ишга кечкурун киришмоғимизни ҳисобга олганда, менимча, икки қоровулни ўлдириш керак бўлади...
– Керак бўлгач, қилинади-да.

- Агарда қаршилик қўрсатишмаса, боғлаймиз, холос...
- Ҳа, майли.
- Шу, энг содиқ канизакларимдан биттаси бор. Уни чақириб, бу ишда эрининг ёрдамини талаб этсан, қандай бўларкин?..
- Сенинг эринг шуни истаётгандай қилиб айтилса, у одам от ва қуролларни олиб келади, канизак бориб айтса, бас. Аммо сезиб қолмасин-да, ишқилиб...
- Жуда яхши.
- Хўп, у иш осон, аммо бу гапларни Темурга қандай билдирамиз? – сўради Тоштуғой Туркан.
- Уни сиз билдиришингиз керак, – деди бойвучча. – Ҳозир бориб, эрингиз билан гаплашмоқчи эканингизни бой отага айтиб, изн истайсиз, бироз ишва билан, албатта; ўшанда у чидай олмайди ва рухсат беради.
- Жуда соз! Канизакни чақир. Биринчидан, бой отани кўрмоқчи эканимни айт, сўнгра мени тақсирнинг ҳузурига олиб бориш кераклигини буюр. Мен кетганимдан кейин эса, сен бу томондаги ишларни бажар. Майлими?

– Бош устига, хоним.

Бойвучча ташқарига чиқиб, турқи гезарганича, Тоштуғой бой отани кўрмоқчи эканини айтди ва канизаклар чодирига кирди. Барча ўрнидан қўзголди. У энг содиқ канизагига қараб:

- Фақат сен бунда қол, фариштам, – деди.
- Хўп бўлади.

Бойнинг хотини Тоштуғой томонга қараб:

– Сизни кутишмоқда, хоним, кетишингиз мумкин, – деди совук бир адо билан.

– Илоё, кам бўлманг, – деди Тоштуғой миннатдорона товушда ва жориялар тарафга юрди.

Тоштуғой ва хизматчи аёллар биргаликда чодирдан чиқишиди. Нариги чодирга яқинлашганларидан, жориялардан бири бойга хабар берди. Бой ота дарҳол ёнидагиларга рухсат этиб, Тоштуғой хонимга:

- Буюрсинлар, – деди.
- Тақсир, сизни безовта қилдим, маъзур тутгайсиз, – деди Тоштуғой виқор билан.
- Йўғ-э, паризода, нени амр этмоқчилар, буюринг! – деди бой эриб кетиб.

– Ҳеч бир амримиз йўқ, тақсир, аксинча... – деди мулоийим оҳангда Тоштуғой хоним. – Айланиб юриб, рафиқангиз олдига борувдик. Кўп совуқ қаршиладилар. Шунинг учун чодирларида ўтиrolмадик. Ёнларида жоним сиқилди...

– Ҳа, энди, бизнинг ойимча шунақалар, биламан. Афсус... Мен сизни зериктириб қўймаяпманми, хоним?..

- Билмадим... Йўғ-э...
- Кўнглингиздагини очиқ айтаверинг, хоним.
- Сиздан кичик бир илтимосим бор эди...
- Нима экан?
- Агарда рухсат этсангиз...
- Қани-қани, айтаверинг...
- Менинг хотирим учун...
- Э, дангал айтаверинг, ҳеч тортинманг...
- Эримнинг ёнига қисқа фурсат учун олиб боришса, бир кўришсам дегандим...

– Э-э... у бўлмайди. Бўлмайди!

– Сиздек улуғ инсон учун дунёда бўлмайдиган бир иш бормикин... Мен дунёда бундай иш борлигини тахмин ҳам қилолмайман! Шунинг учун, давлатлари соясида, бу хусусда менга бир илтифот этишларини сўрайман...

– Қанчалар сизнинг илтимосингизга бош эгсам ҳам, сўраётган ишингизга изн беришим мумкин эмас!..

– Э-э, шуям сиздай одам учун бир иш бўлдими, ҳазратим! Бир бор жаҳлингиздан тушсангиз, менга шафқат этсангиз ва бир бечоранинг кўнглини олишим учун рухсат берсангиз...

Ўгрибоши бой хаёлга толди. Бундайнин ёқимли муомаладан кейин бош силкиб, хонимнинг гапларини маъқуллади. Ўйга чўмиб ўтиаркан, бироздан сўнгра бошини кўтарди-да, Тоштуғой хонимнинг қадди-қоматига термулганича, юзига қараб, маст бўлгандай:

- Хў-ўп... – деди.
 - Бой ташқаридаги қоровуллардан биттасини чақирди.
 - Хонимни тутқуннинг ёнига олиб бор, – деди унга. – У билан кўришсин. Бирор уларни безовта қилмасин.
 - Хўп, тақсирам! – деди қоровул.
 - Тоштуғой хоним бойга:
 - Раҳмат, миннатдорман, – дея ташаккурини билдириди.
- Сўнгра қоровул билан бирга ташқарига чиқишиди.

Темур қамалған чодирга бориши. У ерда, боғланған ҳолда юмалаб ётарди.

Бу макондаги халқ туркійда құпоп гаплашарди, шириң сарой тилидан ва форсийдан воқиға әмасди. Шуни күзде тутиб, фикримиз атрофдагиларга англашилмасын дея, Темур ва Тоштуғой қоровулға ҳам аҳамият бермасдан, форсийда сұзлаша бошладилар. Тоштуғой әрига:

– Қалайсиз? Үзингизни түппланг, кечкурун қочамиз, мен ишни йүлға қўйдим, – деди. – Аммо сиз ҳам эҳтиёт бўлинг, сезидирмасликка ҳаракат қилинг...

– Бўпти, – деди Темур. – Аммо... бу ишни сен қандай эпладинг?

– Ҳозирчалик буни уқтира олмайман, вақтимиз зик. Кеинин билиб оларсиз...

– Шу одамни йўқотсак-чи... – деди Темур қоровулни назарда тутиб.

– Йўқотамиз... – деди Тоштуғой. Сўнгра қоровулга парвосиз бир товушда: – Сиз бирпасга ташқарига чиқиб туринг, – деди.

– Хўп, бош устига, – деди қоровул хонимга жилмайиб. Сўнгра у Темурга бир кўз олайтириб боқди-да, ташқарига йўналди.

Тоштуғой бор гапни Темурга қисқача қилиб тушунтириди. Чўнтағидан уйқу дорисини чиқариб:

– Мана, буни пиёлага солиб эритсан, у абраҳни беш дақиқада ухлатишига шубҳам йўқ! – деди.

– Яхши, аммо бу ердаги қоровулни нима қиласиз, – дея Темур хотинига маслаҳатомуз боқди.

– Бошқача ҳийла тополмасак, ўлдиришга мажбур бўламиз, ҳар ҳолда. Кошки шундай қилмасак...

– Эҳ, одамлар, одамлар... – деди Темур бошини сараклатиб. – Онт ичаманки, бу чекилган азоб-уқубатларнинг қанақалигини бошқаларга ҳам кўрсатиб кўяман ҳали...

– Хайр энди, – деди Тоштуғой. – Тонг отар-отмасдан келамиз. Тайёр туринг. Оёқ товушларига қулоқ тутинг...

– Яша, хотин, – деди Темур мамнун товушда. – Яхши бор...

Ха, вазир Қазаганинг ўлимидан кейин Темур ва Тоштуғой орасида эр-хотинликдан ташқари, бошларига тушган айрим

фожиалар туфайли бошқача яқинлик ва самимият юз берган эди. Ота-она, қондошлик-қариндошлик муносабатидан күра ҳам ўрталарида бир узилмас меҳр ипи яралгандики, қисқаси, икковлон дунёда бир-бирлари учун ҳар нарса эдилар. Шунинг учун ҳар бир масала устида бир тану бир жондай харат кат қилишлари табиий эди.

Иккисининг ҳам мақсади, фояси вазир Қазаганинг қотилларини ушлаш, жазолаш ва унинг ному шонини қайта тиклаш эди.

Тоштуғой Туркан чодирдан чиқаркан, түппа-түғри бойвуччанинг чодирига қараб юрди. Оқшом чўка бошлаганди. Ана энди Тоштуғой режасини амалга ошириши керак.

Тоштуғой бойнинг хотини ёнига киаркан:

- Қалай, ҳамма иш битдими? – деб сўради.
- Ҳа, битди, – деди бойвучча.
- Раҳмат, менга эски пайтлардагидек ҳурматингни кўрсатганинг учун миннатдорман, – деди Тоштуғой. – Ма, манавини ол, ичқиликларга қўшарсан, уйқу дориси.
- Буни ичкига қандай аралаштирайин?.. – деди хавотирли товушда бойвучча.
- Икки-уч томчи етиб ортади. Кўпроқ қўшилса ҳам, ҳеч зарари йўқ.
- Хўп... Э-э, ана келяпти, мен бориб ишни бажарайин... – деди бойвучча ва ташқарига йўргалади.

Айни шу пайтда чодирга бой кириб келди. Тўғри Тоштуғойга яқинлашмоқчи эди, у бойни фоятда юмшоқ қиёфа ва илтифот ила қаршилаб, сўрига ўтқазиб, дастурхонга айшу ишрат учун керакли буюмларни келтира бошлади. Канизаклар уларни жой-жойига қўярканлар, бой Тоштуғойни сўрекқа тутди:

- Кўришдингизми?
- Ҳа, тақсир. Сиздан жуда миннатдорман. Эсонлик билан, амрингизга хилоф ҳаракат этмасдан кўришдик. Каманд иплари туфайли юзага келган яраларни кўрдим, аммо ип боғларини ечолмадим... – дея афсусланди Тоштуғой. Сўнгра ичкарида сузилган шаробдан бир пиёлани қўлига олиб, бойга узатди: – Олинг, тақсир!

Бой эриб кетди. Ўрнидан туриб шаробни қўлига олди. Шавқ билан:

- Олдин сиз ичинг, мен сизга ичираман! – деди.
- Йўғ-э, сиз хурматли зотсиз, сиз олдин шуни ичинг, хотирим учун... – деди Тоштубой. – Сиздан кейин мен ҳам ичаман...
- Вой дод! – дея бой хитоб этди. – Амр этинг, ичурмиз!..
- Биринчи пиёлани ичиргандан кейин Тоштубой чуқур нафас олди ва қадаҳни тўлдириб, ўзини ичаётганга солиб, шаробни кўксидан пастга тўкиб юборди.
- Бу орада чолғучиларимиз йўқми? – дея ўсмоқчилади Тоштубой.
- Э-э, ҳаммаси бор! Раққосаларимиз ҳам ҳозиру нозир, ғадағанг! – деди бой мамнун товушда.
- Лутфан уларни бу гўзал мажлисга чақиртирсангиз, – деди Тоштубой.
- Бир оғиз сўзингиз, – деди бой. Сўнгра овозини кўтариб: – Чолғучилар, раққосалар келишсин! – дея буюаркан, эснай бошлади.

Тоштубой Туркан унинг ҳозирдан ухлаб қолишини истамаганидан, ортиқча тирғалиб, бемазалик қиласлиги учун бирор сархушу хумор бўлишини орзулаб ўтиради. Машшоғу ўйинчилар келишди, бироз ўйин-кулгу қилишди. Бойнинг кўзлари тобора кичрайиб бормоқда эди.

Шу чоғда Тоштубойнинг хаёлига бир режа келди, тажриба учун уни синааб кўришни мақбул билди.

– Тақсир, бир нарса айтсам, шу, эрим ҳам ўйин-кулгуни, завқли кеча ҳаётини жуда ёқтиради. Уям бир бечора банда, кун бўйи тортган азобу уқубатлари аламини пасайтириш учун уни шу ерга чақирсан, не дейсиз? – деди викору ноз аралаш.

- Нима дейсан?! – деди бойнинг кўзлари чақчайиб.
- Ҳа, энди... Сизнинг меҳру шафқатингиздан хурсанд бўлганимдан, айтдим-кўйдим-да...

Бой Тоштубойнинг бундайин хурматкорона сўзларидан мумдай эриб кетди. Беписанд оҳангда:

- Тутқунни олиб келинг! – дея буюорди.
- Ташқарида бу сўзларни эшигтан посбонлар чодирнинг эшигига югуриб келишди, нотўғри эшигтан бўлмайлик тағин деган хаёлда:
- Нима дедингиз, бой ота? Не амрингиз бор... – дея сўрашди.

– Э, овсарлар, нима деяпсанлар? – дея бой қаҳр ва ҳидат тўла товушда бақирди. – Тутқунни дарҳол келтиринг!!!
– Хўп, тақсир! – дея қоровуллар чопиб кетишиди.

Улар Темур асир ётган чодирга киришди. Олдинига уни безовта қилиб, бироз қийнашди. Сўнгра бойнинг ҳузурига олиб бориш учун ўрнидан турғазишиди. Шунда Темур, нима бўлаётганини тушунмасдан, бошқа ерга кеттиси келмасдан, бир муддат қаршилик кўрсатди. Ўгрилар унинг тирғалишига аҳамият бермасдан, қийнаб-сиқтаб ҳарам чодирга олиб боришди. Боғлоғлик ҳолда бойнинг ҳузурига киритишиди. Темур шошиб қолганди, «Нима бўлдийкин? Билиб қолдимикин?» дея ичида ўйлаб, хавотир-ла ўртанди.

Ичкарига кирар-кирмас, Тоштуғойга кўзи тушди. Кўллари бўшатилди. Коровуллар ташқарига чиқишиди. Темур дастурхонга, айш-ишратга даъват этилди.

Ана холос!.. Темур нималар бўлаётганини билмоқ учун Тоштуғойга қаради. Хотини уни ишора билан тинчлантириди. Демак, ҳаммаси жойида...

Тоштуғой шароб ичаётгандай кўринса-да, аслида, ичкиликни сездирмасдан пастга тўкаётганди. Бой тинимсиз ичар, ширакайф, мажолсиз, уйқусираган кўзларини очишига тиришиб, пирпиратар эди. Ашулачилару машшоқлар, ўйинчилар завқу шавқ-ла ўйин-кулгуни авжга чиқаришмокда.

Тун ҳам яримлади. Тоштуғой шароб тўла пиёлани бойнинг бўғзига тақаркан, унинг сўлжайган ҳолатидан беш дақиқадан кейин ўликдай уйқуга кетишини сезиб, у ердагиларни ҳайдашга амр бердирди. Ҳамма чиқиб кетди.

Чодирда бой ва хотини, Темур билан Тоштуғой, яъни тўрткиши қолишиди.

Бой оғир уйқуга чўмди...

Нихоят, кечанинг оёқлагани, тонг оқараётгани сезилди.
Тоштуғой бойвуччадан:

– Кетишига ҳар нарса тайёрми? – дея сўради.
– Хўп десангиз, атрофни бир текшириб чиқай, – деди сал-пал хавотирланиб бойнинг хотини. – Кейин сизларни олгани келаман.

Тоштуғой унинг фикрини маъқуллаб бош силкиди. Бойвучча шарпасиз чиқиб кетди. Темур ва Тоштуғой бойнинг ҳолига

бокиб, сассиз кулиб қўйиши. Беш дақиқача ўтгач, бойвучча қайтди ва:

— Тинчлик, ҳеч бир монелик йўқ, секингина жўнаб кетаверамиз, — деди.

— Қани, бери кел-чи, — деди унга Тоштуғой меҳри товланиб. Қўйнидан бир тизим маржон чиқарди, аммо шу чоғда ненидир ерга туширганини сезмай қолди. Маржонни бойвуччага тортиқ этаркан: — Манави мендан сенга эсдалик. Доим эслаб юргин. Бўптими? — деди.

Бойнинг хотини миннатдорлик билдириди.

Биргалиқда чодирдан чиқишиди ва эҳтиёткорлик билан орқада турган отларга миниши. Бойвучча кунчиқар тарафни кўрсатиб:

— Самарқанд шу ёқда, — деди.

Отлар қўзғолди. Аммо эндинга ўғрилар маконидан узоқлашишар экан, чодирдан чиққан бир кимса уларни кўриб қолди. У шерикларини ўшқириб уйғотди. Бешта ўгри отларига минишиб, қочоқлар ортидан қувлашга тушдилар. Ана энди фалокат бошланганди.

Жанговар ва жасур Темурнинг бир ўзи майдонда ўн кишига, Тоштуғой ҳам камида беш кишига бас кела олса ҳам, бу ерларда ортиқча вақт йўқотиб, олишиб ўтириш фурсати эмасди. Учовлон отларини чуҳ-чуҳлаб янада тезлатишди. Орқадагилар ҳам қувлашдан воз кечмоқчи эмасди чофи, улар-да уловларига қамчи босдилар...

* * *

Ўзлари ўғрилар қўлига тушган ерга яқинлашарканлар, орқадан қувлаб келаётганлардан биттаси қочқинларга етиб олди. Темур қиличини ялангочлаб, унга ташланди. Зарбадан унинг қиличи ерга отилиб кетди, ўзи қаттиқ яраланиб, думаланиб қолди. Айни чоғда Тоштуғой шартта отидан сакраб тушиб, ярадорнинг белидаги арқонни ечиб, уни боғлади. Бу иш муваффақиятли тугаганди. Аммо иккинчи ўгрининг етиб келиши ўйловчиларни шошилтириб қўйди.

Қочқинларга етишган қароқчи от устида олишмоқни эп кўрмай, дарҳол ерга тушди ва қиличини сермаб, ҳужумга ўтди. Темур қароқчининг зарбларидан қалқон билан ҳимоя-

ланиш жараёнида, пойлаб туриб, уни оёфи билан бир тепди. Рақиб ийқиларкан, чап қўли тагида қолиб, юмалаб кетди ва қайта қўзғолмади.

Орқадаги ўғриларнинг иккитаси баравар етиб келишиди ва бирлашиб ҳужумга киришдилар. Сўнгра бири Темурга, бошқаси Тоштуғойга ташланди. Темур кутилмагандага қароқчининг отига қамчи солди. От қочишга чоғланиб, юлқиниб қўзғоларкан, эгаси чапдастлик билан ерга тушди ва онийдан ҳамла этди. Афсуски, у рақибига яқинлаша олмасдан бошидан қилич зарби еди ва чўзилиб қолди. Темур эса, нарироқда қароқчи билан олишаётган Тоштуғойга ёрдамлашмоққа ошиқди. Ҳолбуки, Тоштуғой рақиби билан бироз олишгач, кутилмагандага отини унинг устига бостириб ҳайдаб, оғзи-бурнини қонга бўяб, абжалини чиқариб улгурган эди.

Орқадан қувалаб келаётган бошқа қароқчи бу вазиятни кўриб, таққа тўхтади. Бир муддат тараддуланиб турди-да, сўнгра отини ортга буриб, учира кетди ва уфққа ёйилган сийрак оқ булутлар орасига сингигандай қўздан йўқолди.



XIV. ЎЗИНГДАН БАЛО ЧИҚСА

Темур ва Тоштугойни қувлаб, олишувдан ёлғиз тирик қайтәётган суворий чошгоҳ пайтида ўз маконига етиб келди.

Бойнинг хотини Фаришта ҳам тутқунларни жўнатгандан кейин, гёё ҳеч нарса юз бермагандай, ўз чодирига кириб, ухлаб қолганди.

Эртасига кечаги кайфу маҳмурликдан кейин боши оғриб уйғонган бой атрофга аланглаб, хумор кўзларини йириб-йиртиб Тоштугойни қидирди. Тополмагач, ғазабга минди. Хотинини, хизматчи аёллар ва ракқосаларни чақиртирди. Асиirlарнинг кочганидан барчаси хабарсиз эди. Бой уларга:

– Нимани қўриқладинглар ўзи?! Шу ерда эмасмидингиз ё! – дея ўшқирди.

Бири унга жавобан, секингина:

– Тақсир, сиз кет дея буйруқ берганингиздан кейин биз чиқиб кетгандик. Чодирда меҳмонлар билан сиз қолгандингиз... – деди.

Бу сўзларни эшитаркан, бадтар ғазаби қайнаган бой энсаси қотиб, ерга бокди. Кўзига бир қофоз илашди. Дарҳол эгилиб олди. Бу Алишоҳ тарафидан Темурга ёзилган мактуб эди. Ўқиди, унда: «Темур, тезда Самарқандга кел. Алишоҳ» деган сўзлар битилганди.

– Ҳа-а... – дея оғир сўлиш олди бой. Сўнгра: – Билиндики, қўлимизга тушган Темур экан... Энди у Самарқандга кетмоқда, шундайми? Э-э, у жононни мен унга бериб бўпман!.. Хали кўрадиганини кўради у! – дея бақирди.

Шу аснода бир отлиқ келганини хабар қилишди. У шитоб билан бойнинг хузурига олиб кирилди.

– Нима гап? – дея тўнғиллаб сўради бой.
– Тақсир, шу, эрта билан энди уйғонгандим... – дея у чайнала бошлади.

– Тез гапир! – дея ўшқирди бой.

- Тонг оқааркан, икки отлиқнинг чопиб кетаётганини кўриб қолдим...
- Хўп, кейин?
- Бироз синчилаб қарасам, кеча қўлга тушган асиirlар экан...
- Ундан кейин нима қилдинг?
- Чодирдаги шерикларимни уйғотдим, биргаллашиб қувиб кетдик...
- Оф-фарин!
- Аммо, тақсири...
- Э, одамга ўхшаб тез-тез гапирсанг-чи!
- Урушдик...
- Яхши-ку!
- Аввал биримиз, сўнгра бошқамиз, ундан кейин иккитамиз уларга етиб бориб, хужум қилдик...
- Жуда соз! Демак, қочоқларни ушлаб келтирдингиз, ҳа-а, қани, олиб киринг уларни ҳузуримга!
- Йўқ, тақсир, кечирасиз, келтиролмадик...
- Нима бўлди?
- Улар билан олишиб, енголмадик... расво бўлдик, енгилдик, ҳамроҳларимдан фақат мен тирик қолдим холос... Мана, қайтиб, тақсиримга билдирай дея қўл қовуштириб турибман...
- Яхши қилибсан, – деди бой ўйланиб. Сўнгра: – Тезда отимни тайёрланг! Мен кетишим керак... Ҳамма ишга сен қараб турасан, – деди хизматкорга. – Ҳали шошмай тур сен, Темур! Агар ўша аёл сенга хотин бўлса, отимни бошқа қўяман!..

Хизматчилар бойнинг отини келтиришди. У уловига минди-да, ўйлга тушди. Хат ҳам чўнтағида. Зудлик билан Самарқанд томонга йўналди. Оқшом пайти шаҳарга кириб борди.

Эртасига султон Туғлук тарафдорлари билан бирга Темурни қидира бошлади. Кун бўйи сўраб-суриштиргач, Темур ва хотинининг Самарқандга келмаганлигига қаноат ҳосил қилди.

Тонг отгач, улар барибир шу ерга келади-ку, дея ўйлади ва яширинча кутишга қарор берди. Ўша куни ҳам, ундан кейинги кунларда ҳам Темур билан рафиқасини махфиёна ахтаришда давом этди. Бироқ на ўша куни, на эртасига, на ин-

динига ва на ундан сўнгги айёмда Темурга оид ҳеч бир хабар эшитмади, ҳеч бир из ва ё аломатга дуч келмади.

Темур эса, бу муддатда ўзи олдинлари ҳам яшириниб юрган бир форга хотини билан бирга беркиниб олганди. Аллақанча тарафдорларини бу форга чақиртириб, қуроласлаҳаю отларни бадастир қилиб, чўлдаги арслонлар тўдаси янглиғ теваракка даҳшат соча бошлаганди. Бу вақт ичида у йўлида учраган айрим саҳро туркманлари билан қақшатқич жанг олиб борди, уларни ҳам, бошқа баъзи бебош тўдаларни ҳам олишувларда ер билан яксон айлаб, сўнгра мағлубларни кечириб, кўнглини овлаб, енгилган гурухлару тоифаларни ўз ёнига тортиб, куч-куватини ошириб олди. Бу минтақада у шундайин донг таратаркан, Темур ҳақдаги ваҳимали миш-мишлар ортгандан-ортар, унинг тарафдорлари ҳам кўпайгандан-кўпайиб борар эди.

Шундай қилиб, Мовароуннаҳрда турклар, эронликлар ва Хурсон халқи аста-секинлик билан Темурга бўйин эгаётган, унинг қудрати ўсаётган бир давр бошланганди. Масалан, атрофдаги тожик қароқчилар бошлиғи Муборакхон ўз одамлари билан бирга илк келиб қўшилганлардан эди. Ўшанда Темурнинг кўли остидагилар сони икки юз кишига етганди.

Темур йифилган жанговарлар билан бирга анчагина ишни амалга ошириш мумкинлигини мўлжаллаб, барча билан кенгашмоқ ниятида қурултой тартиб этди. Бу йифноқда яқинларидан Ўгуз Арслон, қайноғаси Ҳусайн, Муборакхон, Шер Баҳром ва бошқа аллақанча доно инсонлар бор эди. Темур вазиятга оид фикрини шундай ифодалади:

– Ўйлашимча, биз ҳозирги кувватимиз билан эмас, балки келажакда бизга қўшиладиган тарафдор кучлар ёрдамида Самарқандни эгаллашимиз керак.

– Қандай тарафдор? – дея ўсмоқчилади Муборакхон. – Самарқандда бизга қанча одам қўшилиши мумкин?

Ўгуз Арслон унинг бу саволига шундай жавоб берди:

– Тахминан халқнинг ярми.
– Ундай бўлса, бу ерда туришимиз хато-ку? Аммо улар режаларингиздан хабардорми?

Темур энди сўзга аралашиб:

– Йўқ, уларнинг хабари йўқ, – деди. – Аммо биз ишни бошқача ҳал этурмиз. Биринчидан, биз Самарқандга юаркан-

миз, сиз одамларингиз билан Бухорога борасиз. Сиз Бухоро ёқдаги қишлоғу овуллардаги одамлар билан, мен Самарқанд атрофидаги инсонлар билан учрашамиз. Уларни фикримизга, йўлимизга ишонтириб, бир қарорга борамиз. Кейин сизга ишорат бераман. Биргаликда бутун жете халқига, яъни султон тарафдори чигатойларга ва уларнинг волийси Илёсга ҳужум қиласиз. Худо хоҳласа, Мовароуннаҳрни қўлга киритамиз. Қани, энди бир Қуръон ўқиб, дуо этайлик.

Темурнинг қайноғаси ёнида турган Шер Баҳром:

— Мен бу ишларга розимасман, қарорга ҳам қўшилмайман, — деди. — Аммо қаршилик ҳам қилмайман. Модомики, курултой қарори шундай экан, мен энди Ҳиндистонга жўнай қолай... — дея чиқиб кетди.

Бироқ биргина Шер Баҳромнинг Темурдан айрилиши унинг учун катта бир йўқотиш эмасди. Шунинг учун у қатъий, ишончли товушда:

— Қани, биз ҳам Самарқандга қараб юрамиз! — дея ҳайқирди.

Қайноғаси Ҳусайн эса, Темурга қингир қараб, хоинона оҳангда, ичида: «Хўп, қани, юриб кўрайлик-чи...» дея будранди.

* * *

Айни чоғда, Тоштуғой ҳам эри Темурнинг манфаатларини ўйлаб, ўзича режалар тузмоқда, тарафдорларни кўпайтириш учун таниш-билишларини ишга солиб, тадбирлар кўрмоқда эди. Зотан, Темур Самарқанд халқи билан қўришмасдан олдин, бир неча кечани катта опаси Туркан Оқанинг уйида ўтказди. Ана шу вакт орасида келажакда рақибу ёвларига берадиган зарбаларини обдан ўйлаб пиширкан, бошқа бир ёқда Тоштуғой ҳам ўз одамлари билан гайрат кўрсатиб, аҳоли ичида Темур хусусида яхши фикрлар уйғотиб улгурган эди. Аллақанча инсон Темур ва хотини Тоштуғойнинг фазилату иқтидорини тасдиқ айлаб, уларнинг муҳлисига айланганди. Улар Туғлуқ султоннинг Темурга қилган муомаласини инсоғизли деб билишарди. Шундай қилиб, вазиятдан унумли фойдаланган Темур Самарқандда икки минг тарафдор тўплай олган эди...

Темур омма орасида бунчалик эътибор қозонган ҳолда, ҳар ишга шай тураркан, у бир ёндан хотини ва уламонингда диний исён чиқаришларини кута бошлади. Аммо очиқдан-очиқ бу ишларга берилиб кетган Темур, қарангки, орқасидан тушган жосусларни пайқамай қолди. Бир куни унга нотаниш бир кишининг у билан кўришмоқчи эканини билдириши. Темур уни келтиришларини буюрди.

– Сиз кимсиз? – деда сўради ундан Темур.

Нотаниш кимса унинг саволига жавоб бермасдан:

– Сизга айтадиган баъзи сўзларим бор эди, шунга келдим, – деди. – Бундайин очиқдан-очиқ бўйсунмаслик, исёну ихтилоллардан воз кечмагингиз мувофиқдир.

– Нечун?

– Чунки сизни бугун султонга чақишади. Ё бу ердан чиқиб кетасиз ёхуд ўлим ҳукмини бўйинга оласиз, бошқа йўл йўқ.

– Ҳолбуки, менга тобе одамларнинг барчаси содиқдирлар...

– Ҳа-ҳа, содиқлар, ҳатто қайноғангиз ҳам! – деда кесатди нотаниш кимса. – Фақат у душманларингиз ёнида!

– Демак, Ҳусайн менга қарши... – деди Темур ўйланқираб. – Шундайми? Ундай бўлса...

– Ҳа! Ана шу ҳолат, хиёнат ва парокандалик ҳақидаги шум хабарларни султон тарафдорлари халқ орасига ёйиб бўлди. Шунинг учун аҳоли ичидан энди ўзингизга ҳеч бир кўмакчи тополмаслигингизга аминман.

– Яхши. Оллоҳ сизга саломатлик берсин! – деди Темур унинг чиқиб кетишига ишорали оҳангда.

Қайноғаси Ҳусайннинг душманлар томонга ўтиб кетгани Темурнинг ҳузурини қочириб, аҳволи руҳиясига қаттиқ таъсир қилганди. Наҳотки бирорта ишониб бўладиган одам йўқ, деда кўнглидан кечирди у.

Темур ўша оқшом зодагонлар орасидан ўзига яқин элликта отлиқни танлади-да, у макондан қочди ва ташқаридаги қучларини ҳам бир ерга тўплаб, ҳар эҳтимолга қарши, мудофаага шай туришни муносиб кўрди.



XV. ТЕМУРНИНГ ҚАЙНОФАСИ ҲУСАЙН ДУШМАНЛАР ОРАСИДА

Темур қароқчи бойга асир тушиб, ўртадан фойиб бўлган кунларда, унинг одамларини Ҳусайн ўз тахти итоатига олиб, ҳокимияту амрият тотини тотган эди. Аммо Темур қайтадан майдонга чиқиб, иш юрита бошлагач, Ҳусайн хукмронликни яна унга мажбуран бериб, ўзини яқин тутса-да, ўшандан бошлаб юрак-бағри кин, ҳасад, адоват оташида ўртаниб юрганди.

Шер Баҳромни урушга қўшилмасликка ташвиқ этган Ҳусайн Темурнинг порлоқ келажагига моне бўлиш учун хилма-хил ҳийлаю режалар тузишга киришди. Шунинг учун Темур билан бир йўлда юрди, унинг орқасидан эргашиб, Самарқандга ҳам етиб келди. Бу ерда апил-тапил Темурнинг душманлари билан учрашди. Улар билан бирлашди. Душманлар бошлиғига йўлиқишидан олдин Темур ва Тоштуғойни асир этган бойнинг ёнига борди. Унга фитнали оҳангда:

- Биласанми, Темур бу оқшом Самарқандга келди, – деди.
- Ростданми? Ҳар куни кутаётгандим-а, қаёққа кетдийкин деб... – деди бой қувониб. – Демак, ҳозир Самарқандда, шундайми?
- Ҳа.
- Ундай бўлса, тезда султон Туғлуққа хат ёзиш керак!
- Э, албатта-да!
- Унда мен айтиб турай, сен ёз!
- Бўпти, – деди Ҳусайн. Сўнгра қўлига қалам ва қофоз олди. – Қани, айтавер, мен ёзаман.

Шундай қилиб, Ҳусайн, эҳтимолки, Темурнинг маҳвига сабаб бўладиган бир мактубни битишга киришди.

«Султонимиз!

Темур бу ерда халқни исёнга ташвиқ қилмоқда. Фало-катнинг олдини олмоқ учун бу ерга бироз аскар юборилиши муносибдир...

Бир неча имзо».

Хат чопар орқали шошилинч равишда султонга жўнатилди ва ўша кундан бошлабоқ Темур маҳфиёна қўз остига олини. Ҳасадгўй рақибларнинг мақсади Темурни Самарқандда ёлғиз, аскарсиз ҳолда бир бурчакка пистириб, йўқ қилиш эди.

Мана, энди улар кўшиндан ёрдам кутишмоқда...

Кунларнинг бирида, Темурга тарафдор бўлмаса-да, холис бир киши бой билан Ҳусайн ўртасидаги қуйидаги сухбатни тасодифан эшлитиб қолди.

– Бу оқшом хабар келиши керак эди, – деди Ҳусайн.

– Нега кеч қолдийкин, а? – деди бой.

– Билолмадим, шу...

– Зудлик ва интизом билан юборилиши зарур ўша озигина аскарнинг мунчалик кечикиши Темурнинг зафарига сабаб бўлади! – деда бақирди қароқчибоши бой билағонларча.

– Тўғри, буни султон ҳисобга олиши керак эди, – деди Ҳусайн уни айёрларча маъқуллаб.

– Албатта-да! – деди бой. Сўнгра ўсмоқчилаб сўради: – Аммо сиз, Темурнинг қайноғаси бўлатуриб, нимага ундан жуда хафасиз, нега унга қаршилиз?

Ҳусайн унинг саволига жавоб бермасдан, ўзини сўроққа тутди:

– Сиз унга нечун душмансиз?

– Чунки мен уни асир этгандим, қўлимдан симобдай кутулди. Қочиб мени аҳмоқ қилди. Энди кимлигимни унга кўрсатиб қўймоқчиман!

– Аммо Темурни қўрқитиши осон эмас.

– Уни қўрқитиш учун шу кечадан бошлаб ишга киришмоқ кифоядир, – деди қароқчибоши писандсиз товушда.

– Қандай қилиб ахир? – деди шошиб қолган Ҳусайн.

– Қандай дейсиз-а? Бу осон иш. Зотан, Темурнинг халқ орасидаги фитнали ишлари султоннинг қулогига етиб борган. Шу боис, унинг тарафдорлари жазога тортилади, деган бир миш-миш чиқарасиз. Халқ ундан совийди ва бечора Темур ёлғиз қолади!

- Демак, шу кечаданоқ ишни бошлаймиз, шундайми?
- Ҳа! Бу оқшом Темур учун толесизликнинг бошланиши-
дир, завол кечасидир!..

Фаройиб бир тасодиф туфайлидан бу сұхбатни эшитиб қол-
ган ўша туркман, қарангки, ўша куни бир уламо вაъз ўқиган
даврада ҳам қатнашиб, унинг тилидан Темурнинг Оллоҳ томо-
нидан юборилған бир соҳибқирон эканини түйди... Ҳайратга
тушди ва тўппа-тўғри Темурнинг олдига бориб, бор гапни
унга айтди. Шундай қилиб, Темур учун бир шоми гарифон,
толесизликларининг бошланиши, завол кечаси бўладиган тун,
аксинча, бир иқбол кечасига айланди...



XVI. ФАЛАБА НИШОНИ

Ўғри-қароқчилар тўдасининг фитнаси ва чақуви туфайли султон қўшинининг Самарқандга бостириб келаётгани бора-сида Ўғуз Арслон Темурга хабар берди. Икки эски қадрдон ўртасида шундай сухбат бўлиб ўтди:

- Демак, мени Самарқандда босиб, қўлга олишмоқчи, шундайми? - дея сўради Темур.
- Ҳа! - дея тасдиқлади Ўғуз Арслон. - Режаю мақсадлари шундаймиш. Ўша ердалигимизда султон Туғлуқقا хабар берилганмиш.
- Ундай бўлса, ҳужумни қайтармоққа тайёр туришимиз керак.
- Ҳар ҳолда...
- Агарда эплай олсак, барча қароқчи тўдаларнинг бошлиқларини бир амаллаб Чигатой салтанатига қарши қўйишимиз шарт! - деди Темур шиддатли товушда. - Аммо буни уддалай олармианмиз-йўқми, билолмадим-да...
- Уддалайсан, бўтам! - деди Ўғуз Арслон оталарча комил ишонч билан. - Чунки улардаги мискинликни сенда ҳеч кўрмадим, сен жуда файратлисан! Ҳар қандай музаффариятнинг онаси фаолиятдир!
- Ҳа, зафар қозонмоқ учун тиришиб ишлаш керак. Фаолият эса, интизомга боғлиқдир. Файрат ва интизом билан киши ютуққа эга бўла олади.
- Тўппа-тўғри!
- Зафаримиз йўлида бирор ҳарбий ҳийланни ўйладингизми? - дея сўради Темур.
- Яна бироз ўйлаб, пишитишим керак... Ўзингда бирор режа борми? - дея ўсмоқчилади Ўғуз Арслон.
- Тайёrlаб қўйганман!
- Қани, эшитайлик...

– Аввало бой берилган фурсатни қайта қўлга киритиш лозим ва ҳар қанақа ҳужумни бартараф этишга тайёр туриш керак!

– Э, яша, бу фикринг жуда тўғри! Унинг учун, биринчидан, Мовароуиннаҳрни эгаллаб, у ерни барча курашнинг марказ қароргоҳига айлантироқ даркор...

– Йўқ... – деди Темур қадрдан маслаҳатгўйининг сўзини бўлиб. – Кўл остиндаги бир тўда бебош жанговарнинг юртимни бесаранжом қилишига йўл қўёлмайман.

– Илло бу ер бўлиши фарзу шарт эмас, бошқа бир тарафни марказ этиб танла, ихтиёргинг. Нега бу ишда тортиняпсан, не бир мушкилписанд бор бунда?

– Чунки келажакда бу ўлка, бу халқ менинг амримда бўлади, ўзимга қарашли юрган қавму уругларни тўплаб, бирлаштирибоқ, дарҳол жанубга – Хуросонга ва сўнгра афлонлар томонга юриш уюштираман, у ерларни ва Қандаҳорни забт этиб, ўша минтақани бутун ҳаракатларим марказига айлантироқ мувофиқдир деб ўйлайман...

– Жуда тўғри, бўтам, ҳақлисан.

– Шундай қилиб, менга қўшилгану қўшилмаган, тараф-тараф бўлиб келишолмай юрган қавму уругларни тўплаб, бирлаштирибоқ, дарҳол жанубга – Хуросонга ва сўнгра афлонлар томонга юриш уюштираман, у ерларни ва Қандаҳорни забт этиб, ўша минтақани бутун ҳаракатларим марказига айлантироқ мувофиқдир деб ўйлайман...

– Қарору фикрларинг жуда мантиқли, шароитга ўйфундир, бўтам, – деди Ўғуз Арслон унинг теран режасини маъқуллаб.

Ўша кундан бошлаб Темур режасига кўра ҳаракат этиб, ўз келажагининг биносини куришга киришди. Фаолияти шунчалар фавқулодда ва табиий эдики, муваффақият ва зафарлари ҳақидаги шов-шуввлар атрофдаги вилояту ўлкаларга кенг ёйилиб, даҳшату гулгула яратди.

Темур Хуросонни забт айлаб, Қандаҳор вилоятини ҳам эгаллаб, музafferият чоги хончодирида ўтиаркан, бир отлиқнинг у билан кўришмоққа изн истаётгани билдирилди. Суворий унинг ҳузурига кириб:

– Темур ҳазратлари сизмисиз? – дея сўради.

– Ҳа, – деди Темур унга синчков бокиб.

– Мени Сейистон амири юборди, мана бу унинг сизга ёзган мактуби... – дея чопар бош эгиб, хатни узатаркан, таъзим қилди.

Темур хатни олди. Очиб, ўқимоққа тутинди. Дақиқа са-йин унинг ранг-туси ўзгараб, юзи гоҳ оқариб, гоҳ қизарар, жаҳли чиқиб, интиқом ҳиссу ҳаяжонида тўлғонар эди.

– Бўпти, унга саломимни айтинг! – деди Темур хатни ўқиб бўларкан.

Хизматчини чақириб, чопарни ташқарига йўллади.

Улар чиқиб кетгач, Темур ўзича шундай деди:

– Бунинг сўзларидан катта бир фалокату балонинг ҳиди келмоқда! Аммо, кўрайлик-чи, қайсимиз кучли: сенми ё менми?..

Ажабо, бу мактубда нелар битилганди? Бу қайси фалокат жарчиси экан? Қандай балонинг қўланса ҳиди экан?..

* * *

Сейистон ҳокими ўзининг атрофдаги ерларини Темурнинг кучли қўшини тарафидан босиб олинганини кўриб, энди қандай ҳаракат қилиш лозимлигини билолмай ҳайрон эди. Қарши курашсинми ёки бошқа йўли ҳам борми? Темурнинг кунларнинг бирида Сейистонга ҳужум қилиши тайин. Шуни кўзда тутган ҳолда режаю тадбирларни пишитиш керак. Ҳоким шуларни ўйларкан, уламо ва маслаҳатчиларини чақириб, улар билан кенгаши.

– Темурнинг футуҳот йўлида нақадар тез илгарилаётганини кўриб турибсизлар, – деди у. – Довул каби эсиб, дуч келган вилоятларни босиб, халқини бўйсундирмоқда. Шу кетишида бу ерларни ҳам ост-уст этиб, ўзига тобе айлагай... Шунинг учун сизлардан сўрамоқчиман: хўш, бу балога қарши қандай ҳаракат қилганимиз маъқул?

– Тақсир, биз учун энг хайрлиси Темурни иттифоққа даъват этмоқдир... – деди бир уламо.

– Аммо унга қандай қилиб биз билан иттифоқчи бўлинг, деймиз? Ахир Темур бундан, мендан қўрқишиди, деган маъно чиқармайдими? Бизга янада қаттиқроқ кўз тикмайдими? – дэя ҳоким ўз шубҳаларини баён этди.

– Нега ундан қилисинг? Агар биз дўст бўлайлик, десак, бу қўрқувданмас-ку. Бошқа сабаблари ҳам бор-да...

Шунда вазир сўзга аралашиб:

— Биз ўйлаган бошқа сабабларни Темур хаёлига ҳам келтирмаса керак, — дея шубҳасини аён этди.

— Нечук? — дея сўради ҳоким.

— Чунки унга кўрсатиладиган бу яқинликни, яъни иттифоққа даъватни оддинроқ билдирганимизда, балки у ўйлаб кўрарди ва таклифимиз шоёни диққат бўла биларди, аммо...

— Хўш, энди-чи?

— Энди бу иш мумкин эмас. Чунки унинг куч-куввати ортиб, ўзига ишонч ҳосил қилгандан сўнгра биз унга иттифоқ таклиф этмоқдамиз. Энди унинг учун бу таклиф ҳеч бир маъною қимматга эга эмас. Бир илтимос, холос.

— Унда... илтимосга ҳозирчалик мажбур әмаслигимиизни акс эттирувчи бир мактуб юборсак, не дейсизлар? — деди ноchor ҳоким.

— Маъқул! Жуда соз...

— Қандай оҳангда, нималарга урғу бериб ёёсак...

— Масалан, сизни ҳимоямизга оламиз деган таклифни билдирсак ҳам унга ёқар балки...

— Э, жуда бол-ку!..

Вазиру вузаро, маслаҳатчиларнинг бари бу фикрга кўнишди, ҳоким шундай мазмунда хат битилишини буюрди.

— Дарҳол бир хабарчи юбориб, хат билан Темурни даъват қиласайлик, — деди ҳоким.

Қалам ва қоғоз келтирилди, қуйидагича мактуб битилди:
«Темур,

Сизнинг Чигатой хони қаршисида кучсиз эканлигингиизни кўриб-билиб турибмиз. Шунга биноан, бизнинг ҳимоямизга киришингиизни тавсия этурмиз ва ҳимоячи қўлларимизни сизга узатмоқдамиз.

Сейистон ҳокими».

— Чопар келдими? — сўради ҳоким. — Ҳа, чопар, сен бу мактубни зудлик билан Қандаҳор шахрига бориб, Темурга етказ!

Хабарчи хатни олиб, йўлга равона бўлди.

Кенгаш давом этди. Темурга қандай муомала қилиш, қандай қарши туриш йўллари ахтарилган бу йигин анчага чўзилди. Баҳс пайтида бир киши шундай деди:

— Олдинига биз, агар Темурни иттифоқчи бўлишга даъват этсак, уни хафа қилиб қўямиз, дея тортингандик, аммо энди янада бежо иш қилиб қўйдик, дейман-ов. Зотан, Темур айни вазиятда кучли-қудратли ва мағрур, шу боис унга «ҳимоямизга оламиз» деган таклифимиз жуда оғир ботади, ўйлашимча...

— Тўппа-тўғри! Энди унинг ғазабига дучор бўламиш! Биз томонга бостириб келиши оппа-очик!.. — дея ваҳимага берилди бир уламо.

— У ҳолда нима қил дейсизлар? — деди энсаси қотган ҳоким.

— Ҳозирданоқ уруш тайёргарлиги ва тадоригини бошлимоқ энг мувофиқ ишдир...

— Ҳа, бўлар иш бўлди, энди буни тузатиш мумкин эмас. Чорамиз йўқ...

— Афсус, биз балони ўзимиз чақирдик...

— Шундай-ку-я, аммо бу бало барибир бир кун бошимизга келарди.

— Хуллас, энди тайёргарликни кўравериш керак.

— Гапларинг тўғри, урушамиз! — дея оғир сўлиш олди ҳоким. Сўнгра буюрди: — Қани, энди бораверинглар, ҳарбга тайёргарлик кўрилсин! Темурни ярашиқли қилиб кутиб олишимиз керак!..

Сейистон ҳокими ана шу алпозда мажлисини тугатди.

* * *

Темур хатни олгандан кейин яна бир гапдан хабардор бўлди. Яъни, Чигатой сultonи Туғлуқ Темур вафот этган, ўрнига ўғли Илёсхўжа тайинланган эди. Темур бу воқеаларни эшитиб, севинди ва завқу шиддат билан одамларини тўплаб, режалар тузишга киришди.

Ниҳоят, бутун маҳоратини, ҳарбий ҳийласини ишга солиб, кўнгли тўқ ҳолда, жанговар қўшини билан Сейистонга қараб юрди.

Сейистон ҳокими аввалги сўзидан қайтган эди. У қилган ишининг ўз-ўзича бир ҳийлага айланишини ва Темурни ғафлатда қолдириб, тузоқقا туширишни ўйлаб, аскарлари билан шаҳар ташқарисидаги пистирмада кутмоқда эди.

Темур ҳам анойи эмас, у жосусларининг усталиги натижасида бу ҳолдан хабар топган ва унга кўра тадбир олган

эди. Яъни, қўшинини иккига бўлиб, бир қисмини ўз қўмон-донлиги остида сақлади. Бошқа қисмини эса, иккига ажратиб, бирига Муборакхонни, унисига эса қайноғаси Ҳусайнни бошлиқ этиб тайинлади. Режага кўра, Муборакхон ва аскарлари шаҳарни орқа тарафдан ўраб, уни босиб олади. Ўзининг қўшини ҳар икки бўликка зарур пайтда ёрдам кўрсатади, фақат орқа томонда сокин ҳаракат қиласи, худди захирадаги черик каби...

Шаҳарнинг орқа тарафидан яширинча келаётган Муборакхон аскарларини Сейистон ҳокими жангчилари пайқамай қолишиди.

Ҳаракатдаги қўшиннинг олдида отлиқ Темур ҳайбат тўкиб борар, аммо ташқаридан қараганда, ҳеч қанақа уруш тайёрилиги ё кайфияти йўқдай кўринар эди.

Икки тараф қўшини юзма-юз келгач, Сейистон аскари чўчиброқ ҳужумга ўтди ва уруш бошланди. Темурнинг зўрға ўзини тийиб турган бебош аскарлари бирдан рақиб устига ёпирилди, шафқатсиз ҳамлалар натижасида бошлар кесилди, вужудларга ўку қилич санчилди, ҳар ён қонга бўялди. Инсонлар вахшиёна жунбуш-ла қассоблик ҳунарини намойиш этишарди. Уст-бошлари қонлар ичидаги югуришарди, икки томон ҳам ҳирс билан бир-бировларини маҳв этмоқ қасдида ҳужум қилишарди...

Темурнинг қўшини мағлуб бўлаётгандай кўринарди.

Черик секин-секин орқага тисарила бошлади. Аммо Темур бир ҳарбий ҳийла ишлатиб, чекинишни тўхтатишига эришиди. У тўсатдан аскарлар олдига ўтиб, қиличини сермаганича ҳайқира-ҳайқира ҳужумга киришди.

Ана, зафар ҳам кўринаёзган эди. Афсуски, бу омадсиз жангда Темур обёғидан қаттиқ яраланди. Сейистон лашкари Темурнинг қўшини олдига тушиб, қочиб борарди. Шу пайт нариги тарафдаги Муборакхоннинг жанговарлари уларнинг йўлини тўсади. Даҳшатли олишувда Сейистон аскарлари икки тош орасида қолгандай эзилиб, йўқ бўлди.

Бу музafferият Темурга анча қимматга тушди, умр дафтарига ўчмас, аччиқ бир хотира ўлароқ муҳрланди. Фалаба нишони, яъни обёғидаги яра сабабли оқсоқ бўлиб қолди. Шу туфайли Оқсоқ Темур, Темурланг сифатида дунёга донг таратди, бу нишон унинг учун абадий бир обидаи зафардир.



XVII. МОВАРОУННАХР ҲУКМДОРЛИГИ ВА ТЕМУРНИНГ ТАХТГА ЧИҚИШИ

Маълумки, бир ўлканинг султони бор экан, бошқа бир одамнинг салтанатга эгалик қилишга уриниши турклар¹ одатига зиддир. Шу боис Темур ҳам Илёсхўжанинг ўлимидан сўнгра чигатойлардан Кобулшоҳга тобе бўлишни қабул этганди, инчунун унинг салтанат учун иddaо қилиши мумкин эмасди. Бир қуни у бу масалани ўртага қўйиш учун маслаҳатчиларини, уламони чақиритирди.

– Менинг салтанатни идора қилишим хусусида қандайин фикру кенгаш берасизлар? – деди уларга қарата.

– Тақсир, бу ўлкани қутқазиш учун Аллоҳ томонидан яратилган бир қаҳрамонсиз, соҳибқирони замонсиз! Султонлик сизнинг ҳаққингиздир! – деди бир маслаҳатчи.

– Аммо бу туркларнинг қадимий одатларига терс-да, – деди Темур.

– У ҳолда, Чигатой эли ҳукмдорларининг тасарруфи ва идораси остида бўлмаган Балх шаҳрида сизнинг тахтга чиқишингиз айни муддаодир! – деди бир уламо.

– Майқул, раҳмат сизларга, – дея Темур кенгашчиларига миннатдорлик билдириди.

Бу маслаҳатга мувофиқ иш тутилди. Уламолар раъйига қараб, Балх шаҳрида турклар анъанасига мувофиқ бир маросим ўtkазилди ва турклиknинг мӯғуллар асоратидан қутқарувчиси Темур Мовароуннахр ҳукмдори дея эълон этилди. Уламо фатвоси амалга ошгач, ҳеч қандай унвон, имтиёз ва на-да бошқа бир нарса истамай, ёлғиз ҳукмдор номига ақча бостирган Темур эски мӯғул одатларини бекор қилиб, ўрнига исломий қоида ва анъаналарни жорий эта бошлади.

¹ Туркистон турклари демакдир, кейинги замонларда қўлланилаётган туркийлар маъносида (тарж.).

Масалан, Чингизхон яса-ёсоқлари ўрнига тузук ва шариатта кўра иш тутишга интилди.

Ха, Темур ҳукмдор деб эълон қилинди. Бироқ бу ишдан ўзига қарашли одамлар ва аркони давлат орасида ҳам хурсанд бўлмаганлар бор эди. Улардан бири – қайноғаси Ҳусайн эди. Бу бечора одам ота меросига эга чиколмаслигини англади. Бунинг олдини олишга роса уринди. Аммо бутун ҳийлаю найрангларига қарамасдан, Темурнинг рўпарасида ожизу ночор қолди. Охирида Темур ҳукмдор деб эълон ҳам қилинди ва шунда Ҳусайн куёвидан ҳажга кетишга рухсат талаб этди. Темурдан изн олингач, ҳозирлик кўриб, одамлари билан бирга йўлга тушди...

Бироқ Ҳусайн йўлда ўлдирилди. Қотиллар асли Темур тарафдорлари эди. Чунки улар, Темур Ҳусайнни кечирган бўлса-да, бу одамнинг қанчалик хоинлик қилганлигини, унинг ҳажга йўналган ҳаракати ҳам, аслида, хиёнат ўйлидаги бир уриниш, ҳийла эканлигини яхши билишарди.

Ҳусайннинг асл ниятини Темур ҳам пайқаганди. Шунинг учун, унинг ўлдирилганини эшитгач, унчалик ачинмади ва:

– Оқибатда жазосини олди, – деб қўя қолди.

* * *

Темур ҳукмдор бўлмай туриб асл ватани Туркистонни босқинчилардан кутқазиши учун ўзини кўллаб-қувватловчи бир кучга, бир далилу хужжатта эҳтиёжи бор эди, буни истаган, излаган эди. Буларга ҳам эришди. Ана энди у мамлакатини кутқариш йўлидаги муқаддас ва жиддий ишга киришди. Ҳар томондан тўп-тўп келган туркий қавмлар унинг сафиға кўшилишар, уларнинг улуғлари Темурнинг ёнида ўлгунча бирга бўлажакларини, у билан бир йўлда эканликларини билдириб, тобелик изҳор этишар. Темур уларга лутфу мурувват, назокат ва меҳрибонлик кўрсатарди. Қўлидаги бор-йўгини харжлаб, одамларга тортиқ айлаб, уларни қувонтирас, ўзига ром этар эди. Масалан, бўркини Туғлук Барлосга, камарини Сайфидинга совға қилганди...

Самарқанд сафаридан олдин айниб, ундан айрилган Шер Баҳром дегани ҳам охири пушаймон бўлиб, Темурнинг оғёғига бош уриб келди. Унга Темур яна яхшилик ва нозик муомала

күрсатди, шармандалик тамом унугилди. Хуллас, Шер Баҳром ҳам ватанни кутқазища Темурга мададкор бўлишини айтиб, қасамёд қилди.

Темур ўз ҳукмдорлигини кучайтириш учун тобеаларини кўпайтиришга ва ўлкани кенгайтиришга мажбур эди. Уч йил тинимсиз уринишлардан кейин бебош тўдаларни Сирдарё-нинг у ёғига суриб юборди. Туркистон ва Олмалиқ шаҳридан бошқа чигатойларга боғлиқ ҳеч нарса қолмади. Бунинг устига, Темур Мовароуннаҳр даромадини қайноғаси Ҳусайнга бериб, Кеш ва Андхўй шаҳарларини ўзига қолдириб, Бухоро ва Самарқандни вазир Қазағаннинг меросхўрларига боғлаб, уларни ўзига ўринбосар тайин этиб, идорасини мустақил қилиб олди...

* * *

Ҳа, ўшанда Самарқандда юз берган воқеадан сўнгра Темур шубҳага тушганди. Уни қайноғаси Ҳусайннинг хиёнат қилиб-қилмагани ўйлантираётган эди. Ҳусайнни чақирди, биргаликда устод Шамсиддиннинг мозорига боришиди. Темур муқаддас даргоҳда туриб, Ҳусайнга:

- Дўст бўлиб қоламиз, а? – деди.
- Ҳа, берган сўзимга содиқман ва ҳеч бир замон аҳдимда қусур бўлмагай, – деди Ҳусайн.

Темур барибир қайноғасига ишончи йўқлигини тилига чиқарди:

- Ҳусайн, сенга ҳеч ишонгим келмайди-да...

Шундан кейин Ҳусайн куёвини азбаройи ишонтиришга тиришиб, Куръонга уч бор қўл суниб, тавоф этиб, қасамёд қилди.

Мозордан қайтишиди.

Аммо Ҳусайн барибир аҳдини бузди, фитнага бош урди. Бир куни ишончли одами Шер Баҳромни чақириб, ўз режалари ҳақида маълумот бериб, ундан ёрдам истади.

– Шер Баҳром, – деди у кин тўла товушда, – биласанки, Темур эгаллаган амирлик аслида менини бўлиши керак эди. Чунки бу ҳокимият отамдан мерос қолган... Аммо Темур бу кучни қайдан олди, билолмайман!..

– Темур бу мақомга ўзининг ўтқирлиги, ақлу ғайрати билан эришди. Сиз ундан ота меросини ола биласизми? – дея синчков кўзларини унга тикди Шер Баҳром.

– Э, шу дардда юрибман-ку! Нима қилиб бўлса ҳам ҳокимиятни ундан қайтариб олишим шарт!.. – дея жонланди Ҳусайн. – Ох, нима қилиш керак, а... Сендан айрилгандан кейин, Самарқандга борган пайтимда, у ерда ўтириб, султон Туғлуқقا хатни мен ёздим-ку, ўз қўлим билан... Эҳ, қанийди кўшин пайтида етиб келсайди-да, Темур кунини кўрсайди!..

– Аммо жосусликнинг жазосини ҳам тортишингиз мумкин эди, – деди кесатиб Шер Баҳром.

– Буям тўғри... Ҳа, майли. Темур, зотан, мендан шубҳа қиласарди. Ўтган куни қасам ичирди, гўё мен қасам-пасамдан кўрқадигандай. Эшишимча, Шоҳқули унга ҳукмдор бўлишингиз керак, деганиш. Темур ҳукмдор бўларниш, а! Қани, ҳукмдор бўлсин-чи, унга бир ўйин кўрсатаманки...

– Қанақа ўйин? – энсаси қотиб сўради Шер Баҳром.

– Э, билмайсан-да, хумпар, бу ёқда кўп ишлар бор! – деди Ҳусайн маккорона, мамнун оҳангда. – Катта одамлардан бирини ўзимга иттифоқчи қилдим. Темур ҳукмдор бўлган куни эрталаб ичилган шарбатдаги заҳар таъсирида асфалосо-филинга кетади! Қалай, Баҳром, яхшими?

– Жуда яхши, тақсир, – деди Шер Баҳром бироз ўйланқираб. – Аммо, дейликки, ўша оғудан Темур вафот қилгудек бўлса, ўзингизни бир қотил сифатида жазога тортилмаслигингизни қайдан биласиз? У ҳолда сиз ҳоким эмас, маҳкум бўлиб қоласиз-ку! Менимча, бу фикрдан воз кечганингиз маъқул.

– Йўқ, ҳеч қачон воз кечмайман!

– Шояд буни Темур эшитгудай бўлса...

– У вакт ўлган куним! – деди қатъий товушда Ҳусайн.

– Менга қолса, бу ишдан воз кечинг, қўрқинг... – деди Шер Баҳром унга ачиниб.

– Кимдан? Сенданми?

– Ҳа, мендан, – деди кесатиб Шер Баҳром. – Зотан, Темурнинг фазилатлари қаршисида шайтоний амаллар йўқ бўлишга маҳкумдир, бу бир ҳақиқат... Гапнинг индаллосини айтинг, ўзи мендан нима истайсиз?

– Арзимас бир хизмат. Темур ичадиган шарбатга заҳарни аралаштириш!..

– Йўқ! Мен бундай қилмайман. Аксинча, Темурга бориб, нималар бўлаётганини очиқ-оидин айтаман! – деди Шер Баҳром гуриллаган товушда ва шартта ўрнидан туриб, чиқиб кетди. Ҳусайн жисмонан ундан кучсизлиги туфайли йўлини тўсишга журъат этолмади.

Шер Баҳром шу кетганча тўппа-тўғри Темурнинг олдига борди. Унга учраб, ҳаяжон-ла сўзга киришди:

– Тақсир, сизга ўтмишдаги исёнимнинг сабабини айтолмагандим, мана энди айтаман. Бунинг сабаби Ҳусайн! Сиз Самарқандда экан, сизни бостириб-кўлга олиш учун султон Туглуқ тарафидан бир бўлик лашкар юборилган эди, кейинроқ сиз бундан хабар топгандингиз, бироқ сабабини билмасдингиз. Бу иш қайноғангиз Ҳусайн ёзган бир мактуб туфайли содир бўлганди. Энди, энди эса, яна бир чакки воқеа юз берадики... бу – даҳшат!..

Темур Шер Баҳромнинг бундайин ҳолини кўриб, дарҳол ёнига келди ва таскин бериб:

– Нима бўлди ўзи, бунча ваҳима қиласан? – дея сўради.

– Ҳукмдорлигинги эълон қилинган кун сизни заҳарлашмоқчи...

– Биламан, – деди Темур хотиржам товушда.

– Биласизми?

– Ҳа. Фақат сен кўрқма, ҳеч нарса бўлмайди. Ўзингни хотиржам тут.

Шер Баҳром Темурнинг ҳузуридан кўнгли таскин топиб чиқиб кетди.

Икки кун ўтгач, ҳалқ орасида Ҳусайннинг Шер Баҳромни ўлдирганлиги ҳақида гап тарқалди. Барча аслзодалар бу қилвир иши учун Ҳусайндан нафратландилар, Темур тарафига ўтиб, унга тобе бўлдилар. Темурнинг илк ҳукмдорлик пиллапоялари тарихи ана шу ҳодисаларга туташ шаклда ёзила бошланганди.

Шундай қилиб, Ҳусайн Темурни заҳарлашга оид режасини амалга ошиrolмади. Қараса, қўлидан ҳеч бир иш келмайди – буни англагандан кейин, ёниғлиқ қозон ёниғлигича қолсин, деган илинжда, Темурдан ҳажга кетиш учун изн истаган эди...

Темур Хусайннинг йўлда ўлдирилганини эшитгач, юқоридаги гапларни эслаб, «Оқибатда жазосини олди» деган эди.

* * *

Темур ҳукмдор бўлганида тахминан ўттиз етти, жуда бўлса қирқ ёшларда эди. Ҳокимиятни қўлга олиши биланоқ, илк фаолияти мамлакат ички ишларини йўлга қўйиш, эски золимлигини тарқ этмаган катта мансабдорларни таъсирсиз ҳолга келтириш, ўз ғаддорлигини ташламаган бошибузуқларни мансабдан четлатиш бўлди. Зотан, Темур ҳеч бир замон илонни қўйнида сақлаш ниятида эмасди.

Шундан кейин у ўлка жанубидаги оммани итоатига олиб, турмушни тартибга солди. Кайхусраву Искандар қўл уролмаган бир ишни бажаришга киришди: яъни, туркистонлик бир бекнинг ўғли Яксарт дарёсини кечиб ўтиб, бу атрофни ҳукмига тобе этди.

Беш йил мобайнида у отдан тушмади, туркларнинг қадимий ўлкасида бир неча юришлар уюштирди. Султон Қамариддиннинг қизини никоҳига олди. Шунга қарамай, Тоштуғой хотун унга ҳеч бир вақт рашк қилмади. Чунки бу ишлар Темурнинг мартабасини юксалтириш учун қилинаётганди. Темур мақомда қанчалар юксалса, отаси вазир Қазағанинг ўчини олиш шунчалар қулайлашади. Зотан, Темурнинг бир йил ичida эгаллаган юртлари бу ёғи Сирдарёдан Амударёгача, у ёғи чинлар чегарасидан тортиб рус ўрмонларигача туташиб қолганди. Галдаги энг муҳим мўлжали Хуросон эди. Жанговарлик йўлининг илк йилларида фатҳ этишга тиришиб, кўп заҳмат чекиб-да забт этилмаган бу ўлка унга қарши ёвқурана ҳайбатини сақлаб келаётганди. Бу юрт жуда катта бойлика, ноёб гиламлару курол-аслаҳа корхоналарига, қимматли дехқончилик маҳсулотларига эга эди. Ниҳоят, эндилиқда улкан қувватга эришган Темур Хуросон ҳукмдори Фиёсиддин устига маҳобат билан ёпирилиб борди ва бу сарват ўлкасини ўзига тобе этди.

XVIII. ТИКБОШЛИ ЖАҲОНГИР НАСЛИ

Темур Туркистон, Амударё ва Хоразм томонларни забту фатҳ этиб, бутун бу минтақани қиличига бўйсундиргач, эндиликда Қипчоқ ўлкаларига тўғридан-тўғри йўл очилган эди.

Чигатой туркларидан ташқари, Чингизхон сулоласига мансуб турк хонлари ичида биринчи бўлиб исломиятни қабул этган Жўжихон қавми ҳам Қипчоқ даштларида яшаб келарди. Аммо мусулмонлик бу томонларда номигагина мавжуд бўлиб, аҳоли орасида, турмушда исломий одатлар кўринмасди. Бу сулоланинг идораси остида турли қавмлар бор эди. Жўжийлар ҳар соҳада исломдан олдинги ҳукмдорларига тобелик давридаги ҳаёт тарзларини давом эттиришарди. Бу муҳитда хилма-хил қавму унсурларнинг ўзига хос анъаналари, қонун-қоидалари ва одатлари сақланиб қолганди. Жўжийлар ҳокимиятлари ичида яшаётган катта-кичик, турли элатлардан божу солиқ ундиришар ва уларнинг тинчлигу муҳофазасини таъмин қилишар эди. Фақат шуниси ҳам борки, бу қоришик элу элатлар ўртасидаги кичик бир зиддият ёки тўқнашув жуда катта келишмовчиликка сабаб бўлиши, нифоққа айланishi осон эди.

Исломиятга нисбатан лоқайдликни ва аввалдан бери риоят қилинган турмуш тарзини давом эттирганлари учун Жўжихон сулоласи ўзига тобе жойларни сақлаб қолишга муваффақ бўлди. Бу сулола Эдил дарёси атрофида, Сарой шаҳри теварагида ҳукмларини юритишарди. Жўжининг бешинчи ўғли Шайбон Эдил дарёсининг орқа тарафи ва Кубон томонларда ҳукмрон эди.

Кримда эса, Туғай Темур деган зот ҳоким эди.

Саройда Бердигек номли бир валиаҳд волийлик қиласарди.

Булардан фақат Бердигек фарзандсиз эди ва 1360 йилда вафот этганди. Унинг сулоласига мансуб қариндоши Ўрус

Саройда ҳукуматни әгаллашга ташаббус этди ва бунга мұваффақ бўлди.

Тўхтамиш Ўрусга ҳасад қиласарди, унинг донғини эшитар-эшиитмас дарҳол аркони давлатни тўплаб, мажлис ўтказди. Бу йифинда ҳукумат ишларига ақли етадиган етук уламодан ташқари, Тўхтамишнинг ҳар амрини каромат билиб, унинг назарига тушиш учун ҳар қабиҳ ишга тайёр манфаатпараст ялоқилар, ҳокимиятда зулмга йўл очадиган ахлоқсиз маддоҳу ғаддорлар ҳам бор эди. Тўхтамишнинг ҳасад ва кини қайнабтошиб, сўзга кириши:

– Ҳаммангиз яхши биласизки, Эдил ўлкаси бизга қарайди. У бизнинг суоламизга хос бир мулқидир. Бу ерлар бизга аждодимиздан қолган. Шунинг учун бу ватанин сақлаб қолиш биз учун қутлуг бурчдир. Сизлар нима дейсиз? Бундайин муқаддас вазифа факат бизнинг суоламизга берилган экан, Ўруснинг бу ўлкада тажовузкорларча иш тутиши муносибми?

Анжумандаги лаганбардорлардан биттаси – вакиллар бошлиғи дарҳол унинг сўзини илиб кетди:

– Тўғри, ҳазратим! Биз, барча вакиллар гуруҳи, бизни шу мақомга юксалтирган иқтидоримизга таяниб айтамизки, Ўруснинг келишмасдан, бундайин тажовузкорона иш юритишга заррача ҳаққи йўқ! Бундай номаъқул ишга қўл ургани учун бутун Жўжи улуси унга қарши туришимиз, әгаллаган мақомидан ҳайдаб, ҳаддини билдириб қўйишимиз керак! Бу бизнинг ҳаққимиз ва бурчимиздир, зотан...

Шу пайт йифиндаги бир вакил бу фикрларга қарши чиқиб, шундай деди:

– Менимча, бунақа йўл тутмаганимиз бизга муносиброқдир. Жўжи суоласига мансуб бир хотиннинг эри бўлган киши, яъни Ўрус ҳам ҳокимиятни идора этса, бунинг бир маъзури йўқдир, дейман.

– И-е, бунақа кетищда жўжилар ҳокимиятдан айрилиб қолади-ку? – деди вакиллардан яна бири.

Шу пайт кучли вазирлардан биттаси, ниҳоят, сабри тугандай бир оҳангда:

– Йўқ, тақсир, ундей эмас, – деди. – Хўш, Ўруснинг оиласида туғиладиган хонзода Жўжи суоласидан ҳисобланмайдими? Бу ўлка мұваққат бир замон мобайнида бошқа

бир сулола мансуби томонидан идора қилинса ҳам, охирида ҳукмдорлик яна ўша жўжиларда қолмайдими?..

Шунда Тўхтамиш вазирга ташланиб қолди:

– Йўқ, бу тўғри эмас! Кўрайлик-чи, бошқа бир наслга мансуб Ўрус бутунлай идорани кўлга олгач, ўғлини меросхўр қилиб тайинладими, ёки бошқа хотинидан бўладурган боласига муносиб кўрадими?..

– У ҳокимиятни бирорга бериб кўймас-ов...

– Унда янада яхши, тақсирим! Ана шунда музокара ва ҳақ талаб қилиш учун келишмовчилик дарвозаси кенг очилади!

– Йўқ! Бўлмайди. Бордю ўша пайтда идорамиз ва ҳокимиятимиз заифлаб қолгудай бўлса... – деди бир уламо. – Ўшанда масалани ким ҳал қиласди?

– Эй чол! – деди Тўхтамиш фазабланиб ҳақиқатгўй кекса вазирига. – Кўнглингда бир гап бор, қани, очик айта қол.

– Мен нима дердим, ҳукмдорим, – деди вазир. – Ҳозир ҳам ундан кучли эмасмиз-ку ахир...

– И-е, нималар деяпсан ўзи! Бир итга ҳаддини билдириб қўйишга қурбимиз етмайди? – деди фазабланган Тўхтамиш.

Шу чоғда маддоҳ мансабдорлардан бир нечаси тилёғламалик билан сўзга аралашиб, Тўхтамишни улуғлаб, Ўрусхонни ерга урди. Улардан бири:

– Гапларингиз жуда тўғри, – деди. – Менимча ҳам, Ўрусдай ҳукуматни янги кўлга олган, идорий ишларга бегона бир одам биздан кўркиши керак-да!..

Тўхтамишон уламоси билан бу тарзда кенгашиб бўлгач, ўзининг кескин қарорини билдириди:

– Бугундан бошлаб Ўрсга қарши уруш очамиз!

– Тўппа-тўғри, хоним! Ниҳоятда тўғри!.. – дея йиғиндаги кўпчилик унинг қарорини қувватлади.

– Бўлти, энди тарқалинг, – деди Тўхтамишон. – Уруш тайёрлиги кўрилсин! Бизнинг қароримизга қўшилмаганларга айтинглар, жанг бошланганда, улар ҳам ёнимда бўлсин ва кимнинг кучли эканини ўз кўзлари билан кўрсин!..

* * *

Узундан-узоқ можаролар ва келишмовчиликлардан кейин Ўрус билан Тўхтамиш орасида даҳшатли уруш бошланди. Ҳар икки тараф ҳам майдонда аскарий шижоат ва жасорат

кўрсатишига киришди. Ўртада қилич ва қалқонларнинг даранг-дурунг товушидан бошқа ҳеч нарса йўқдай гўё. Икки тараф ҳам нафрат ва кин билан бир-бирларига хужум қилар, бир-бирини маҳв этиш учун тиришар эди. Жангтоҳда қон дарёдай оқарди, девсифат кишиларнинг жасадлари ер билан битта бўлиб юмалаб ётарди.

Тўхтамиш ёнидаги кекса вазирдан ўсмоқчилааб:

– Ҳа, чол, уруш қалай кетяпти, – дея писандиз сўради. – Сен айтгандай, аскаримизда Ўрусни мағлуб этиш учун куч йўқ эканми?..

– Йўқ, тақсир, – деди вазир пинагини бузмай.

– Нечук?

– Тақсир, биринчи ғолибиятга унчалик ишонмасангиз яхши бўларди, – деди у.

Айни шу чоғда Тўхтамиш ҳузурига етиб келган чопар қўшиннинг чап тарафидағи аскарлар тумтарақай қочганини билдириди. Хон бу кучсизланган нуқтани жонлантириш учун дарҳол буйруқ берди. Сўнгра аламини чолдан олмоқчидаи унга ўшқирди:

– Сен шум сўзларинг билан қўшинимнинг руҳий жанго-варлигини заифлатяпсан! Нари кет-э, фалокат! Отингга минган ҳолда буйруғимни кут!..

Вазир яқинлашаётган муваффақиятсизликни олдиндан сезгандай бир қиёфада:

– Тақсир, менга қолса, икки от тайёрлаб тураман... – деди.

– Йўқо-о-ол! – дея ўдағайлари Тўхтамиш. – Ҳаддингдан ошма, ўлгинг келиб қолдими ё!?

– Худо умр берсин, хон ҳазратлари, – деди мулойим то-вушда кекса вазир ва ўғирилиб, ундан узоқлашди. Қўшиннинг орқа тарафига ўтиб, қочиш учун икки от тайёрлаб, фалокат онларини кута бошлади.

Урушмас, бир қиёмат-қойим бўлди. Икки томон ҳам ҳеч қўркувсиз қилич ўйнатиб, душманини маҳв этишга жидду жаҳд этарди. Ҳар тараф ўлик... ўлган, ўлдирган, интраган, йифлаган, зорланган, писган, пистирган, яралangan, эзилган, қочган аскарлар билан тўла... Икки тепадаги хонлар атро-фида юурган, бақирган беклар... Черик эса, янада кўпроқ ўлдириш учун қонсираган, ўчли кўзларини олайтириб, ким-

са-кимсани танимасдан, бир-бирининг қонини тўкиб, олишиб ётиди...

Охири Тўхтамиш одамларининг секин-секин мағлубиятга учраётгани аёналашиди. Тўхтамиш ўз аскарларини ҳарчанд манонат ва жасоратга ундаса-да, бу маҳшарий ғавфода ортга қайтишдан бошқа чора кўринмади. У қўшинини мағлубликдан кутқаза олмади. Ўрусхон аскарлари хужумга ўтиб, бостириб келмоқда эди...

Бир пайт, ҳеч кутилмаганда, Ўрусхон черигидан бириси қўлидаги қиличини ўйнатиб, йилдиримдай Тўхтамишнинг шундоққина қарисида тўхтади ва тўсатдан бир зарба урдик, хон жонсиз ерга ағдарилиб тушди. Аскар келган тезлигида ортига қайтиб, кўздан фойиб бўлди...

Нарироқда бу мудҳиш манзарани кузатиб турган кекса вазир илдам келиб, жасадни бир отга ортди ва бошқа отга ўзи миниб, уни етакда тутганича шарқ томонга йўналди...

Бу пайтда Тўхтамишнинг нариги ёқда қолган вазиру вузароси ундан айниб, Ўрсга тарафдор бўлиб қолишганди. Кекса вазирнинг ҳолу ҳаракатини кузатиб турганлар эса, унга ачинган оҳангда:

— Ҳайҳо-о-от!.. — дедилар. — Бечора мияси ачиған чол!..

* * *

Орадан икки кун ўтган. Одамлар қон билан бўялган майдонни кўздан кечиришмоқда. Баъзилар ўликларни ётган еридан олиб, чуқурларга кўмиш билан банд. Тирик қолганлар эса, марҳум сафдошларга нисбатан бу дунёдаги охирги вазифасини адо этиб, улар билан видолашмоқда.

Голиб аскарлар орасида юзидан ҳеч ишдан қайтмаслиги кўриниб турган, ўч олиш оташида ёнаётган бир жанговар ҳам бор эдики, у ниманидир йўқотгандай олазарак кезиб, мухим бир нарсани ахтармоқда эди. У кўп изланди, аммо ахтарганини тополмади. Маъюсланиб орқага қайтар экан, Тўхтамишнинг собиқ вакиллари ва эндиликда Ўрс тарафдори бўлиб, ёвларига малайлик қилаётган пасткашларга дуч келди.

Улардан бири ундан:

— Нимани қидиряпсан, Тоштуғай? — деб сўради.

- Ҳеч нарсани қидирганим йўқ! – деди у.
 - Қўйсанг-чи, сен мутлақо бир нарсани ахтариб юрибсан, – дея у яна ўсмоқчилади.
 - Йўқ, ўзим шундай айланиб юрибман, – деди зарда билан Тоштуғай.
 - Э, яширмай кўяқол! Бирортасини ўлдирдинг шекилли, интиқом олиш учун...
 - Ҳа, ўлдирдим! Яна не дейсизлар!
 - Биз не дердик... кимни қидиряпсан ўзи?..
 - Тўхтамишин!
 - У кетди...
 - Нима-а! Кетдими? Кўлимдан қутулибди-да, шундайми? Мен ҳам орқасидан бормасам, отим Тоштуғай бўлмасин!
 - Нима қиласан унинг орқасидан бориб, энди у – ҳеч ким!..
 - Э, сизлар ниманиям билардингиз. Майли, айтақолай: Ўрусхон, унинг жасадини олиб кел, деб мени юборганди. Кеча уни бир зарб билан ўлдиргандим. Ўлмаган экан-да, абллаҳ, қочибди! Ҳа, майли, қаёққаям қочарди. Қани, кўрайчи, кўлимдан қутулармикин? Хўш, ҳозир Тўхтамиш қаерга кетган бўлиши мумкин? Ёнида ким бор эди?
 - Бир кекса вазири бор эди, холос. Уни танимайсан. Биргаликда кетишди. Аммо Тўхтамиш соғмиди, ўликмиди, буни билмаймиз.
 - Қаерга кетганлигини билолмадик-да... – дея бириси минғирлади.
- Нарироқда турган кимдир бу сўроққа шундай жавоб берди:
- Темурнинг олдига кетди!..
 - Сўнгра бу одам:
 - Кекса вазирнинг шарққа қараб от чухлаганини кўрдим ва тонг ёруғида шошганича «Менга Темурни кўрсат!» дея бақирганини эшитдим, – дея қўшимча қилди.
- Шунда ҳамма ваҳимага қўмилди, қўркувли бир товуш янгради:
- Унда эндиги воқеалар даҳшатли бўлади!..

XIX. ҚОПЛОН ҲУЗУРИДА

Ўша воқеалардан ўн йил кейинрок, Темур сўрида дабдаба ва маҳобат билан ўтиаркан, бир киши ҳузурига кирмоқчи эканлиги хабар қилинди.

— Олиб келинг! — дея буюрди у.

Қабулига келтирилган одам эгилиб-букилиб, суқулиб Темурнинг этагини ўпди ва:

— Темур ҳазратлари! — деди. — Тўхтамишхонга аскар бериб, ёрдам этганингизни эшитиб...

— Нима бўпти, хўш, — деди Темур унинг сўзини кесиб, — ёлғиз аскаргина эмас, ақча ҳам берганман. Бундан ташқари, Туркистон, Ўтрор, Жаран томонларнинг фарбини ҳам унга бердим. Хўш, нима бўпти?

— Тўғри, муҳташам хоқоним! Ана шу сиз аскар ва ўлка амирлигини берган одамингиз...

— У одамга нима қипти?

— Сизга бу хатни унинг қилмишларини қандай эканлигини билдириб, яхши бир иш қилиш ниятида олиб келдим...

— Тўғрисини айтсам, гапларингдан бир маъно чиқаролмадим. Ўзинг айт, Тўхтамиш султонга нима бўлди? Мен билмайман, билолмайман; хўш, у нималар қиляпти?..

— Ҳазратим, ёрдамларингиз ва ҳимоянгиз туфайли Қипчоқ хукмрони бўлган Тўхтамиш ҳам сизга тобе бўлган эди, ҳолбуки...

— Ҳозирда ҳам тобедир!

— Йўқ...

— Нечун?

— Чунки, ҳозирда у исёнга тайёрланмоқда!

— Ҳа-а... Шундайми? Нима қиляпти?

— Сиз билан садоқат боғларини узиб, Озарбайжонга хужум қилмоқчи ёки қилади!..

– Йўғ-э... Тўхтамишдан буни кутмагандим. Уни икки бор таҳликалардан қутқардим. Бир марта Ўрус аскарларининг қув-қувидан, бир гал эса, ўзимнинг қаҳримдан...

– Нима, кечирвордингизми?

– Ҳа. Ўзинг кимсан?

– Ким бўлардим, уни ўлдиришга онт ичган бир одамман! Биласизми, ўз вазири бўлган кекса отамни Тўхтамиш нима қилди? Билмайсиз-да... О-о-о-о... бу ерга, сизнинг ҳузурингизга уни юборган менинг отам эди! Олдинроқ отам унга Ўрус билан жангта киришмасликни ва ҳирсу очқўзликка мағлуб бўлмасликни насиҳат қилганди. У сўз тингламади. Урушди. Урушда мен Ўрусга унинг калласини олиб келишга ваъда бергандим... Отамнинг йўқлигида Тўхтамишга ҳужум қилдим ва бир зарбада ерга қулатдим. Ўлди деб ўйлагандим, жони қаттиқ экан... Жангдан сўнгра отам уни бир отга ортиб, сизга келтирмоқ учун йўлга чиққан ва бир қишлоққа олиб бориб, даволаган. Тўхтамиш икки ойдан кейин тузалган. Сўнгра энди қаерга боришиларини сўраган. Отам сизнинг ҳузурингизга келиб, тобе бўлиши муносиблигини уқтирган. У эса, ҳалиям очқўзлигидан, аламидан қутуломмай, яна мухорабадан сўйлаган. Отамнинг бу борадаги фикрини сўраган. Отам унга, жанг қилмасайдинг, яхшироқ бўларди, деган. Бироқ шу сўзларни айтиши биланоқ бошига тушган қилич зарбидан ўлган...

– Кейин Тўхтамиш бу ишидан пушаймон бўлгандир-а?

– Ҳа, пушаймон бўлган, аммо отамнинг ўлимига эмас... – деди марҳум вазирнинг ўғли. Сўнгра, бироз ўйланқираб туриб, шундай деди: – Отамнинг фикрлари тўғри эканлигига қаноат келтириб, ўзича таслим бўлиб йўлга чиққан ва сизнинг ҳузурингизга келган... Мана, Тўхтамиш шундай одам!..

– Бироқ сен ҳам ундан кам эмассан! – деди Темур. – Уни ўлдиришга қасд этиб, бу ишни амалга оширолмагансан...

– Йўқ, мен ундейин эмасман. У сўзига содиқ эмасди, ҳийалалар қиласарди. Ўша йўлда эди. Мен эсам, динимни ва ўлкамни севганим учун, юртим манфаатини ўйлаб, уни ўлдиришга қарор берганман.

– Хўш, биринчи зарбанг ўлка нафъи учун экан, кейинги қилган ҳужумингнинг маъниси nedir?

- У хужум, аёнки, бир қотилни – отамнинг қотилини ўлдириш, ундан илоҳий интиқом олмоқ учун эди.
- Яхши. Отинг нима эди?
- Тоштуғай.
- Сендан хурсандман, Тоштуғай. Тўхтамишни қўйиб тур. Кон ҳиди, интиқом оташи билан ёнаётисан. Мен бу ҳолатнинг қандай эканлигини яхши биламан. Чунки мен ҳам интиқом орқасидан кўп чопдим... Худо хоҳласа, бир кун яна ҳузуримга келасан. Ўшанда иккаламиз ундан ўч олиш саодатига эришамиз. Ҳозирча сабр эт...





ХХ. ТЕМУРНИНГ МЎСҚЎВА ЮРИШИ

Бир неча ой ўтгач, Темурнинг аскарлари кенг Ёйик-Ўрол тарафларгача етиб борди. Туркистон тоғлари ва жанубий Сибирни қуршаган уфқ қип-қизил... Водийда гурууб ҳоким. Офтоб борлиқ муҳитни кунботар ёғдусига кўмган, сарғайтирган... Коронгулик хабарчиси кўршапалаклар учишади, кишининг ич дунёси қорайиб-титрайди...

Каршида – чексизликка узанган осмон. Четлари кўкка ту-таш қоп-қора ва ҳайбатли ўрмонлар бир зулмат саҳросини эслатади. Дараҳтлар орасидан шувуллаб-гувлаб оқсан шамол денгиз тўлқини каби шовуллайди...

Бугун кундузи юз берган Ёйик майдонидаги урушда Темур қўшинлари зафар қозонди. Қоча бошлаган Тўхтамиш аскарларини унинг чериги Мўсқўвагача қувиб борди, аммо хоннинг ўзини тута олишмади. Тўхтамиш жанубий Русияга қочган ва у ерда беркиниб олганди.

Кўшини ҳузурига қайтгач, Темур ёнида ўтирган Тоштуғайга юзланди:

- Тоцилмапти-ку, – деди. – Энди не дейсан?
- Не дердим, ҳазратим, – деди Тоштуғай. – Ўзлари зафардан маству завқиёб бўлаверсинлар. Биз эса, кейинроқ, ўлжани тутганимизда, иншооллоҳ, қонини тўкиб, бундайин баҳтиёрикка етишурмиз...
- Режанг қандай?
- Мен сизга айтсам, бир йўлини қилиб, Тўхтамишни кўлга тушириш мумкин...
- У ҳам бўлади, худо хоҳласа. Фақат кўрайлик-чи, фалаку даврон не кўрсатаркин? Энди мен билан Самарқандга қайтасан, – деди Темур.

Тоштуғай Тўхтамишнинг исёни хусусида хабар келтиргач, Темур ўйланиб қолганди. Зотан, исённи бостиришга тайёр-гарчилиги йўқ эди. Шу боис Тоштуғайнин яна кутишга унданб:

- Тўхтаб турайлик-чи, бир гап бўлар, – дея тинчлантириди.
- Хўп, сабр қиласайлик. Сиз сабр соясида мақсадингизга етишасиз, аммо мен...
- Менинг мақсадга етишувим сенинг ҳам мақсадинг эмасми?
- Ҳа, тўғри, ҳазратим, бир томондан шундай, аммо...
- Аммо нима?
- Ҳазратимнинг мақсадлари Тўхтамишнинг ўзини йўқ қилиш, яъни унинг зарару ёмонликларидан кутулмоқ, шундайми?
- Шундай.
- Менинг вазифам унинг зарарлари билан бирга вужудини ҳам йўқ қилишидир!.. Аҳдимга кўра, шундагина менинг ниятим амалга ошади.
- Ҳозирча сабр этмоғимиз мақбулдир...

Темур бу сухбат асносида вазиятни Тоштуғайга яхшилаб англатди ва ундан сабрига суюниб, қасос чоғини кутиш ваъдасини олди.

Темур оғир-босиқ, етти ўлчаб бир кесадиган одам бўлгани учун ва шу билан бирга, Тоштуғайнинг ёлғон сўзлаши эҳтимолини ҳам кўзда тутиб, дарҳол фалон қиласиз демади. Ўзини бепарво кўрсатиб, ҳолатни теран ўрганди, бу орада вақтдан ҳам ютди. Тўхтамиш муваққат зафар кайфи билан ўзини йўқотиб турган пайтда у бўлажак уруш тараддудини кўрди. Сўнгра азму жазм ила Туркистонга қараб юрди...

Шундай қилиб, Ўрол тоғларидаги, Ёйик дарёси қирғидаги майдон жангига Темур ғалаба қозонди. Қонли урушдан сўнгра, қўшиннинг қаттиқ чарчагани ҳисобга олиниб, бу маконда дам олишга қарор берилди. Оқшом тушаркан, чодирлар янгидан тикилди. Темур Тўхтамишни қувиб кетгандарнинг қайтишини кутмоқда. Унинг гап-сўзларидан интиком олишни кечиктирмоқчи экани сезилиб турибди. Хуллас, бу кеча шу ерда қолишиди. Эрта билан, қуёш ҳали уфқнинг қизарган дудоқларидан ўпмай туриб, юртга қайтиш буйруғи янгради. Улкан ўрду қора булутдай қўзғолиб, Самарқандга қараб йўл олди.



XXI. ИНТИҚОМ

Энди турк қавмлари ичидә Темурга қарши курашаётган биргина Тұхтамиш қолғанды, холос. Бошқа ҳеч бир таҳлика йўқ, шунга биноан Темур бу одамни маҳв этишини ўзининг ва салтанатининг тинчлигини сақлаш учун энг керакли иш деб ҳисобларди.

У Тоштуғайни қўйиб юбориш ниятида эмас. Чунки Тұхтамиш тек турмаслигини биларди, яна одам ва аскар тўплаб, ўзига қарашли ерларга ҳужум уюштириши мумкинлигини тахмин қиласади.

У арқонни узун ташлади ва тўрт йил кутди. Тўртинчи йилнинг охирларида Тұхтамиш қайтадан бош кўтариб, нонқўрлик йўлига кирганини унинг олдидан келган хабарчидан билиб олди.

– Ҳазрат, – деди хабарчи, – улар қишлоғимизга келган даёқ қилмаган ваҳшнийлигу одобсизликлари қолмади!..

– Нималар бўлди?

– Ҳазрат, улар уйларни бузиб, етимларнинг бошини кесди! Ҳайвонларни чавақладилар, кексаларни бўғиб ўлдиридилар!..

– Кексаларниям ўлдиришдими?..

Темур хабарчидан бу гапларни эшитаркан, газабдан сочлари тик бўлиб, ҳурпайди. Чунки турклар одатига кўра кексаларга урушда дахл этилмас, улар доим қўриқланар эди. Тұхтамиш бу одатни бузганди.

– Ҳа, ҳазратим... Энг даҳшатлиси, хотинлар кўчаларда қип-яланғоч қилиб ҳайдалди!..

– Нима дединг?!

– Ҳа, ҳазратим, шундай. Қанча касал, ногирон, ярадор бўлса, барчаси турли қийноқлар билан ўлдирилди...

– Ногиронлар ҳам-а?

— Ҳа! Қанчалар ожизу бечоралар от қүйругига боғланиб, тошу тупроқда судратилди...

— Сўнгра?..

— Сўнгра не бўларди, ҳазратим, энди бу тарафларга қараб юришиди...

— Қаердан йўлга чиқишиди?

— Дарбанддан. Ҳозирда Озарбайжонга ҳужум бошлаш арафасида туришибди...

— Ҳа-а, энди бу золимга ҳаддини билдириб кўйиш керак! — деди Темур салмоқлаб. — Барча хиёнату ёмонликларининг хунини энди тўлайди, мен ундан ўч оламан! Ҳозиргача бу ишни қилсайдим, қанчадан-қанча кексалару етимлар, ногиронлар, аёллар, ожизу бечоралар балки ўлимдан омон қолармиди... Энди ўшалар учун ҳам интиқом олмоқлигим керак!.. Эҳ, бу одамлар, одамлар... Нечун бир золимга қарши бирлашиб, голибият чорасини қидиришмайди? Нечун ўзларига бечоралик, хорлик васфини лойиқ кўришади? Агар чандийки, улар битта-битта ҳолда кучсизу бечора эканлар, ҳа, битта-битта ўқ еб қирилгандан кўра бирлашиб, эзилишдан кутулишга интилсалар бўлмайдими?.. Яъниким, бир-бирига ўхшаш ўқлар бир ерга боғланса, синмагани каби, улар ҳам биргаликда эзилишдан кутулишади. Ортиқ эзилмайдилар. Ана шундай эзилмаслик имкони бор экан, нечун бунчалик мискин, жасоратсиз, такасалтганг ва танбал бўлишади?! Нечун?.. Ахир мен ҳам ҳукмдор бўлмай туриб ким эдим? Ёш бола, бечора бир йигит. Шундай меҳнат қилдимки, мақсадим йўлида ғайрат билан шундайин тиришиб интилдимки, бугунда бу салтанатга, ҳукмронликка эга бўлдим. Мана, мен ҳам ҳатто ногирон-ожизман, оқсоқман, аммо мени эзолмайдилар! Нечун қаршимда бўйин эгадилар, қани айт-чи, хабарчи? Ҳа, майли. Мана, қара, уларни ўлдирган Тўхтамиш ҳам мендан қанчалар қўрқади! Нечун? Чунки мен пешана тери тўкиб доим заҳмат чекаман, чунки мен дўстларим билан бирлашиб, душманларим енгиши номумкин ҳолга келмоқдаман!.. Ҳа, мен ёвларимни эзаман, йўқотаман, ўлдираман!

Хўш, нечун ўлдиրмас эканман? Нега эзмас эканман? Нечун йўқ қилмас эканман?

Мен эзиб-ўлдиримасам, улар мени ўлдиришади. Маҳв этмасам, улар мени маҳв этадилар.

Йў-ўқ, мен улар қаршисида ҳеч қачон бўйин эгмайман! Чунки менadolat ва ҳақ йўлидан бормоқдаман. Аввал қилганимдай, мана энди ҳам, бундан кейин ҳам, барча билан, ҳатто душманларим билан ҳам бирлашиб, рақибларни эзмоққа, ўлдирмоққа ва йўқ қилмоққа жаҳд этажакаман! Чунки бу менинг ҳаққим ва вазифамдир! Мана, ҳозир ҳам ишонаманки, ёвини ўлдирганда гуноҳ йўқ. Гуноҳ – ўлганда, эзилганда!..

Ҳа, шундай. Бундан кейин интиқом олиш учун яшайман, биргина ишим шу бўлади. Ҳозиргача бир кўпларини афв этиб, гуноҳларидан ўтдим, аммо бундан сўнгра кечириш йўқ! Ҳақ доимо ғолиб келади, мен бунга ишонаман. Шу давргача бир кўпларига совфалар бериб илтифот кўрсатдим. Эвазига не кўрдим? Салгина ўзларига келиб, жонланишлари биланок, мени янчиб ташлаш учун қутуришади, кўлларига ўзим берган ўқлар билан мени ўлдиришга интилишади! Хўш, мен ана шундайин нонкўр сотқинларнинг нимасига раҳм этай, инсоф қилай, лутфу марҳамат кўрсатай? Нечун кечириб, гуноҳидан ўтайин? Қиличим остида эзилсинларки, минбаъд ҳақсизлик қилишмасин! Ҳоинларни, душманларини эзмаган эзилади. Ҳа, эзишни мендан ўрганишсин!..

– Ҳазратим, лутфу марҳамат кўрсатинг...

– Хўш, энди аскарларимни урушга тайёрлаб, жангга киришаман! Аммо сизлар учун эмас, сизларни қутқазиш учун эмас, фақат оламга сабоқ ва ибрат бериш учун бўлади бу ишлар!.. Лекин шу Тоштуғай қанчалар сабрли бир инсон экан, а! Ҳе, офарин дейман унга! Мен орага тушмасайдим, мунофиқ ва сотқин Тўхтамишни у аллақачон ўлдиради. Менга хурмати туфайли қанча сабр этди-я...

– Ҳазрат...

– Менга Тоштуғайнин олиб келинг!..

Хабарчи изн истамоқчи, яна ҳазратим демоқчи эди, Темурнинг ҳайбатидан ларзага тушиб, сўзи оғзида, жим қолди ва у буйруқ бераркан, секингина ташқарига чиқди.

Темур энди ичкарида бир ёнартоғ мисоли гувуллаб, ҳайбатли овоз чиқаарди, чунки асаби бузилиб, ҳаяжону ғалаёнда ўртамоқда эди. У Тўхтамишнинг қайтиб келишини тахмин қилганди, фақат бу ўлка халқининг у золимдан қўрқишини, ваҳимага тушишини хаёлига ҳам келтирмаганди. Шу боис, вазиятдан сабоқ олиб, ўзича шундай аҳду паймон қилиб, қарор

бердики, бундан сүнгра инсоф, авфу марҳамат деган нарсаларни эмас, ёлғиз бир нарсани – адолатни ўйлади...

Шу пайт ичкарига Тоштуғай кириб келди.

– Ҳазратим, мени чақирирган экансиз, – деди қўл қовуштириб.

Темур ҳаяжонли товушда:

– Хабаринг борми? Тўхтамишиңг келаётган эмиш, мен сенга айтган эдим-а... – дея секингина пичирлади.

– Ҳа, ҳазратим, ярали ит бир ерда тинч туролмайди, – деди Тоштуғай. – Аммо бу гал жонимни койиттан бошқа бир иш бор. Буни қаранг-а, Тўхтамиш босиб ўтган ерларини ёқиб, бузиб, йиқитгани ҳолда, ҳамма ожизлар унинг қаршисида бош эгиб туришади!.. Халқнинг бу ишига, мискинлигига, одамзоднинг бу ожизлигига жудаям аччиғим келади!.. Улуғим, менимча, ҳар кимнинг, уйғоқ халқнинг фикри – сизга ўхшаб юксак, олийжаноб бўлишдир. Шунга биноан, ўзини ожиз ва бечора билган, марҳамат тилаганлар дунёда кўп эмас. Ўйлашимча, бу инсонларнинг умумий табиатига хос бир нуқсондир...

– Қанақа умумий табиат, Тугай? – дея ҳайрон бўлди Темур. – Бу қандай таъбир? Сенингча, демак, башарият комилан мискинми? Агар у фақат ўзини билиб-ўзини ўйласа, мафкурасини бирлик фикри билан ҳаракатга келтирмаса, душманга қарши бирлашиб, уни йўқотиш йўлида иттифоқ тузмаса, у ўз келажагини сақлаб қололмайди-ку ахир?.. Яъни, кўп замонларда бўлганидек, ўз яқинлари, aka-укаси унинг қонини сўради, ўз қариндошларию сафдошлари уни маҳв этиб, ер билан яксон қиласди!..

– Тўппа-тўғри, арслон хоқоним! – дея Тоштуғай Темурнинг оташин сўзларини ҳаяжон билан қувватлади. – Фақат мана шу фикрларни, бу энг керакли мафкурани авому оммага қандай тушунтириш лозим...

– Ишнинг бу томони ҳам бор... – деди ўйланқираб Темур. – Ҳа, бу ишнинг осон йўлини топгандайман...

– Қандай экан...

– Менимча, қай ўлкани фатҳ этсам, у ерда бир голибият достони, маҳобатли бир обида барпо этмоқ даркор. Дейлики, ёвлардан минг киши маҳв этилса, юз минг қирилди, дея овоза ва мишиш чиқариб, одамзодни қўрқитмоқ, ана шу

йўл билан халқни ўзига келтириб, эсанкиратиб, сўнгра эсини йиғишига мажбур қилмоқ...

- Ўшанда балки...
- Хўш, нима дейсан? Йў-ўқ, бунақаси кетмайди. Мен ана шундай ёлғон билан жаҳонга қўрқув солсам...
- Инсоният барибир кўзини очмайди, аммо тиланиб-эланниб келиб, гадойдай бўйин эгишади!..
- Ў-ў, жуда топиб айтдинг-да...
- Бу ишлардан мақсадингиз не ўзи, тушунмаяпман...
- Натижада...
- Ниманинг натижасида?
- Ахир бир душман менга енгилиб, бўйинсунгандан кеин, уни ёнимга олиб, вазифа бериб, истаган ишимни амалга оширишига мажбур этаман ва охирида...
- Аммо душманни бу тушунча ва ҳолатта қандай қилиб олиб келасиз?
- Уни ҳеч зўрламайман, ёнимда бирга юрганидан кеин, мен билан бир ишни қила бошлагач, менга ўхшаб фикр юритади-да. Ана шу тарзда душманни мендай ўйлашга ўргатаман...
- Ишқилиб, Аллоҳ муваффақ айласин. Аммо у ҳолда сизга қарши чиққан бошқа ёвларга ҳам индамасдан, юмшоқ муомала кўрсатиш мажбурияти ҳосил бўлади-ку?
- Йўқ, мен ёвларга шафқат қилмайман! Мен ўз ишларим билан дунёга, афкори умумияга дарс бериб, башарият ичидан кеккайиб чиққан турли бебош қўймондону султонларга ўз ҳаддини билдириб қўймоқчиман, холос. Токи улар ҳам мендай бўлишсин!..
- Агар бу ишларга муваффақ бўла олсангиз...
- Юмшоқ юраклик ва афв қилиш ҳисларимни қалбимда сақлаб, ичимда йиглаб, кўзёшларимни кимсага кўрсатмай юрсам, фоя йўлида тинимсиз интилсам, албатта, бунга эришаман!
- Бундан бош мақсадингиз нима, ҳазрат?
- Эл аро иттифоқ ва бирликни вужудга келтириш.
- Кимга қарши?
- Дин душманларига қарши.
- Бу иттифоқ кимлардан иборат бўлади?
- Турклардан, яъни барча туркийлардан!..

* * *

Тўхтамиш бир замонлар Мовароуннахр халқи орасида турк қавмларининг бирдан бир қаҳрамони сифатида танилган эди. Темур буни яхши билар, уни ўз йўлидаги асосий таҳлика деб ҳисоблагани учунми, ҳамма нарсани бир ёнга йиғишириб, фақат Тўхтамишга дарс бериб қўймоққа қарор берганди. Ҳа, у ўзига моне кучни, яққол кўриниб турган балони йўқ қилишга аҳд этганди.

Унинг келажакка боғлиқ юксак ва буюк тасаввурлари, режалари, бажаражак буюк амаллари бор. Уларга эришмоқ, олий орзуларига қовушмоқ, аскарлик шарафини туйиш, ғала-ба завқини тотиш лозимгина эмас, балки шарт эди. Очкўз ва нонкўр Тўхтамиш Темурнинг ёрдаму лутфларига жавобан фоят саркашлик ва куфрони неъмат ишлар қўрсатди, бунинг учун уни жазолаш, ҳаддини билдириб қўйиш бир томон, аммо бундан-да муҳими, ўз амри остидаги халқни келгин-дилар зулмидан қутқазиши, уларнинг интиқомини олиш, хусусан, Тоштуғайнинг отаси, кекса вазирнинг ҳам ўчини олиб, арвоҳини шод этиши айни фарз эди...

Шундай даҳшатангиз бир балонинг чорасини ҳозирданоқ қўриш, уни маҳв этиши – Қипчоқ ютидаги иккиюзли, жоҳил динсизларнинг исломият ва шариат олдидаги мағлубияти демак эди. Шуни билатуриб, унга қарши курашмаса, уни йўқотмаса, бу катта нуқсон Темур тиклаётган, шариат анъаналари ила мустаҳкамланаётган бир давлатнинг йиқилишига ҳам олиб бориши мумкин эди. Зотан, бутун фаолиятида ўзининг туркий жанговарлигига ва исломиятга суянган Темур буни яхши биларди.

Хуллас, бу галги хужум даҳшатлироқ ва ваҳшатлироқ бўлиши кўриниб туради.

Темур алалажала, яшин тезлигида чопқинга тайёрланди. Сўнгра амри остидаги қўшин билан дарҳол йўлга чиқди. Бу черик тўпи шундайин учиб борардики, жанговар карвон оёқлари остидаги улкан замин гўё кичрайиб қолгандай туюларди...

Темур тахтиравонда ўтирганича ёнидаги Тоштуғай билан сухбатлашиб борарди.

– Бу сафарги зарбимиз ўта даҳшатли ва шиддатли бўлади!

- Ишооллоҳ, ҳоқоним!
- Қалай, энди интиқомдан умидвормисан, Туғай?
- Ҳоқоним менга доим сабр қил дедилар-ку...
- Ҳа-а...
- Унинг учун сабр қилмоқдаман.
- Балли, сабр этиш ва натижани кўриш лозим. Фақат олдин менинг сўзларимни дикқат билан тингла.
- Жон қулогим билан эшиштаман, ҳазрат...
- Бу гал уларни тумтарақай қилиб қочирамиз ва эзиб ташлаймиз!
- Хон яна қочиб қолса-я...
- Сен қувасан.
- Хўп бўлади, раҳмат... – дея Тоштуғай ўч олишга рухсат текканидан миннатдорлик билдириди.
- Бир бўлик сенга қувишда ёрдам беради.
- Ҳоқоним, изнингиз билан, у бўликни бошқа кишининг измига берсангиз, мен бир ўзим қувиб, отам интиқомини ўзим олсан дегандим...
- Бўлади. Аммо нечун кўмақчи бўликни истамаяпсан?
- Чунки қўйл остимдагилар бирор ножӯя иш қилиб қўйиши ҳам мумкин-да.
- Йўғ-э...
- Ёки орзунгизга хилофанд, аскарларни бошқа томонга жўнатиб юбориш зарурати туғилиб қолар...
- Балки.
- Ва ёким, ихтиёридаги лашкар менинг фикримга тескари ҳаракат қилиб қўйиш эҳтимоли ҳам бор.
- Кўнглинг тўқ бўлсин, Туғай. Ҳеч бир амрингта монелик қилишмайди, фикрингта қарши чиқишмайди.
- Тўғри, тақсир, монелик қилишмаса-да, монеликка сабаб бўлиб қоладилар-да...
- Бор гапинг шуми?
- Ҳа, тақсир. Хуллас, ёнимдаги аскарлар душманимдан ўз истаганимдай ўч олишимга халақит беришади.
- Хўп, Тоштуғай, айтганингдай бўлсин. Аммо унинг калласини менга олиб келасан.
- Бўпти! Каллани олдин Ўрус ҳазратларига олиб бормоқчи эдим, аммо энди сизга олиб келишга сўз бераман.
- Сўз ва аҳдингда турарсан деган умиддаман...

Шу пайт бир чопар тахтиравонга яқинлашиб, Темурга қаратады:

– Тұхтамиш икки соатлик бир ерда әкан, – деди.

Бу хабардан сүнгра Темур амирлар ва бекларни чақириб, маслағатлашды ва шундай амр берди:

– Күшин шу ерда тұхтаб, бир муддат тин олсин. Ёв томонға кузатувчилар, күзчилар юборилсін. Улар атрофни текшириб, вазият хусусида хабар жүнатып туришсін!..

Темурнинг түрт тиргакли чодиридан ташқары йўл учун тайёрланган бир устунли, муҳташам қуббали чодири ҳам бор эди. Барча чодирлар қурилди. Темур бекларни ўз чодирига даъват этди.

– Бироз муддатдан сүнгра урушни бошлаймиз, – деди у. – Тұхтамишни танийсизларми?

– Йўқ, тақсир... – деган овозлар тараалди.

Дарҳақиқат, умаро ва юксак мансабли беклар ҳам Тұхтамиш ҳақида әшитишган бўлса-да, ўзини кўришмаган, танишмас эди.

– Наҳотки ичларингда бирорта ҳам уни танийдиган одам йўқ?..

– Тақсир, қулингиз... – деди беклардан бирининг ёш хизматчиси, Ҳазар Қоя деган йигит.

Темур унга:

– Үнда сени Тұхтамишни қувладиган бўликка қўмон-дон этиб тайинлайман. Уни қувиб бориб тутасан! Агар бирор дақиқа унинг ортидан айрилсанг, ўзинг биласан! – деди.

Баъзи вакиллар ва бекларга қўл ишорати билан таъкидлаб:

– Сен ўнг томонни, сен эса сўл тарафни бошқариб борасан! – дея буюрди. – Мен марказда бўламан.

Шу чоғ ташқаридан, бир чопар келди, дея хабар беришиди.

– Кирсин! – деди Темур.

Ичкарига олдинги мэррани кузатиб-текширувчи кўзчиларнинг бошлиғи кирди.

– Нима гап? – дея сўради Темур ундан.

– Тақсир, Тұхтамиш ҳеч нарсадан хабарсиз, ўрдуси билан шу томонга келмоқда...

Темур шартта ўрнидан турди.

– Қани, юринглар! – дея барчани чорлаганича ташқарига йўналди.

У оқсоқланганича, арслон каби савлат билан чодирдан чиқди. Ёнида турган ўнг қўйл қўмондонига қараб:

– Лашкарингга буюр, дарҳол жангга ҳозирлансан! – деди.

– Бош устига! – дея қўмондон чопиб кетди.

Темур олдинда, бошқа улуғ ҳарбийлар унинг ортидан юра бошлишди. У атрофга қўз ташлади. Ўнг томонда улкан бир тепалик бор эди. Тепалик улар турган водийни ой каби ўраб олганди. Тўхтамиш орқадан келиб, ўша ерда дам олишга мажбур эди. Темур шуларни ўйларкан, Тоштуғайга қаратади:

– Сен анави, ўнгдаги тепа устида қувувчи аскарлар билан бирга пистирмада кутиб ёт! – дея буюрди. – Керак пайтда до-вулдай қўзголиб, ўзингни кўрсатишга файрат қил!

– Бош устига! – деди Тоштуғай ва буйруқни бажаришга шоҳди.

Темур сўл тарафдаги қўмондонга бурилиб:

– Сен шу чап ёнбагирдаги дарахтлар орасига беркин, қалқон бўласанлар! – деди.

Ўша пайтда ўнг қўйл қўмондони шошганича қайтиб келди.

– Лашкар урушга шай! – деди.

– Яхши, – деди Темур хотиржам товушда. – Сен ҳам аскаринг билан анави ўнг ёндаги дарахтзорга кириб ол! – дея буюрди унга. – Қани, ҳамма ўз ишини бажаришга отилсан!..

Шу ондан бошлаб ҳар ким енгил ва чақон ҳаракатлар билан ўз бурчини уддалашга киришди.

Ҳайбатли арслон амиру умароси билан қўшиннинг жанг олдидаги ҳолатини кўздан кечириб чиқди. Бир соат мобайнида барча аскар буюрилган нуқталарга жойлашди. Кўринишда Темурнинг марказдаги лашкари кўзга ташланарди, холос. Улар ҳам бироз олдинга силжиб, ойсимон тепанинг ўнг учидан бурилгач, бир қисми паналиқда фойиб бўлди...

Шу аснода душманлар ҳам қўриниб қолди.

Тўхтамиш энг орқада келарди. Бир тўда қароқчилар гурӯҳи алоҳида, илдам ҳаракат қилаётгани кўзга ташланмоқда...

Қипчоқ лашкари ёнбагирнинг ўртасига етиб келди. Бу пайтда Темур қўшини билан уларни орқадан ўраб олган эди. Бирдан марказ лашкар орасидан тараалган карнай-сурнайнинг жанговар товуши еру кўкка, юракларга жўштирувчи ларза

солди. Шу чоғда Темурнинг ўнг ва сўлдаги аскарлари яшин тезлигига ҳаракатга киришди.

Тўхтамиш ваҳимали овозларни эшитиб, шошилиб қолди, таҳлиқанинг не қадарлигини чамалай олмасдан, бироз саросимага тушди. Атрофга кўз югуртиаркан, ўраб олинганини англади. Тўсатдан пиёдалар ҳужумга ўтди. Темур аскарлари марказдан, ўнгу сўлдан зарба бермоқда эди...

Шу пайт Тоштуғай ўнгдаги тепадан ўз бўлиги билан отилиб чиқди, урушаётган икки қўшин орасига ёриб кириб, Тўхтамишга яқинлашиш, уни қўлга олиш тараддудига тушди.

Ҳар икки тарафдан тараваётган уруш садолари шиддатланиб борарди. Тўхтамиш қўшини пастирма йўлдан қочишга уринар, аммо яна Темур аскарларига дуч келиб, талмовсираган ҳолда маҳв бўлмоқда эди. Тўхтамиш ишлар орқага кеттанини фаҳмлади ва қаватидаги ёварлари билан бирглашиб қочмоққа тутинди, ўзини очиқ ёнга урди. Юз кишидан элликтачасини қурбон бериб, кейин, уҳ, қутулдим, дея умидланиб қочаркан, нариги томондаги аскарлари ўлим-ла панжалалиб, қон тўқмоқда эди.

Тоштуғай пистирмада ётган жойдан ярим соатлик масофадаги бир ердан ўтиб бораркан, Тўхтамиш орқадан келган бир дағдағали товушни туйди:

– Қаерга қочсанг-да, ўлим сени топади!..

Тўхтамиш от жиловини сал тортиб, илкис ортига боқди.

Уни қувиб келаётган Ҳазар Қоя гуруҳи бир зумда кўринмай қолди. Шу аснода Тоштуғай ҳам ёв изига тушиб, кўзлардан фойиб бўлди...

Таъкиб бўлинмаси ҳужум қилмаса-да, Тўхтамиш жон кўркувсида отини қичаганича қушдай учиб борар, уфқда бир нуқтадай кўзга чалинар эди. Аммо унинг орқасидан изма-из кувлаб бораётган, нуқта мисоли кўринаётган яна бир киши ҳам бор эди. Хизир Қоя бўлиги-да бор кучини ишга солиб, олисдаги ўша икки кишини кўзлаб от чоптиришмоқда...

Бериги тарафда эса уруш давом этмоқда, жон бозори қизигандан-қизиб ётар эди. Тўхтамиш лашкари қўмондоннинг қочганини сезиб, умидсиз талвасада қолди ва айримлар қиличларини ерга ташлади... Ана шунда орқадан бир қаҳрли овоз эшитилди:

– Ур! Ур-а!

Темурнинг бу буйруғи аскарларни янада жўштириб юборди ва улар ёвни шафқатсизларча маҳв этишга киришдилар. Тўхтамиш чериги қочишга тутинди. Ёйи Сибиргача қувибқириб борилди, охирида биттаям аскар қолмади.

Темурнинг қўшини зафар қозонди. У музaffer лашкарни кўздан кечираркан, кимлар омон қолиб-қолмаганини аниқлаш мақсадида йўқлама бошлатди.

– Ўнг ва сўл қўл аскарлари ҳамда қўмондонлари...

Сўл қўл лашкарининг қўмондони чопиб олдинга чиқди.

– Соғ қўл қўмондони шаҳид тушди, – деди.

– Унда сен, сўл қўл қўмондони, аскарга буюр, тин олсин!

– Бош устига, хоқоним!

– Дарров чодирлар курилсин... Хўш, қувгувчи гурухдан қандай хабар бор?

– Хоқоним, ҳозирча ҳеч бир дарак йўқ.

– Майли. Чодирлар тикилсин! Қувгувчи бўликнинг қайтишини кутамиз. Барча лашкарининг истироҳати таъминлансин!

Темур буйрук бериб бўлгач, кўзларини уфқа қадади. Беғубор, ўткир нигоҳи у томондаги бир нуқтага тақалди ва ёнидагиларга:

– Қаранг, бирор келмоқда, – деди.

Ҳамма ўша тарафга қаради.

– Тўғри, кимдир келяпти... – дедилар.

* * *

Шундай қилиб, бериги тарафда Тоштуғай таъқиб қўли, яъни қувувчи аскар бўлигидан ажралиб, тўсатдан гойиб бўлганди. Таъқиб қўли уфқда элас-элас кўзга чалинаётган икки нуқта ортидан қувлаб борарди. Илгаридаги отлиқлардан бири Тўхтамиш, бири Тоштуғай эди.

Роса қувлашди, роса чопишиди. От кучи қанчалик бўлса, ўшанга муносиб учишди, аммо охири отлари шу ҳолга келдик, бечора жониворлар гоҳ мункиб кетар, гоҳ мажолсиз оёқтираб, таққа тўхтаб қоларди.

Ниҳоят, батамом ҳолдан тойдилар. Тоштуғай учун Тўхтамишни тутадиган вазият юзага келди. У белидаги камандни ечиб, олдинда қочмоққа тиришаётган Тўхтамишга

отди ва уни банди этиб, ўзига қараб тортди. Шу ҳолда ҳам учарга шай от узангилари Тўхтамишнинг оёқларидан чорасиз айрилди. Орқадан келган Тоштуғай отини қичаб, рақиб уловининг ёлидан тутиб тўхтатди. Тўхтамиш тугаб-битганди.

Тоштуғай отидан тушиб, Тўхтамишни даст кўтариб, уловидан индирди ва ерга ётқизиб қўйди. Ёнидаги тери сувдонини очиб, душманининг оғзига сув томизди. Бироз кутди. Сал ўзига келган Тўхтамиш сапчиб ўрнидан турди ва қиличини яланғочлаб, унга ташланди. Тоштуғай ҳам онида қиличини суфуриб, у билан олиша кетди. Олишув қизигандан қизиди. Тоштуғай бир-икки ҳамладаёқ Тўхтамишни ўлдириши мумкин эди, аммо ўчини секин-секин олиб, узоқ кутилган интиқом лаззатини симирмоқ истарди. Бирдан унинг кўзлари Тўхтамиш бўйнидаги каманд боғларига қадалди ва жуда усталик билан бир силтаб, рақибини ортга тисарилишга мажбур этди. Энди мақсадга етгандек эди. Чунки ортига тистирилган Тўхтамиш бўйнидаги ипнинг бир учи Тоштуғайнинг оёқлари остида қолганди. Каманд боғини босиб турган Тоштуғай қаршисидаги Тўхтамиш мувозанатини йўқотиб, ерга юмалаб тушди.

- Ҳайҳот, ўлдим энди! – дея умидсиз бақирди Тўхтамиш.
- Э, нега ўласан? – деди таҳқиромуз оҳангда Тоштуғай.
- Мағлуб бўлдим...
- Ҳар мағлубият ўлим билан жазоланмайди...
- Билмадим...
- Нега билмайсан? Қани, бир гаплашайлик-чи, билиб оларсан...

Тоштуғай душманини каманд или билан чирмаб боғлагач, унинг қоқ рўпарасига ўтирди. Узоқларга бир кўз отди, уфқда ҳалиям хеч ким кўринмасди.

- Сени ҳозирнинг ўзидаёқ ўлдиришим ёки тириклиайн кўмиб ташлашим мумкин, – деди Тоштуғай.
- Қўлингдан келганини қил...
- Менга айтадиган сўнгги сўзинг борми?
- Мендан не истайсан ўзи? Қанча ақча керак?
- Қанча берасан?
- Хоҳлаганингча...
- Хўп, белингда қанча ақча бўлса, барини менга топшириб, яна шунча бераман, дея ваъда этсанг, қўйиб юбораман...

- Хўп, сен айтгандай бўлсин! Аммо мени қаердан топсан-у ақчани қандай оласан?
- Уни менга қўйиб бер, қандай бўлмасин ҳаққимни оламан!
- Қандай қилиб?..
- Бу жуда осон. Чунки сен қайда бўлсанг, мен ҳам ўша ерда бўламан-да...
- Бу мумкин эмас. Чунки сени Темур қидиртиради, қайда эканлигингни эшитиб, иккимизнинг бир ерда эканлигимизни билиб қолса, иковимизни ҳам...
- Мени Темур танимайди-ку!
- И-е, шундайми? Сен Темурнинг аскари эмасмисан?
- Йўқ.
- Унда... кимга тобесан? Кимнинг аскарисан?
- Тўхтамишнинг!
- А-а! Мен Тўхтамишман-ку!?
- Йўқ, мен сени танимайман. Сен Тўхтамиш эмассан, Темурсан! Тўхтамиш ҳозир жангда... Сен Темурсан, Тўхтамишдан қочиб юрибсан...
- Асло ундей эмас!..
- Ха, айтгандай... Ха, сен ё Ўрус устига очкўзларча юриш қилган Тўхтамишмисан? Шундайми?
- Ха...
- Ўша кекса вазирини ўлдирган Тўхтамиш, а?
- Аммо у...
- Нима аммо?!
- Ҳозир у нарсаларни эслашдан не фойда бор ахир?..
- Ўзимча эслаб қолдим-да... Қани, ростини айт-чи, ўша кекса вазирни сен нега ўлдиридинг?
- Билмадим...
- Унда... мен ҳам сени ўлдираман!
- Нега ахир?
- Негалигини билиб оласан! Сен мени ақча билан алдамоқчисан-да, а? Мени пасткаш бир манфаатпараст деб ўйладингми? Билиб қўй: мен – сен ўлдирган ўша кекса вазирнинг ўғли Тоштуғайман!..
- Аломон!.. Мени кечир...
- Кечирмоқ йўқ! Юр-чи, қани...
- Не қиласан?

— Жонингни менга таслим эт!..

Тоштуғай ёнидаги түрвани очиб, ундан бир дона нонни олди, сувдонини ҳам очди.

— Ёт! — деди унга нафрат билан. — Сенга бу охирги зиёфат: нон, сув. Истагим шуки, буни ётган ерингда ейсан! Луқмалар ҳалқумингдан ўтадими, кўрай-чи?..

— Аллоҳ ризоси учун...

— Тек тур, ит! Тилингни тий, сен Аллоҳни танимайсан!..

Тоштуғай Темурнинг ҳузурида исломни қабул қилган, тўғри ва одил йигит эди. Тўхтамиш луқмани секин-секин еркан, вақтдан ютиб, балки қутулиб кетарман, деган умидда Тоштуғайга боқди. Бироқ унинг интиқом тўла кўзида ўз ажалини кўрди, барча умид фойдасизлигини англади ва тақдирга тан бериб, жимгина чўзилди. Шу пайт Тоштуғай бир сакраб Тўхтамишнинг кўксига минди, тўсатдан рақибининг қўлидаги ханжарни кўриб қолди. Бир ҳамлада қуролни тортиб олди ва белидаги арқонни ечиб, уни яхшилаб ўраб-чирмаб боғлаб, ўлиқдай қилиб яна ерга ётқизиб қўйди. Ҳалиги ханжар билан Тўхтамишнинг оғзини йириб очиб, олдиндан тайёрланган нон бўлагини тикди. Тўхтамишнинг оғзи нонга тўлиб, ёпилмай қолди. Тоштуғай бир қўли билан унинг бошини бостириб, нариги қўли билан сувдондаги сувни нон устига тўқди. Нон Тўхтамишнинг оғзида шиша бошларкан, Тоштуғай ўрнидан турди.

Шу пайт кувувчилар қисми бу ерга етиб келди. Тўхтамиш нафас ололмай жон ҳалпида талпинар, тинимсиз ҳик-ҳиқлар эди...





ХХII. ҚИПЧОҚ САФАРИНИНГ СҮНГИ

Темурнинг кўзига уфқда кўринган қора қувувчи бўликнинг унга юборилган чопари эди. У икки соат от чоптириб, ҳукмдорнинг хузурига етиб келди.

- Нима гап? – дея сўради ундан Темур.
- Хоқоним, Туман яқинларига етиб борилди, Тўхтамиш кўлга олиниб, ўлдирилди, – деди хабарчи.
- Ҳа, балодан кутулибмиз. Тоштуғай қани?
- Лашкар билан бирга келмоқда.
- Жуда соз, – деди Темур. Сўнгра ёнидагиларга қарорини билдириди: – Бу оқшом шу ерда қоламиз.

Кечаси таъқиб қисми билан бирга Тоштуғай ҳам қайтиб келди.

Эртасига юртга қайтиш бошланди.

Бу урушда, аслида, унчалик катта зарару зиён кўрилмади. Сўгиш натижасида Қипчоқ минтақасининг бир тарафи, ўша даврда янгигина ўсаётган руслар ўлкаси улкан Чин ва Мовароуннаҳр мамлакатлари ўртасида яккаланиб, ночор ҳолатга тушиб қолди.

Қўшиň қайти.

Ноғора ва карнай-сурнай овози авжланди. Темур тахтиравонида ҳайбат тўкиб ўтиради, орқадан эса саф-саф лашкар келмоқда. Шу аснода Тоштуғай Темурнинг тахтиравонига ёношиб келди ва:

- Хоқоним, сизга бир совға бор, – деди.
- Қанақа совға?
- Кўрсатайинми, ҳазрат?
- Қани...
- Мана, хоқоним... – дея Тоштуғай қўлидаги ўроғлик нарсани унга пешкаш этди.

Темур совғани очиб кўриб, хотиржам жилмайиб қўйди.

- Кўп яхши! – деди. Сўнгра буюрди: – Ўрду тўхтасин!

Хоқоннинг амри дархол қўшин бўйлаб тарқалди ва барча тўхтади.

– Каллани найза учига боғлаб, Тоштуғайнинг қўлига беринглар! – дея буюрди Темур.

Буйруқ бажарилди.

Қўшин қўниб ўтган ҳар юртда халқ Тўхтамишнинг аҳволини кўпарат, ҳайрат қиласар ва ибрат олар эди. Музаффар черик бир шаҳардан ўтиб кетаётганда, оломон орасидаги бир бола онасига:

– Онажон, қўрқиб кетяпман... – деди.

– Қўрқма, болам, – деди она. – Қўрқмаки, Тўхтамиш каби золимлар қўлидан қутулишнинг йўли шу! Шундай бўлиши керак...

Темурнинг фалсафасидаги ҳикмат ўша онанинг ана шу бир оғиз сўзида ўз ифодасини топганди.

Лашкар йўлида давом этмоқда. Қипчоқ сафари ана шундай якунланган эди. Темур бу ҳақда ўйларкан, чуқур нафас олди. Зотан, у бўлажак катта юриш олдидан бирозгина тин олмоқ учун фурсат ҳам қозонган эди...



ХХIII. ЭРОНЛИК ТЕМИРЧИНИНГ ФИТНАСИ ВА ТЕМУР ҚЎШИНИНИНГ МАҒЛУБИЯТИ

Темур ҳокимиятини янада мустаҳкамлаш, салтанатини тагин ҳам кенгайтириш, келажакни яна ҳам порлоқ қилиш мақсадида барча фидокорликларга бош урар, керакли сиёсий ўйинлар ва ҳарбий ҳийлалар режасини тузар, уларни амалга ошириш ва истиқболда ҳар томонлама кучли давлат қуриш учун гайрат кўрсатар эди.

Муваффақият ва зафар қозониш йўлидаги маълум таж-рибалар ва ҳарбий ҳийлаларнинг деярли барчасидан Темур унумли фойдаланган эди.

Бу ҳийлаларнинг энг оддийлари, ҳатто жудаям осондай туюладиганлари ҳам бор эди, фақат у сиртдан шунаقا кўринарди, унинг асл маъно-моҳиятига содда кишиларнинг ўлсаям ақли етмасди.

Масалан, Темур тасарруфига киритмоқ истаган мамлакатнинг ҳукмдорига хабар юбориб, уни ўз тахти ҳимояи ҳоқониясига олмоқ ниятида эканини билдириши этиб ортарди. Кўдинча бундайин таклифни жон-жон деб қабул қилишарди. Ҳатто баъзида қарши томоннинг ўзидан шунаقا илтимосу талаб билдирилар эди. Кўшни ўлканинг ҳукмдори ёки Темурдан кучсиз ва ундан қўрқсан ҳокимлар ҳам тўғридан-тўғри унга мурожаат этиб, ундан тахти ҳимоясига олишини сўрар эди.

Ана шунаقا ҳийла ва мажбуриятларни ижоду ихтиро қилиш ва бу восита билан ҳокимиятини кенгайтириш сиёсати Темурнинг доимо шуғулланиб келаётган муҳим ишларидан ҳисобланарди...

Дейликки, у бир юртни қўлга олишни ният қилса, режасига мос келса, унинг ҳукмдорини қариндош бўлишга дарьват этарди. Бу энг оддий сиёсий тутум унинг учун ўйинчоқдай бир гап эди. Темурнинг бу одатини билган айрим кичикроқ

ўлка бошчилари ўзлари ташаббус кўрсатиб, қариндошлик таклифи билан унга бош уриб келишарди.

Элхонлар сулоласига мансуб Озарбайжоннинг сўнгти хукмдори ҳам ана шу усулни қўллаб, қизини Темурнинг невараси Пирмуҳаммадга никоҳлатиб бергач, тахтни мустаҳкам эгаллаб олди. Шундай қилиб, қадимдан тили ва эли турк бўлган Озарбайжон Темурнинг салтанатига боғланди.

Ўша воқеалардан кейин Темур белужлар ва афлонлар юртини ҳам эгаллаганди.

Энди жаҳонгир қаршисида фатҳ этилмаган биргина Эрон қолганди, аммо эронликлар унга қарши қатъий оёқ тираб туришарди. Темур эса ўзини уларнинг қаршилигини гўё кўрмаётгандай бепарво тутар, аслида қулай фурсатни кутмоқда эди.

Эрон сафарига боғлиқ зимдан тузатётган режа ва ҳийалалари иш бермаётганидан Темур бадтар ғазабланиб, охири тоқати тоқ бўлди. Бир куни кенгашчиларини тўплаб, маслаҳатлашиб, ҳарбий сафарбарлик эълон этди.

Бу гап омма ва қўшин орасига дарҳол ёйилди.

– Темур хоқонимиз сафар учун буйруқ бердилар! – хурсанд қичқирди бир аскар.

– Ҳа, шунақа. Яна йўлга чиқамиз, – деди унинг сафдоши.

– Қаёққа?

– Кўрамиз-да.

Шунда учинчи аскар билагонларча уларнинг суҳбатига кўшилди:

– Қаёққа бўларди, Эронга-да!

– Эронгами? Эронда нима бор?

– Э, нима бўларди, зафар бор, зафар!.. – деди аскар мағрур товушда.

– Яшасин, зафар! Яшасин, зафар!.. – деган хитоблар янгради.

Темурнинг қарамогидагилар ҳам ўзига ўхшаган, уруш ва зафардан қувонадиган кишилар эканлиги сўзларидан билиниб турарди. Аммо вазиятта бошқа томондан назар ташланса, ўзгача ишларнинг амалга ошаётганини кўриш мумкин эди.

Темур бир ёнидан жой олган Ўлжой Турканга, нарироқда ўтирган Тоштуғайга бир-бир қараб қўйиб:

– Ўлжой, – деди. – Мана, сенга бир қариндошки, ҳархолда, у сенга ўз туғишганингдан ҳам фойдалироқ бўлишига ҳеч шубҳам йўқ.

– Шунча лутфу илтифотингиз ёнида яна менга щундай яхши қариндош топганингиз учун жудаям миннатдорман, – деди Ўлжой Туркан.

– Биз ҳозир Тоштугой билан музокара қиласадиган масаламиз анави Ўғуз Арслонга боғлиқ ишдир, – деди Темур. – У муҳтарам қариямиз вафот этганидан сўнгра, сен ҳам биласанки, қотилларнинг изини кўздан қочирдик... Шу вазиятдан келиб чиқиб, фикримча, у қадрдонимиз бажарган ишни бошқа бир муҳтарам инсонга топширмоғимиз даркор...

Ўлжой Туркан мушфиқ ва итоаткор нигоҳ билан Тоштугойга бир қараб кўйди.

Шунда Тоштугой:

– Сизнинг шунчалар катта ишончингизга лойиқмасманов... – дея хижолат чекди.

Аммо Темурнинг ҳукмфармо товуши унинг сўзларини босиб кетди:

– Бу хусусда ортиқча тавозега ўрин йўқ! Сенга бўлган ишончу ҳурматнинг ўртадан кўтарилишини истамасанг кепрак?

– Лаёқатига кўра қилинган бундайин илтифотни рад этмаслар ҳар ҳолда... – деди Ўлжой Туркан.

Шошиб қолган Тоштугой ҳам:

– Ишончу эътиборинглар учун минг қуллуқ!.. – деди мажбуран ва ҳурматан ерга бокди.

Ана шундан кейин Темур гапнинг индаллосига ўтиб, қалбининг тубида ётган эски ярасини очган ништардек совуқ товушда деди:

– Сиздаги интиқом иллати, ўч оташи бизда ҳам бор ҳамда сиздагидан кўра шиддатлироқдир. Фақат уни сизга билдирамдим, улардан ўч олишингизни кутиб юрдим... У амалга ошди.

– Тўппа-тўғри, – деди Тоштугой хоқоннинг сўзини маъқуллаб, – сояйи давлатингизда қотилни маҳв этдим!..

– Яшсанг! Мана энди қасос олиш навбати бизга келди, – деди Темур салмоқлаб. – Аслида бу ерларнинг эгаси, волийси Қазаған вазир деган отамиз бўлгучи эди...

– Ҳа-ҳа, биламан, Қазаган вазир жуда машхур зот эдилар, – деди Тоштуой.

– Ана шу сиз билган машхур зот, қарангки, ҳозиргина тутинган отангиз Ўлжой хонимнинг оталари эди. Тўйимиздан кейин у кишини душманлари қатл этишганди...

– Ким эди у қотиллар? – сўради Тоштуой.

– Шошилманг, бироз тўхтаб туринг. Улар тўғри Чигатой хони Туғлук Темур ёнига қочдилар. Ҳолбуки, сўнградан сulton отамизнинг ўрнига мени тайинлаб, ўша қотиллар билан бирга эканини билинтириб қўйди... кейин эса Туғлук Темур ҳам вафот этди...

– Сўнгра не бўлди...

– Қотиллар изидан Ўгуз Арслон деган эски, содик хизматчимни жўнатдим. Ундан келган мактубларга ва кейин биззот ўзидан эшигтганимга қараганда, улар Ҳиндистонга қочишган. Такдир экан, Ўгуз Арслон ҳам қариб, дунёдан ўтиб кетди. Биз ҳам доимо кўнглимида сақлаганимиз у қасос ўтини вақтинча унугандек бўлдик...

Йўқ, унумадик, мавриди келмагани учун, арқонни узун ташлаб қўйдик...

– Ҳозир уларнинг қаердалиги маълумми, хоқоним?

– Ҳиндистонда бўлсалар керак ҳалиям, чунки бошқа ерда беркиниб, сақланишлари қийин, – деди Темур.

Шу чоғ Ўлжой Туркан сұхбатга аралашиб, шундай деди:

– Укам, ҳокимиётта эришгандан бошлаб бош мақсадимиз ёвлардан ўч олиш эди. Аммо тахту шуҳрат инсонга баъзи нарсаларни сал унугтириб қўяркан-да...

Шундай деркан, хафалигини билдиromoқчида гинали нигоҳ билан Темурга назар ташлади.

Темур унга жавобан:

– Кечирасиз, интиқомни унугтаним учун эмас, аксинча, ўч олмоқ ниятида, ёвлардан кучлироқ бўлишга интилиб, қасосни унугандай кўриндим...

– Энди-чи?

– Мана эндиликда интиқомни унумаганимни ўз ташаббусим билан исботламоқчиман.

– Раҳмат, – деди Ўлжой хоним.

Темур ўрнидан қўзголди, ҳамон унинг қаршисида таъзимда тик турган Тоштуғойнинг кўлини бақувват қўллари билан қисиб:

– Энди, азизим, сизнинг Ҳиндистонга кетмагингизни, у ерда қотилларни топишингизни ва мендан олажак буйруқقا кўра ҳаракат қилишингизни талаб этаман! – деди.

– Бош устига, хоқоним! – деди Тоштуғой.

Шунда Ўлжой яна сўзга аралашиб:

– Бизга интиқом олишимиз учун ёрдамчи бўлинг! – деди.

Хотинининг бу андишасизлиги Темурнинг жаҳлини чиқарди ва у:

– Сенга мен ёрдамчи бўлгандай! – дея ўшқирди.

Тоштуғой Темурга миннатдорлик билдириб бош эгди, хайрлашиб, чиқиб кетди.

Шундай қилиб, Темур бир томонда Эронга юриш бошлаши, иккинчи тарафда душманлардан ўч олишни ўйламоқда.

Ниҳоят, у қўшинни қўзғотиб, Эронга довулдай ёпирилди. Даҳшат ва шон-шуҳрати яна атрофга ёйилди; қаршисидаги ҳукмдорлар титраб-қақшади, баъзилари қочиб қолди...

Халқ ичидан чиққан ватанпарварлар эса, уруш ваҳшати олдида ўзларини йўқотмадилар. «Ўлсак, ватан учун ўламиз!» дедилар.

Юрт учун ўлимни шараф деб билган жанговарлар бир темирчи теварагида жисплашдилар. Бу темирчи ўша эски хоин – Зайниддиннинг Темурга ёзган мактубини Туғлук Темурга олиб бориб берган сотқин эди.

Зотан, у ўқувчиларга аввалдан таниш, тариқатчиларга аралашиб юрадиган эронлик Хизир эди.

У, аслида, Туғлук Темурнинг сардори бўлгани ҳолда, ҳукуматининг ағдарилиши биланоқ Эронга қочган, бу юртда оч қолмаслик учун ёшлигидаги касби темирчилик билан шуғулланиб, бола-чақасини боқиб юрган эди.

Темурнинг ягона душмани бўлган ана шу одам энди бу ердаги маҳаллий оммани тўплаб, катта исён тайёргарлигига киришди.

Аввало у устахонасида анчагина найза ясаттирди. Аммо улар оддий найзадан фарқли, уч бошли найзалар эди. Улар

санчилган жойдан чиқмайдиган шаклда эди, фақат бурабгина тортиб олса бўларди.

Темирчи мана шу қуроллар билан Темурнинг аёвсиз, ёвқур аскарларини маҳв этиш мумкин деб ўйларди.

Темур Эрон юришига буйруқ берди. Бир қўмондонни урушга масъул этиб, ўзи Пирмуҳаммаднинг ёнида қолди.

Темирчининг тайёрлаган исёнчилари кутилмаган бир қаршилик кўрсатди. Темурнинг қўшини фафлатда қолиб, тузоқقا тушди. Тор-мор этилган қўшин қўмондонининг кесилган боши Темурга юборилди.

Аскарининг енгилганини Темурга билдиришганда, у ўзини тутолмай қаҳқаҳа отди. Сўнгра ўзига келиб:

- Шу хабар тўғрими? – деди ҳалиям ишонқирамай.
- Тўғри.
- Аскардан қутулганлар борми?
- Ҳеч бир кимса қолмаган...
- Кўмондон-чи?
- Мана...

Хабарчи тўрвадан қўмондоннинг калласини чиқариб, унга кўрсатди. Темур фоятда мутаассир бўлди.

– Ҳа, шундайми... – деди Темур хафа бўлиб. – Бўлар иш бўпти, майли, бошга тушганни кўз кўради. Фақат гап шундаки, бу мағлублик майдонида турганлар ўз ғолибиятини охиригача муҳофаза эта олурми!?. – деди, унинг товуши қаҳрли, даҳшатли жаранглади. – Энди кўрамиз, нима қиласкинсиз!.. Темурнинг, ҳа-ҳа, бошингиз устига бир балойи самовий каби ёпирилажак Темурнинг оғатидан қандай қутула оларкансиз?! Кўрамиз, унинг нафратидан, ўчидан сизларни қайси қалқону совут тўса оларкин!.. – Темурнинг қалдироқдай гулдураган қаҳрли товуши атрофга, юракларга ларза солди. – Ҳа-а, Темур мағлуб, а!? Хўп, яхши. Кўрамиз!.. Бу ғолиб муттаҳам ўша ҳақсиз қозонган ғолиблигини ҳақиқий эгасига қандай топширишини кўрамиз! Темур мағлуб, шундайми? Ҳеч қачон Темур мағлуб бўлмас. Иншооллоҳ, илк жума намозини Карбалода ўқурмиз!..

XXIV. ҚОТИЛЛАР ЕР ОСТИДА

Тоштуғой Темур ва Ўлжой хонимдан янги вазифа ва топшириқларни олиб, улар билан хайрлашиб чиққандан сүнгра отига минди-да, Ҳиндистон йўлига тушди.

Манзилга етиб келгач, жиноятчи абллаҳларни сўраб-суриширишга қулайроқ дея ўйлаб, бир карвонсаройга кўнди; нимагадир кўринишидан шубҳа уйғотадиган бир хонага жойлашди. Бу ердаги оммага араласиб, турли қаланги-қасанfilaр билан ҳам танишиб, чойхонада қимор ўйнаб, вақт кечира бошлади. Бири билан дўстлашиб, у зот билан кўп бор самимий суҳбатлар курди, натижада ундан анча-мунча муҳим гапларни билиб олди.

Тоштуғой яшаётган уй пойтахт Дехлининг энг худо урган, жабру жиноят қайнаган бир мавзесида эди. Бу расвоник уясидаги кўплаб қарғалар билан танишиб, улар билан араласиб кетди. Бир куни ошналаридан бири унга:

— Ҳар ҳолда бу ерлик эмассиз, а, — деб қолди. — Тилингиздан қипчоқ туркларидан бўлсангиз керак, деб ўйлайман. Бу ерларда нима қилиб юрибсиз?..

— Э, биродар, аҳволимни билмайсиз-да, — деди Тоштуғой ҳасратли товушда.

— И-е, нима бўлган?

— Бу бошга нималар тушмади-я...

— Э, ҳаётда одам ҳар нарсани кўради... нима бўлган ўзи?

— Шу юрагимга ҳеч нарса сифмайди, сиқилгани-сиқилган...

Ҳа, қаердан келиб қолганимни жуда тўғри сезибсиз, юртим эсга тушиб, кўнглим бузилди... Онадан, отадан айрилиб, сарсону саргашта бўлиб, бошим балода қолди-да...

— Қанақа бало?..

— Қанақа бало бўларди, Темур балоси-да! У юртимизга бостириб киргач, роса қирғин қилди, каттаю кичик барчани аямай бошини олди... Мен қочар эканман, йўлда уч киши-

ни ўлдирдим. Улардан бири Ўғуз Арслон деган бир қария эди, аммо кексалигига қарамай бўридай одамга ташланарди, кўрсангиз ҳайрон қолардингиз...

– Ҳа, нимагадир ўзимам сизни бир кўришдаёқ ёқтириб қолгандим...

– Ёқтирадиган нимам ҳам бор, бир бечора ватангадоманку ахир...

– Э, унақа деманг, бунақа кулфат ҳар кимнинг бошига тушиши мумкин. Ҳа, анави чол аниқ ўлдими? – деди ошнаси ўсмоқчилаб.

– Қайси чол? – дея Тоштуғой ўзини овсарликка солди.

– Ўғуз Арслон!..

– Э, расво бўлиб ўлди-ку! Менинг қиличим теккан инсон тирик қолмайди!

– Оҳ, оҳ, тилингга шакар! Ўлма! Бер қўлингни, дўстим...

– Ҳали улар кўради мендан! Худо хоҳласа, Темурниям бир ёғлиқ қиласман ўзим!.. – деди Тоштуғой учли товушда.

Ошнаси ҳам тўлқинланиб:

– Ўғуз Арслон, Темур мен ва энг яқин дўстларимнинг ҳам ашаддий душманидир! – деди.

– Йўғ-э!.. Душманингиз бўлса улар, бу ерда нима қилиб юрибсизлар? Темурдан қандай интиқом оласиз ахир, унинг учун бундан кетмоқ керак-ку, тўғрими?

– Тўғри, аммо биз ўёқларга бормаймиз, чунки Темур орқамиздан одам қўйган, ҳатто шу ердаям жонимиз хатарда...

– Ростдан-а?

– Ҳа. Ўша ҳаммага таниш Ўғуз Арслонни ҳам Темур бу ёққа жўнатганди, у ортимиздан соя каби эргашиб юрди. Яхшики, ўлди, биз ундан кутулдик. Аммо Темурдан ўтган куни Деҳли сultonни Маҳмуд хоқонга бизни тутишга оид бир талабнома келган деб эшитдик...

– Ё, астағфируллоҳ, бу қандай бало бўлди, а?..

– Э, балонинг ҳам каттаси, расвоси!..

– Сulton нима қиларкин энди? – дея ўсмоқчилади Тоштуғой.

– Саройда ҳам бизнинг айрим яқин дўстларимиз бор; масалан, Қоя Алп Деҳли сultonининг ёваридир. Хуллас, Темурнинг талабига рад жавоби берилди.

– Офарин! Тўғриси, Сulton Маҳмуд жуда зўр одам экан!

- Энди Темур нима қилади дейсиз?
- Эронда мағлуб бўлганмиш, энди ўшалар билан овора.
- Мағлуб этишибдими??. Ҳа, ажаб бўпти, жазосини тортсин...
- Ҳозир янайам бало ундан узок... Кўрасан, бу ёққа келганда, жазосини тортиши аниқ!
- Ҳиндистонга келарканми?
- Ўйлашимча, шундай бўлади.
- Нечун?
- Талаби қабул қилинмагани учун.
- Ҳа-а-а... Интиқом масаласи нима бўлади унда? Агарда мени ҳам ишга аралаштирангиз, қандай қилиб ўч оламиз?..
- Деҳли шаҳрининг жанубида, ер остида катта бир фор бор. Ярми шаҳар ўша горнинг устида яшайди, шунаقا кенг. Биз ҳозирча ўша ерда баъзи зарур тарафдудларни кўряпмиз...
- Қойилман! Нималар қилиняпти, мен ҳам бирор хизматни бажарайн.

- Улкан ишлар қилиняпти! Керакли жойларга ўқ-дориларни кўмиб, шундоққина ўт берса, портлайдиган қилиб кўйилди! Пуф деса, Деҳлининг бир қисми ҳавога учади!..
- Ишқилиб, шундай бўлсин-да... портламай қолса-чи?
- Кўнглингиз тўқ бўлсин. Темур бу ерга келиб, қўшини билан Деҳлидан ўтаётганда, бутун шаҳар портлаб, ҳаммасини ер ютади, бари асфаласофилинга кетади, биз ҳам қутуламиз.

Тоштуғой хаёлан бу даҳшатли манзарани тасаввур этиб, бир муддат ўйга ботди. Сўнгра:

- Бу маҳфий ишингиздан бошқалар воқиф эмасми? Форнинг эшик ё дарвозаси борми? – дея сўради.
- Битта эшиги бор, холос.
- Маҳкамми ишқилиб? Бирор бегона кириб, зарар етказиб ё яширин...
- Барча эҳтиёт чоралар кўрилган, зотан, эшикнинг калити ишончли қўлда, кимса уни очиб, ичкари киролмайди.
- Жуда соз. Ростини айтсан, шу интиқом тадбири менга кўп маъқул ва мувофиқ. Чунки мен буни анчадан бери ўйлаб юрардим, йиллардир орзу қилардим, – деди Тоштуғой ошнисини янада ром этиш мақсадида. – Эҳтимол, сизлар Темурдан шахсан ўч олишни ўйларсиз. Ҳолбуки, мен унинг аскаридан ҳам қасос олмоқчиман... Шу боис мен жуда мамнунман.

- Ҳа, демак, бу интиқом тадбири сизга ёқди, а?
- Кўп маъқул! Мени ҳам ўзингизга иттифоқчи этиб, гурухингизга қўшсангиз, миннатдор бўлардим.
- Ҳозирча бунинг ҳеч иложи йўқ. Аммо кейинчалик ўйлаб кўрармиз...

- Раҳмат, яхши бўларди...

Икки ошна бир-бирларининг қўлларини сиқишиб, хайрлашдилар.

Ўша оқшом, яъни бу мулоқот юз берган кун, Тоштуғойнинг бу ўлкага келган йилининг сўнгти кечасида у бир мактуб қоралади. Хат шу мазмунда эди:

«Гақсирим!

Амрингизга кўра бу ерга келдим. Уларни топдим.

Ҳатто улардан бирининг исми Сулаймон, яна бирининг оти Қоя Алп эканини билдим. Қоя Алп Султон Маҳмуднинг ёвари эмиш...

Яна сиза мактуб ёзурман, унда Тоштуғой отимни Кундуз деб битадурман. Тоштуғой Кундуз».

Зотан, Тоштуғой Сулаймоннинг кимлигини анави қадрдон ошинаси орқали билиб олганди.

Энди унинг кўнгли тўқ. Дорбозларнинг иккитаси эмас, барчаси бир арқонда ўйнай бошлаганди...





XXV. ЭРОН МУЗАФФАРИЯТИ ВА ҚАСОС

Темур табиати, феълу фитрати ўзига хос инсон эди.

У фақат голибиятни севарди, мағлубиятни ҳечам ёқтирмасди. Фавқулодда қасоскор бўлганидан, агарда енгилиб қолса, ўша пайтдан бошлаб зафар қозониш учун кунмакун тинимсиз ҳаракат қиласар ва интиқомни бир лаҳзаям унумасди. Зотан, Тўхтамиш исёнидан кейин Темурнинг қандайин ироди ва идрок билан ўч олгани унинг ҳаёт фалсафасини англатиб турибди.

Шундай қилиб, Эронда бир темирчи зарбасини еган жаҳонгир, албатта, буни бир он ҳам унумади ва дарҳол бунинг жавобини тайёрлади. Қаҳрамон ўрдусини тўплаб, Эронга бўрондай ёпирилди, душманини ер устидан хас-чўпдай суруриб ташлади, мағлуб темирчининг додига етадиган кимса топилмади...

Шу юриши давомида Темурнинг музаттиси кўшини бутун Мардин, Тикрит, Диёрбакр шаҳарларини ҳам забт этди.

Исёнчиларнинг барчасини жазолади, бошларини кестириб, бир ерга тўплаттириди. Авбошлик натижасини кўрсин, ибрат олсин дея оммани ҳам йифдирди. Бирдан Темурнинг қалдирокдай товуши атрофни ларзага солди, у:

— Даънат сиз каби кучсиз бўла туриб қувватлидай кўрингандарга!.. — дея бақирди. — Модомики, мендан голиб келолмас экансиз, нега аллақанча оломонни тўплаб, бош кўтардингиз? Модомики, голиб келмоқчи эдингиз, нега мағлуб бўлдингиз?!

Ў-ўҳ, инсон!.. Одамзод!..

Аминманки, ўлгунига қадар башариятнинг жасадларидан қурилган иморату кошоналардан қутула олмас!.. Буни мен қилдимми, сиз қилдингизми?.. Бу бинони мен қурдим. Сиз қурдирдингиз. Шундай қилишимга сиз сабаб бўлдингиз. Мен-

га қаршилик кўрсатолмадингиз, тўплана олмадингиз, иттифоқ бўйламадингиз. Мана, оқибатда мен сизни ҳам ерга teng қилдим! Гуноҳ менда эмас. Чунки одамга ўхшаб майдонга тушсайдингиз, мағлуб бўймасайдингиз, бошингизга бу фалокатлар ёғмасди. Мени шу ерларга келтирган, шу ҳолга солган сиз, сиз, сиз!..

Темур бу мудхиш, қонли, фоже ҳолдан ниҳоятда мутасир бўлиб, анча жим қолди. Сўнгра қўмондонларига шундай фармон берди:

- Кўшин сафарга ҳозирлансун!
- Бош устига! – дея таъзим этди қўмондонлар.
- Карбалода барча одамлар Ҳусайнга қандай мотам тутган бўлса, мен бу кун бутун башариятнинг мотамини, мотам маросимини ижро эттираман...

Темур ёнидаги аҳли уламонинг насиҳату маслаҳатига доим қулоқ тутарди. Зотан, улар унга халифа деб мурожаат этар, Темур ҳам ўзини халифадай тутар, уламо сўзидан чиқмас эди.

Алалхусус, бу интиқом сафарини ҳам уламонинг ташвиқоти ва фатвоси билан амалга оширганди.

Темур кўшинидаги барча жанговарлар, маошли бўлуклар – ҳаммаси урушда фавқулодда қаҳрамонликлар кўрсатган, музafferият нашъаси-ла маству масрур эдилар.

Ҳақиқатан ҳам, Мовароуннахрдан чиқсан бу туронлик ҳукмдорнинг Эрондаги ғалабаси кўзларни қамаштирас даражада порлоқ эди.

Бутун ўрду бир ерга тўпланди.

Темурнинг амрига кўра, икки киши-икки киши бўлиб сафга тизилганча. Карбало зиёратини бошлидилар. Ниҳоятда улкан ҳалқа ҳосил этилганди. Темур ўргада бормоқда. Ҳусайннинг шаҳидгоҳига яқинлашилган сайин ҳалқанинг олди тобора очилиб, Темурнинг илгарида ҳаракат қилишига имкон яратилмоқда. Бир пайт, Темур шаҳидгоҳга одим отиб, энди тавооф расмига киришаман деганда, қаршисида номаълум бир кимса пайдо бўлиб, оёғининг остига ётиб олди.

– Не тиласен? – сўради Темур. Сўнгра унинг бошидан тутиб: – Тур ўрнингдан! – дея буюрди.

Кимса қаршисида тиклангач, унинг башарасини кўрибօқ:

- Тез сўйла! – дея ўшқирди.

Одамнинг афт-ангари таниб бўлмас ҳолда кир-чир, чанг-тупроққа беланган эди. Индамай турганини кўриб, Темур яна сўзини такрорлади. Шунда у мутеларча:

- Афвингизни тилайман... – деди.
- Нима қилдингки афвимга эҳтиёж туйдинг?!
- Афвингизга муҳтоҗман...
- Уруш тугади-ку.
- Сиздан қўрқаман...
- Бунга ҳожат йўқ.
- Бор, зоти олийлари, бор... Кимлигимни билсайдингиз...
- Хўш, кимсан?
- Бир гуноҳкорман...
- Қанақа гуноҳкор?

Бутун йигилган ҳалқнинг, аскарларнинг кўзи Темур ва бу кимсага тикилган, гарчанд ўртадаги гап-сўзни яхши эшитмасалар-да, уларнинг ҳаракатини жимгина кузатиб туришарди.

- Ҳазратим, кечирдим денг...
- Хўп, кечирдим, – деди Темур. Шу заҳотиёқ ҳалиги кимса ўзини танитди:
 - Зайниддиннинг сизга битган мактубини Туғлуқ Темурга сотган юзи қора менман...
 - Майли... Ўтиб кетган гап экан, ўйлама, сени кечирдим... – деди Темур шафқатли товушда.
 - Аввалги Эрон сафарингизда ҳам ҳалқни тўплаб, сизга қарши исён қилган, аскарингизни маҳв, қўмондонингизни асир этган менман...
 - Буниям кечирдим... – деди Темур ғазабини ютиб. Сўнgra юмшоқ товушда сўради: – Хўш, шунчалар маҳорату усталигингни кўрсатдинг-да, энди нега мағлуб бўлдинг? Шу сўрғимга жавоб бер! Қани, айт, нега энди мағлуб бўлдинг?!
 - Ҳазратим, кучу қудратингизга teng келадиган ҳеч нарса йўқ-ку...
 - Мен сендан буни сўрамаяпман, гапни айлантирма! Айт, нима учун енгилдинг? Модомики, мени енголмаслигингни, менга teng келадиган бошқа куч йўқлигини биларкансан, нега менга қарши чиқдинг? Голиб келишингга ишонганимидинг? Нега менинг шунча аскаримни маҳв этдинг?..
 - Ҳазратим, мени кечиринг, бир қошиқ қонимдан ўтинг...

— Йў-ўк, сен саволимга жавоб бер! Жавоб беролмайсан, а!?

Бечора Хизир етти букилиб, ерга кириб кетай деди. Темурнинг саволларига жавоб беролмай, мулзаму чорасиз мўлтираб қолди. Темур унга ўйчан боқаркан, жазосини белгилади.

— Кўмондон! — дея ўшқирди. — Ол, шу исқиртни маст отнинг қуйруғига боғлат-да, чўлга ҳайдат!..

Шу пайт Хизир ўрнидан салчиб туриб, яширган ханжари ни қўлида ўйнатиб, Темурнинг кўксига урмоқча чоғланди...

Айни онда:

— Тўхта! — дея бақирди Темур. Хизир турган жойида тахта бўлиб қотиб қолди. Шу орада сотқиннинг ёнига етиб келган қўмондонга қаратса: — Майли, ол шуни, афв эттим. Тавоғ маросимидан кейин ҳузуримга келтир! — деди.

Тантанали ва муҳташам тавоғ маросими кечгача, туни бўйи давом этди. Ҳар тарафда машъалалар ловуллар, чироқлар ва қандиллар порлар, бутун ҳалқ Ҳусайн шаҳидгоҳида ибодат қиласар эди. Темур ҳам уларнинг орасидайди.

Бомдод намозидан кейин ҳамма тарқалди.

Темур ҳарам чодирига қайтди. Уни Ўлжой Туркан ва Дилшод Султон кутиб олишди. Ичкари киаркан:

— Бугун нима бўлди, биласанми, Ўлжой, — дея сўради хотинидан.

— Йўқ, нима бўлди?

— Сен тавоғ ва мотам маросимида қатнашмадингми?

— Йўқ, хоқоним.

— Бугун тавоғ асносида оёғим остига бир эронлик ётиб олди. Ким экан, деб юзига боқдим. Ҳайрон қолдим. Нима дейсан, тила тилагингни, десам, гуноҳкорман, кечиринг, дейди. Нимангни кечирай, гуноҳингни айт, десам, нима деди, биласанми?

— Нима деди, айтинг, ҳазратим.

— Зайнiddиннинг мактубини Туғлук Темурга олиб бордим, деса бўладими!

— Вой-й! Шу одамни менам бир кўрсам бўларкан...

— Нимаям қиласардим, афв этдим. Аммо у сотқин Эронга келган қўшинимни ҳам барбод қилган исёнчилар бошида турган экан-да...

— Нима дедингиз, қонидан ўтдингизми ё?..

- Бу гуноҳини ҳам кечирдим...
 - Ҳа, яхши қилибсиз, кечирганни худоям кечиради.
 - Аммо яна бир нарса бўлди... Йўқ, йўқ, мен ундан бир нарсани сўраб билмоқни истагандим...
 - Нимани сўрадингиз?
 - Ўтган йили қўшинимни сен тор-мор қилгандинг, эронликларнинг голиб қўмондони эдинг. Эндиликда нима сабабдан енгилиб қолдинг, дедим.
 - У нима деди?
 - Ҳеч нима демади...
 - Э, фалокат бўлмай ўлсун!..
 - Ҳа, турган-битгани фисқу фалокат! Дарҳол қўмондоминга буюриб, отни думига боғлат, дедим...
 - Вой! Кейин нима бўлди?
 - Шунда у иблис беркитган ханжарини шартта чиқариб, менга ташланиб қолди...
 - Худо сақласин!.. Адабини бериб қўйдингизми кейин?..
 - Ҳа... Тўхта, дея бақиргандим, қоқсан қозикдай туриб қолди. Дарҳол кечирганимни билдиридим...
 - Нима учун?
 - Чунки калламга бошқа фикр келиб қолганди...
 - Ҳа, яхши қилибсиз. Худо кўнглингизга эзгулик солибидида.
 - Тўғри. Зотан, у аввалда менга тобе сардорлардан эди, бебошлиқ ва хиёнат қилиб қочиб юрганди... Аммо у одамзоднинг ҳеч нарсадан қайтмайдиган нодир хилидан экан. Ундан фойдаланиш керак-ку, дея ўйладим... У кўп нозик ишларни бажариши мумкин...
 - Ҳозир у одам қаерда?
 - Амр этдим, эртага ҳузуримда бўлгай...
- Эртасига эронлик сардорни хоқон чодирига олиб келишди. Темур гапни қисқа қилди:
- Сен яна қўшинимда хизмат қиласан, қўмондон этиб таъинлайман, фақат содиқ бўласан, шарти шу! – деди.
- Хизир Темурнинг шартига кўниб, миннатдорлик билан бош эгди. Энди у жаҳонгир ўрдусида бир қўмондон эди.
- Темур Эрон сафарини адогига етказиб, олдиндан режала-ганига мувофиқ атрофдаги айrim шаҳарларни ҳам забт этиб, яна бошкенти Самарқанд томон йўлга чиқди.



XXVI. ХИЗИР ЎЛДИРГАН ҚОРОВУЛ

Самарқандга қайтган кунларда Темур Тоштуйдан хат олди. Хизирни дарҳол ҳузурига чақиртирди. Үнга юмшоқ товушда:

- Сени бир мактуб билан Ҳиндистонга юборсам, борурмисан? – деди.
- Ҳазратим, сиз муҳим деб билган бир ишдир ҳар ҳолда, албатта борурман, – деди бош эгиг.
- Ҳа, кўп муҳим бир иш, сездинг. Сендан бошқасига ишонолмайман, нозик иш... – деди Темур яна таъкидлаб.
- Бош устига, ҳазратим! – тагин мутеларча таъзим этди Хизир.
- Сен эронликсан, аммо Қипчоқ ўлкасида яшаганингни бир пайт менга айтганинг эсимда... – деди Темур.
- Ҳа, қипчоқларни яхши биламан, ҳазратим.
- Жўжи сулоласидан чиққан хонларни ҳам биласан, а?
- Кулингиз бир замонлар Жўжи хонадонига мансуб ҳукмдорнинг муҳтарам вазири саройида хизмат этгандим...
- Ўша вазирнинг ўғли бормиди? – деди Темур ўсмоқчилааб.
- Ҳа, Тоштуй деган ўғли бор эди. Мен унинг хизматчиси эдим...
- И-е, сен ҳали Тоштуйни танирмисен?
- Ҳа-да, унинг отабеги эдим, вазирзоданинг тарбияси билан ўзим шуғулланганман...
- Жуда соз! Ундай экан... сенга бир мактуб бераман, уни Тоштуйга элтасен!
- Ҳиндистонгами?
- Ҳа-да, Ҳиндистонга! Шу чоққача Тоштуйнинг қайдалигини билмасдинг, тўғрими? Мана энди, у Ҳинд юрти-

дадир... Аммо сен ўзингни ҳеч кимга танитмагайсен, тушундингми?..

- У ерда мени ҳеч ким танимайди-ку...
- Йўқ, сени танийдиганлар топилади... Фақат сен уларга ўзингни бошқа одам қилиб кўрсатасан, билдингми?
- Ахир... қандай қилиб?
- Чайналма! Сен олдин Туғлуқ Темур қўшинида сардор эдинг, шундайми?
- Ха...
- Қани, менга айт-чи, унинг одамларидан кимларни билласан? Энг яқинлари кимлар эди?
- Сулаймон, Қоя Алп ва унинг ўртоқлари, яна...
- Ана, ўша Сулаймон, Қоя Алп ва ўртоқлари эндиликда Ҳиндистондадир. У ерга боришинг биланоқ, аввало уларни топасан. Эронга ўт қўйиб, кулини қўкка совурганимни, бу йил Ҳиндистонга боришимни айтасан. Яна уларга Эронни мудофаа этолмаганингни, Ҳиндистонга яширин ташкилот тузиш ниятида келганингни билдирасан. Сўнгра Тоштуғойга учрайсан, отим Кундуз дейсан. Анави исқиртларга билдирамасдан мен берган омонатни унга топширасан...
- Бош устига, ҳазратим!..
- Бўпти, энди мактубни ол-да, шу тобдаёқ йўлга чиқ!..

* * *

Воажаб, Темурдай одам қўшинига янгидан қайта олган кимсага, айниқса, хиёнати собит бир сотқинга қандай қилиб муничалар ишонаркин?

Эрон сафаридан қайтаркан, ўрду саҳронинг қок ўртасида тунагани тўхтаган эди. Темур эрталаб тўриб қараса, чодирнинг ёнида қоровул ўлиб ётибди. Дарҳол қўмондонни чақириб:

- Буни ким ўлдиридийкин? Қотили ким бўлиши мумкин? - дея сўради.
- Ҳазрат, бу қоровулингиз бизга Эронда қўшилган эди...
- Тезда қотилни топиш керак!
- Шунча одамнинг ичидан дарҳол топилишига қўзим етмайди...

— Аскарлардан сўра, шу атрофда кимни кўришган бўлса, тутилсин!

— Ким кўрган бўлса барини келтирайми?

— Йўқ, ким кўринган бўлса...

— Бош устига, ҳазратим!..

Бирпасдан кейин қўл-оёғи боғланган Хизирни келтиришиди. Уни чодирга киритиш учун Темурдан рухсат олингач, қотилни хоқон ҳузурига йўллашди.

— И-е, Хизир! Сенмисан?!. — Темур ҳайратидан ёқа ушлаб қолди. — Келиб-келиб менинг қоровулимни ўлдирасанми? Бу не куфрони неъмат? Тузимни ичиб, яна тузлуғимга туфурдингми? Мен сендан буни ҳечам кутмагандим... Ў-ў-ў, ростданам буни сен ўлдиредингми?

— Ҳа...

— Нега ўлдирасан? Ҳа, сен бир эронликсан, мусулмон эмассан... Аммо мен бир мусулмон ва мусулмонлар халифаси сифатида шариат ҳукмини ижро этаман. Сендан қасос олинадир, сен ўлимга маҳкумсан! Осинг шуни! — дея бақирди Темур ғазабланиб.

Маҳкумни чодирдан ташқарига олиб чиқиб кетишаркан, у Темурга мурожаат эди:

— Ҳазрат, бир қошиқ қонимдан ўтинг, рухсат берсангиз, сизга ёлғиз айтадиган бир гапим бор эди...

— Бўлади. Бизни ёлғиз қўйинг... — деди Темур ўйчан товушда.

Барча ташқарига тортилиб, чодир бўшагач, Хизир Темурдан:

— Ўлдирилган ким экан, билдингизми? — дея сўради.

— Йўқ. У бир қоровулим-да...

— Нега сизга қоровул бўлдийкин у?.. — дея сирли ўсмоқчилади Хизир.

— Менга маълум эмас. Билсанг, сен айт, — деди Темур.

— Хоқоним, ё ўзингиз ташқари чиқиб, унинг юзига бир боқинг, ёки чодирга олиб киришсин, кимлигини биласиз...

Темур амр этди, хизматчилар жасадни ичкарига олиб киришди ва ўзлари ташқарига чиқиб кетишли.

— Ҳазратим, унинг башарасига бир кўз ташланг... — деди Хизир.

- Ҳа, уни танигандай бўляпман... – деди Темур. – Аскарларим орасида кўргандайман...
- Йў-ўқ... Ёшлигинизда асир тушганмидингиз?..
- Э-э-э, бўлди-бўлди, эсладим. Қишлоқ бойларидан бири эди у!..
- Ана, ҳазратим, бу кимса Самарқандда сизга қарши иш тутган, қайноғангиз Ҳусайнга хат ёздиран киши. Сиз хоқон бўлгандан кейин у Эронга келди. Менга қўшилди, биз сизга қарши урушдик. Сўнгра у менга хиёнат қилди, мағлубиятимнинг сабаби ҳам шу нокас...
- Нега уни ўлдирединг, шунни айт!..
- Мени сиз авф этганингизни эшитиб, у ҳам дарҳол сизга сифинди... Кеча оқшом, сизни ўлдиришга киришай деб турган бир аснода, менинг ханжаримга дуч келди...
- Э-э, яшавор, Хизир! Раҳмат сенга!..

Темурнинг Хизирга бўлган комил ишончи ана шунга ўхшаш вафо ва садоқат, тажрибалар натижасида ҳосил бўлганди. Ана шунинг учун у Хизирни Тоштуғойнинг ёнига юборди. Ҳиндистон сафарини ўзи ичи-ичидан истаётган бўлса ҳам, бунга унчалар ризолик кўрсатмаётган тобелар ва уламони ҳузурига чақиририб, кенгашмоққа кириши...





XXVII. ТУРК АСКАРИ

Темур кенгашга шундай мурожаат қилди:

— Азизлар! Менга сизларнинг фикрларингиз, қўллаб-кувватлашларинг жуда зарур. Мен Ҳиндистон сафарини тезроқ бошламоқчиман. Сизларга яхши маълумки, Деҳли султони Маҳмуд бир неча талабимни рад этди... Мудҳиш зарба бериб, унинг эсини киритиб қўйиш керак!..

Уламодан бири урушнинг олдини олиш мақсадида шундай деди:

— Хоқоним, бу сафар халқимиз учун хайрли бўлмайдиган кўринадир...

— Нечун? Сабаб?

— Чунки ҳиндистонликлар ғаройиб, сеҳргар бир халқ, биз у ўлкага борсак, улар бизга ўз одатларини, тилларини ўргатиб, бизга ўзимизни унуттириб юбортирадилар деб ўйлайман...

Темур бошқа бир сўзламоққа чоғланган уламога юзланиб:

— Хўш, оқсоқол, сизнинг фикрингиз қандай? — деди.

— Хоқоним, фикримча, бизнинг турк сулоласи ҳиндлар билан аралашиб кетса, улар бизларни тамоман ўзларига ўхшатиб қўйишлари аниқ. Наслимизни қўриқлаш барчамизнинг бурчимиздир...

— Бу томони тушунарли, яна қандай фикр бор?

— Зотан, миллатимизнинг энг қутлуғ жиҳатлари — тилию урф-одатлари йўқолиб кетаркан, турклигимиз маҳв бўларкан, демак, ҳар нарсамиз тугади деган гап-ку бу...

— Ҳиндистон менинг салтанатимда бир вилоят бўлади, унга волий тайинлайман, у солик тўлайди холос, барча соҳада ўз эркича ҳаракат қиласеради. У ўлка шу ердан туриб бошқарилади...

— Кўп яхши, ҳазратим. Бу ишларни мендан яхши била-диганлар бор, улар не деркин?..

— Түғри, бу ерда етти ўлчаб бир кесиш керак. Мен Куръонни бир очиб кўрай, унга муносиб ҳаракат этамиз. Маъқул тушмаса, айтасизлар. Хўп десанглар, сафар тайёргарлигини бошлаймиз... — деди Темур.

— Бўлади. Амри илоҳийга қарши чиқилмас, қани кўрамиз, толеимизда нима бор экан... — дея уламо ва умаро хоқоннинг фикрини тасдиқлашди.

У кеча Темур Куръонни очиб, толеси кулиб, сафарни маъқуллайдиган оят чиқди.

Эртасига хоқон буни аъёну уламога, ҳукумат вакилларига билдириди. Уруш ҳозирликлари бошланиб кетди.

Ҳар ёққа чопарлар йўлланди, буйруққа биноан аскар йиғила бошлади. Аскарликни жонидан севган турклар қуролларини тақиб, ота-оналари билан хайр-хўшлашиб, отларига мингандча ўрдugoҳга ошиқардилар.

Бу ҳаракатлар фақат ҳарб, фақат жангу футухот дея бошланганди. Бунақа ғавғою талотумга фақат туркларгина шавқу ёвқурлик-ла бош урадилар; урушга ўйнаб-кулиб жўнаш фақат уларга хос хислату одат эди.

Қўшин жўшиб-қайнарди; қалблар сафар жанговарлигига тўла, руҳлар юксакларда учар, юраклар ҳаяжондан потиллаб урар эди. Худо берган жасорат тўлқини бағрида долғаланган турк аскарининг куни туққанди. Улуғ бир ғолибият байрами арафасида, албатта, бу қаҳрамон туркларнинг кўнгиллари шунақа умиду ишонч, музafferият нашидаси билан тўлиб-тошади-да!.. Ахир курашчанлик томирларида булоқ бўлиб отилаётган, наъра ураётган бу йигитлар недан ҳам қўрқсинлар.

Тарих майдонида қаҳрамонлиги ва ёвқурлиги билан танилган бу арслон турклар недан чекинибдики, энди бу сафардан чекинса.

Ўрду қўзғолди: бутун севинчлари-ла, бутун имону «Аллоҳу акбар» тақбирлари-ла, бутун меҳру иттифоқликлари-ла йўлга тушдилар.

Чўпонга эргашган бир қўй сурувидай ювош, йиртқич бир арслондай шижоатли ўрду оқсоқ қоплон ортидан улкан ўлжа сари гуррос-гуррос оқа бошлади...

Йўл устида барча юртдошлар, ота-оналар, қариндош-уруғлар олқишу дуолар билан қутлашмоқда, кузатишмоқда...

«Болам жангга кетяпти» дея гуурл-ла севинмоқда ота-оналар.

Кўшин ана шундай қилиб халқнинг ҳузуридан ўта борди. Йўл юрди, йўл юрсаям мўл юрди, охири Андараб деган жойга бориб, ўша ерда қўр тўқди.

Бу ўрду том тўқсон икки минг кишилик бир қўшин эди.





XXVIII. ДЕҲЛИ СУЛТОНИГА ҚАРШИ УРУШ ЭЪЛОНӢ

Эронлик Хизир бир неча ой Ҳиндистонда боши бўш, бебош айланиб юрди. Аммо Сулаймон ва ошналарининг қайси чойхонада ва қаерда ўтирганларини яхшилаб билиб, кейин ўша ерларда дайдиб юриб, тўдага қўшилиб олди, ўзини уларга танитди. Бироқ ундан аввал Тоштугой билан алоҳида учрашди. Ўзининг ким эканлигини билдириди, Темурнинг фармонларини англатди. Кучоқлашиб, бир-бирлари билан қайтадан кўришдилар, Хизир унга Темурнинг мактубини топшириди. Сўнгра нималар қилиш лозимлигини, бир-бирларини танимағандай тутишни келишиб олиб, хайрлашишди.

Бир куни кечқурун Хизир чойхонада Сулаймон билан кўришди, унга ўзини таништириди. Шунда Тоштугой унга шубҳали нигоҳ билан қараганча:

– Бу ким бўлди... – дея сўради.

Сулаймон унга:

– Бу инсон Темурнинг энг ашаддий душманларидан бири, Туғлук Темурнинг сардори бўлган... – дея шипшиди.

– Ҳа-а... Аммо бунинг ёнида ҳар нарсани очиқ айтиш тўғримас, шубҳали кўриняпти менга... – деди Тоштугой секингина.

– Йўғ-э, оғайни! Нима деяпсан ўзи! Ҳеч ким Темурга бунчалик душман бўлолмаган ахир, бўлолмайдиям...

– Билмадим... Ҳа, энди бүёфини сизлар яхши биласизлар. Мен бу томонига аралашмайман... – деди Тоштугой ишонқирамай.

– И-е, унақа дема, дўстим! – деди Сулаймон. – Ишонмаяпсанми дейман, а... Э, бу бутун одам, уни биз азалдан бери таниймиз!

– Ундей бўлса, майли. Аммо мен уни бир синааб кўрай...

– Истаганингни қил, менга барибири.

Тоштугой ана шундай қилиб ўзини ҳеч кимни билмайдиганга, танимайдиганга солиб, улар билан муомалага киришди. Хизир

билан алохыда учрашди, сухбатлашди. Кечаси, ҳамма тарқалғандан сүңг, күйнидан мактубни чиқариб, ўқий бошлади:

«Тоштуғой.

Бу одам ишончли киши. Мен тұқсан икки минг аскар билан Ҳиндистонга бормоқчиман. Борайинми?

Темур».

Тоштуғой дархол хатта жавоб битди. У қисқа ва лўнда эди:
«Ҳазратим.

Келинг. Аммо олдин Дехли султонига қарши уруш эълон қилинг.

Тоштуғой».

Эртасига оёғини қўлига олганича Хизирнинг ёнига чопди, унга мактубни тутқазиб:

– Буни ҳозироқ Темурга жўнат! – деди.

Хизир тезда ишончли бир чопарни топиб, мактубни Темурга юборди.

Шундан икки кун ўтгач, Темурнинг Дехлига қараб келаётгани бутун Ҳиндистонга тарқалди. Xалқ ҳаяжону таҳлика ичра бирлашиб, турли ерларда тўпланишиб, қуролланишиб, сўғишини кута бошлиди.

Темур ўшанда олтмиш ёшга кирганига қарамай, унинг оламшумул даҳшатидан бутун Дехли зир-зир титрамоқда эди.

Зотан, Темур Ҳиндистонда кетма-кет чопарлар жўнатиб, бутун ҳиндларни қиличдан ўтказиши ҳақидаги қарорини, зафарини таъминлашга хизмат қиласиган муболагали шовшувларни тарқатганди; қўрқув улкан қора булатдай ўлкага ёйилиб, барчани ваҳима босган эди.

Жаҳонгирнинг ўрдуси Дехлининг шундокқина биқинида қўр тўқди. Шаҳарнинг жануб томонидан ҳужумга киришди. Султон Маҳмуд ўз қўшини билан ёв қаршисига отилди. Аммо тезда енгилди. Аскарлари қоча бошлиди...

Халқ эса, икки кундан бери ўзини босган ваҳима устига бу мағлубият зарбаси тушиши билан, бадтар ҳолсизланиб, шаҳарнинг шимол тарафига қараб оқди. Бечора оломон умидсиз оҳ-воҳ чекар, йифлар-сиктар, қаҳрли бу маҳшарда маъбудларга ёлворар, дуо этар, аммо кўқдан ёғилаётган илоҳий балою офат кучайгандан-кучайиб борар эди...

Худди ана шу чоғда, бир кимса бу қонли талотумни, бу тиқилинч жон бозорини ёра-ёра Темур турган ерга ошиқмоқда эди.

XXIX. БУ КИМ ЭДИ?

Темурнинг Деҳли султонини мағлуб этганлиги ҳақидаги гаплар атрофга ёйилгач, жаҳонгирнинг шаҳар ичига қараб юрганини эшитиши биланоқ, Тоштугой ва Хизир ўнта фитначи билан бирга форга томон йўл олишиди. Ўртада куръа ташланди, гордаги портлагичларга ўт бериш вазифаси Қоя Алпнинг зиммасига тушди. Ҳамма ташқарига чиқди ва ҳар ким ўз ўйлига кетди.

Бироздан кейин Хизир ва Тоштугой яширинча учрашдилар.

— Сен ҳозироқ горнинг ичига кириб оласан! — деди Тоштугой унга. — Қоя Алп ишни бошлишдан олдин бир бурчакда беркиниб, уни кутиб тур. Мен ичкарига кирганимда, ўртага чиқасан, хўпми?

— Хўп бўлади! — деди Хизир ва могорага қараб чопди.

Форга кириши билан Қоя Алпнинг ишга киришганини, портлагичлар пилигини ёқишига тайёрлаётганини кўрди. Секин-секин юриб бориб, бир бурчакда писиб турди. Бир неча дақиқадан сўнг, оёқ учида юрганича форга Тоштугой кириб келди. Хизир турган еридан кўзғолиб, ўртага чиқди. Тоштугой уни кўрибоқ, энди кетавер дегандай ишора қилди ва:

— Ҳозироқ Темурнинг ёнига уч, турган еридан бир одим ҳам илгари босмаслиги учун уни гапга тутишга тириш. Зарур бўлса, сирни очасан, турган ери портлаб, жарга учиши мумкинлигини тушунтирасан...

— Бош устига! — деди Хизир ва ташқарига қараб чопди.

Темур қаршидан келаётган Хизирни кўрар-кўрмас, бир нарса бўлганини сезгандай, одамларига, бироз тўхтанг, дея буйруқ берди ва Хизирнинг ўзига яқинлашишини кутди.

— Ҳазрат, бир қадам ҳам олдинга босманг!.. — деди у ҳовлиқиб.

- Нега?
- Хатарли...
- Нима бор ўзи?
- Шу турган еримиз остида фор бор, ичи тўла борут, портлаши мумкин...
- Қачон?
- Ҳар дақиқада ўт чиқиши мумкин! Изн беринг, мен борай...
- Қаёққа борасан, кетма...
- Рухсат этинг, ҳазратим...
- Нимаям қиласан ахир?..
- Одамларни тарқатиб юбораман.
- Қандай улгурасан?
- Ораларига кириб, бақираман, тарқалинглар дейман...
- Э, қоча олмайдилар...
- Изн беринг, мен борай...
- Иш нимадалигини яхшилаб уқтирумадинг-да...
- Рухсат эта қолинг, ҳазратим...

Темур майли дегандай қўл силтади. Хизир шошиб оломон ичига ўзини урди, бақириб-чақириб, уларни таҳликадан огоҳ қила бошлади.



XXX. МАЛЪУНЛАР ҚИЛМИШИ

Тоштуғой Хизирдан айрилғандан сүнг секин-оқиста фор-
нинг ичкарисига йўналди.

Унинг фикри-ёди Қоя Алпдан аввалроқ ишга киришиб,
портлашнинг олдини олиш эди.

Тоштуғой Қоя Алпни кўриши биланок, учиб бориб унга
ташланди, қўлларини орқага қилиб боғлашим керак, дея ўйла-
ди. Аммо Қоя Алп ниҳоятда ҳушёр турганди, бир силтаниб,
уни улоқтириб юборди.

- Боруттга ўт қўймайсан! – дея ҳайқирди Тоштуғой.
 - И-е, нега? Жинни бўлдингми? – дея Қоя Алп унга
хайрон бокди.
 - Чунки Темур фор устига ҳали етиб келмади. Тепада
фақат Деҳли халқи бор, холос...
 - Менга нима, халқ-малқ билан ишим йўқ! – деди Қоя
Алп ўжар товушда.
 - Пиликларни ёқишингга йўл қўймайман!
 - Э, сенга қараб ўтиармидим! Шундай ёқайки!..
 - Ёқиб бўпсан!..
 - Ахир ўртоқлар билан портлатишга қарор қилдик-ку!
- Мен қарорни амалга ошираман!
- Оширмайсан! Оширолмайсан! – дея Тоштуғой унга таш-
ланди.

Иковлон олиша кетдилар. Иккаласининг қўлида ҳам
ханжар... Гоҳ униси тепиб, гоҳ буниси йиқилиб-туриб, уч-
беш дақиқа тиккалашдилар. Анча ҳолдан тойишди. Охири,
Тоштуғой уни мағлуб этай деб турганда, бирдан Қоя Алп уни
ағдариб, босиб олди. Ҳиқилдоғидан бўғиб, эза бошлади...

Бироздан кейин Тоштуғой куч тўплаб, бир силтанди-
да, унинг чангалидан ўзини кутқарди. Ҳамон зарба бериб,
рақибини босиб олди. Бўғиб, эзиб, обдан ҳолдан тойдирди,

аммо унга ўхшаб инсофсизлик қилмади... Ниҳоят, унинг оёқ-кўлини боғлаб, елкасига ортиб, ташқарига йўналаркан:

– Қани, борутни ёққанингни энди бир кўрай... – дея ҳарсиллади.

Тоштугой Қоя Алпни елкасида қўтарганича аста-аста босиб фордан чиқди. Кўнгли хотиржам, вақти чоғ эди. Чунки катта портлаш ва ёнфинга йўл қўймаганди.

Бироқ фалокат ҳали аримаганди. Сулаймон иккаласининг фордан чиққанини кўриб, шубҳаланиб, ўша заҳоти могора ичига кириб кетди. Қараса, портлагичларнинг пилигига ўт ту-таштирилмаган. Бир тутантириқ олиб, нарироқда ёниб турган оловдан дархол туташтириди ва борутларни боғлаган пиликни ёқиб юборди...

У ортига қайтаркан, ошналарининг ҳам форга кириб келганига кўзи тушди. Ёна бошлигарни пиликка имлаб бўлди, қайтамиз дегандай ишора қилди ва бари ортга йўналишиди. Аммо фор оғзига келганда, эшикнинг беркитиб қўйилганини кўришиди.

Тоштугой фитначи тўданинг фор ичига кирганини сезиб, елкасидан Қоя Алпни туширган ва тезда бориб, дарвозани қулфлаганди... Ичкаридаги етти сичқон қопқонга илинганди. Улар бақириб-чақириб ёлвора бошлиши:

- Очинглар!!! Ким бор...
- Ҳазиллашма, оғайнин...
- Қоя Алп, ҳазиллашма, эшикни оч!..

Улар фор дарвозасини Қоя Алп беркитди деб ўйлашаётганди. Аммо бир ёнда портлагичларни туташтирувчи пилик пориллаб ёниб турибди...

– И-е, эшикни Қоя Алп беркитти деб ўйлаяпсизларми, довдирлар!? – деди жаҳли чиқсан Сулаймон.

- Ўша қулфлади-да!
- Нотўгри, у эмас!
- Ким бўлмаса?
- Кундуз! У исқирт бизга хиёнат қилди!

Ха, Тоштугой бу шайтонларга ўзини бошда Кундуз деб танишистирганди.

Каршидаги борут пилигининг ловиллаб ёнаётгани, ҳадемай катта портлаш бўлиши барчани ваҳимага кўмди.

– Кундуз! Пиликка олов берилган... Эшикни оч!.. – дея бақиришди.

– Йўқ, очмайман! Баринг шу ерда қоласан!.. Модомики, Темурга ҳеч нарса бўлмас экан, гуноҳсиз Дехли халқи портловда ўлар экан, мен ҳам шу ерда қоламан, ҳаммамиз бирга ўламиз!..

– Темурга ҳеч нарса қилмайди дейсанми?

– Ҳа...

– Нега?

– Чунки у горнинг устига қараб юргани йўқ, уни хабардорлар тўхтатишди...

Шу чоғда мудҳиш бир олатасир, қалдироқ еру кўкни титратди, шаҳарнинг бир қисми осмонга учди...

Тирик қолган оломон ҳар ёққа тум-тарақай қочди. Ҳавода жасадларнинг парчалари, оёклар, қўллар, бошлар қонга белланганча учар, ҳар ёнга қонлар сачратиб тўкиларди... Тўрт томон жасаду суякларга тўлди...

Бу харобаликда жаҳаннам ўти авжлана бошлади. Ўлим ва ўликларга тўла майдонлару кўчалар ҳалиям чўкишда давом этарди... Бу қиёмат кунида барча халқ харобу туроб ҳолда ҳамон инграб-синграр эди...





XXXI. ХОТИМА

Орадан бир йил ўтди.

Темур, Тоштугой ва Ўлжой хотун Самарқандда, Ҳиндистон зафарига атаб қурилган жомеи шариф қаршисидаги хоқон боғида сухбатлашиб ўтиришарди.

— Тоштугой, — деди Темур ўйланқираб, — Дехлидаги авави фитначилар энди қаёқларда ивирсиб юрганикин?

— Билмадим, ҳазрат... Ўшанда яхши режа тузгандик, аммо иш ўйлаганимиздек юришмади... Кейин эшитганимга кўра, улар Рум диёрига қараб қочишган, тахминимча, бари соғ-омон...

— Қисматларини кутсинлар! — дағдаға қилди Темур. — Яна қўлимга тушсалар...

Ҳақиқатан ҳам, ўша мудҳиш портлашдан кейин Қоя Алп, Сулаймон ва ошналари тирик қолганди, усмонлилар салтана-тидан қўним топармиз деган ниятда Румга қараб қочишганди.

Темур ва Тоштугой ҳам у жаҳаннамий олатасирдан эсон-омон қутулишган, сўнгра Дехли сultonи устидан зафар қозонилиб, Самарқандга қайтишган эди.

Бечора Хизир эса, моғора тепасидаги майдонда оломонни тарқатаман деб бақириб-чақириб турганда, бирдан портлаш юз бериб, гуноҳсиз халқ билан бирга у ҳам ҳавога учганди...

Темур Хизирни ёд этиб, ичи қайғу-ла шувулларкан:

— Ким билсин, балки мозийдаги ёмонликларининг жазосини олгандир, бечора... — деди. — Аллоҳ ҳақдир, у ҳуқуқни доимо муҳофаза этадир...

— Тўппа-тўғри! — дея Тоштугой хоқоннинг фикрини қувватлади. — Албатта, ҳуқуқ ва ҳақиқат ҳеч қачон йўқолмайди!..

(Асарнинг биринчи қисми тугади).



ТЕМУР ҲАҚИДАГИ ИЛК ТУРКЧА РОМАН (Сўнгсўз)

Туроннинг буюк қаҳрамони, туркистонликларнинг ҳарбий даҳосини ўзида мужассамлаган Темур ҳақида холис ёзилган ҳар бир асар бугунги кишилар учун ибратлидир. Темурнинг шахсий ҳаётидаги ва давридаги жасурликлар, садоқат, яхшилик, шафқат ҳақида ўқирканмиз, бундан таъсирланишимиз, фикру туйғуларимизни, кўнглимизни ва табиатимизни тарбиялашимиз, олдингига кўра бирмунча ўсишимиз муҳаққақдир.

Биз юқорида «холис ёзилган» дея бежиз таъкидламадик. Тадқиқотларга кўра, Темур мавзусида бугунгача битилган асарлар бир ярим мингдан ортиқдир, уларнинг учдан иккиси шарқ тилларида, бир қисми гарб тилларида ёзилган. Бизнингча, бу асарларнинг бари бирор музейга ёки алоҳида Темур тадқиқотлари марказига тўпланиши, ўрганилиши, таржима қилиниши, фақат холис асарлар оммавий тарзда, нохолислари илмий ўрганилиш учун оз ададда босилиши керак.

Сиз ўқиб чиққан бу асар Темур мавзусида туркий тиллардан бири ҳисобланадиган усмонли турккасида 1910 йилда яратилган ва 1912 йилда Истанбулда босилган. Бизнингча, нафақат турк адабиётида, балки бутун туркий адабиётлар ичидаги Темур мавзусида битилган ушбу ilk туркий романда ёш Темурнинг эзгу шахсияти, инсонпарварлиги ва бағрикенглиги, ҳалққа доимо ён босгани ва хизмат қилгани учун ўзи ҳам давронининг энг суюкли саркардасига айлангани кўрсатиб берилган. Бутун умрида қиличига ўйиб ёзилган «куч адолатдадир» деган ҳикматга суюниб яшагани ва иш тутгани қизиқарли воқеалар, ишонарли деталлар воситасида устача тасвирланган. Бизнингча, Темурнинг ҳалқ меҳру ихлосини қозониши, давлат ташкил этиши, шахснинг манфаатидан ҳалқ ва давлат манфаатини ҳар қандай вазиятда устун кўйиши, ҳокимият ва оммани адолат билан бошқариши ёрқин

акс этган бу асарни ўқиб, ундан ибрат олинса, янада яхши бўлади. Зотан, ўқимоқдан мақсад уқмоқдир, ўрганилган нарсанни турмушда кўлламоқдир.

Шунга кўра, дейликки, Темурнинг ёки Темур мавзусидаги асарларнинг замонавийлиги нимада кўринади, дея сўрашса, шундай дердим: Темурнинг бизга замондошлиги шундаки, у сўзида ҳам, ишида ҳам фақат адолатга суюнган, халқка ва юртга хизмат қилган миллий қаҳрамондир; у ўз асида, бундан олти юз аввалги ота-боболаримиз муҳитида адолатли ва кучли бир салтанат қура олган жасур ва доно инсон; биз учун энг буюк, ибратли шахсият. Бу жиҳатлари билан Темур бугунги авлодга хизмат қилаётган әкан, биз ҳам унга лойик бўлишимиз, бунинг учун эса, унинг ҳаётидан ва фаолиятидан ибрат олиб, бугунги жамиятимизда у улуғлаган адолатни ўрнатиш ва мустаҳкамлаш учун барчамиз баравар интилишимиз, бу йўлда бир-биримизни кўллаб-кўлтиқлашимиз керак. Шу боис Темур мавзусидаги ҳар қандай илмий, тарихий, бадиий асар ўзбек ўқувчисига қанчалик тез етказилса, шунча яхшидир деб ўйлаймиз. Буюк миллий қаҳрамонимиз тўғрисидаги бу роман таржимасига ҳам ана шу мақсад, бир маънавий бурч туфайли кўл урдик.

Юқорида Темурнинг адолатни севгани ҳақида сўзладик. Эски тарихларда ёзилишича, Темур Жанубий Туркистон тупроқларида сафарда юрганида, қўшин бир вилоятда қўр тўкиб, тинланиб турганида, у одатдагидай бу масканнинг таниқли кишилари билан суҳбатлашади. Хоқончодирга муҳтарам ҳожиларни ҳам чақиртиради. Тўқсон марта ҳаж қилган бир нуронийга юзланиб, ораларингда энг кўп ҳаж қилган зот сиз экансиз, отахон. Мен ҳарбий сафарларда юриб, ҳаж қилолмадим. Менга бир ҳажингиз савобини бағишлишингизни сўрайман, бадалига салтанатимдаги сиз истаган қалъя ё шаҳарни берайин, дейди. Ёши юзга яқинлашиб қолган чол унга миннатдорлик билдириб, шундай дейди: хоқоним, сиз менга салтанатингизни бир соат адолат билан бошқарганингиз савобини бахш этинг, мен сизга бир эмас, жами тўқсон марта қилган ҳажимнинг савобини берайин. Темур бу сўзлардан кейин халқнинг донолигига, жўмардлигига яна бир қойил қолади; одамларга самимий ва тўғри муомала ва муносабатда бўлиш элни адолат билан бошқариш ҳикмат

эканлигига яна бир бор амин бўлади. Бу романда ҳам Темурнинг адолатпарвар шахс эканлигига алоҳида урғу берилган.

Темур мавзусидаги нодир қўллэзмалар, тарихий ва бадиий асарлар Туркия қутубхоналарида ҳам кўплаб топилади. Темур тириклигигида ёк у ҳақдаги тарихлар, афсоналар, латифалар шеърлару достонлар бу ўлкада ҳам кенг тарқалган эди. Шунингдек, жаҳон тилларида, хусусан, араб, форс, рус тилларида яратилган жуда кўп асарлар туркчага ҳам таржима қилинган ва бу иш давом этмоқда. Масалан, биргина Истанбулдаги Боязид номидаги давлат кутубхонасида Темур мавзусидаги ўттиздан ортиқ тарихий ва адабий асарлар сақланмокда.

Замондош турк олимлари ўз ўтмишдошларининг ишларини давом эттириб, Темур ҳақида янги-янги тадқиқотлар яратмоқдалар. Улардан бири, профессор Исмоил Аканинг «Буюк Темур давлати» асари 1996 йилда таржимамиизда «Чўлпон» нашриётида босилиб чиқди.

Темурнинг 600 йиллик юбилейи ўтказилган ана шу йилда тасодифан, Истанбулда яшаётган ватандошимиз Собир Сайхон Тошкентта меҳмон бўлиб келди ва менга Дундар Алпнинг усмонличада, хижрий 1328 йил битилган, 1330 йилда доруссаодат (Истанбул)даги «Хуррият» матбаасида босилган 256 бетли «Шарқнинг энг буюк ҳукмдори Темурланг» романини ҳадя этди. Мен у кишига муҳташам Темур музейи қурилганини ва асарни у ерга топширилса, яхши бўлишини айтдим. Хуллас, китобдан фотонусха олдиргач, асл нусхасини ўша пайтдаги музей раҳбарларидан муҳтарам олимимиз Нозим Ҳабибуллаевга учраб, ниятимизни англатдик ва асарни бердик.

Бу нодир китоб, албатта, таржима қилиниши керак эди. Собир акадан илтимос қилдим, у киши китобдан бир парча таржима қилиб бердилар. Романдан бир парчани нашрга тайёрлаб, кичик бир мақола ёзиб, «Соҳибқирон юлдузи» газетасининг бош муҳаррири, қадрдонимиз Жаббор Раззоққа топширдим. Асарнинг илк парчаси 1997 йил 19 август сонида босилиб чиқди... Ниҳоят, айрим режадаги ишларимдан қутулгач, асарни усмонличадан таржима қилишга киришдим. Романинг сўнг бобларини эса, Собир Сайхон таржимасига асосан нашрга тайёрладим. Шуни таъкидлашни истардимки бу романни Собир Сайхон томонидан Ўзбекистонга олиб

келиниши, биринчидан, Темур бобомизга хурмат ва ватанга муҳаббатнинг бир кўриниши бўлса, иккинчидан, агарда Собир ака шу нодир китобни бизга келтирмаса, бу таржи маҳам юзага чиқмасди, деб ўйлайман ва шунинг учун, азиз дўстим Собир Сайхонга бу ўринда миннатдорлик билдираман.

* * *

Туркияда Темур мавзусида ёзилган романлар кенг ўрганилган.

Интернет манбаларидан 2005 йилда Истанбулда вафотининг 600 йиллигига бағищланиб Амир Темур ва мероси мавзусида халқаро анжуман ўтказилганини ўқидим («Ölümünün 600. Yılında Emir Timur ve Mirası Uluslararası Sempozyumu») ва бу йиғинда қатнашган Темур Хўжаўғлига хат ёзиб, ўзининг ва Закий Таштаннинг маъruzalari нусхасини юборишини илтимос қилдим. Мұхтарам олимимиз ўша симпозиум маъруза матнлари босилган китобдаги икки манбани жўнатдилар, соғ бўлсинлар.

Темур Хўжаўғли Амир Темурга бағищланган халқаро илмий анжумандада «Emir Timur'un Değişen Portresi: Zeki Velidi Togan'dan Günümüze Modern Tarihçilerin Timur'u Farklı Yorumları (1912–2005)», яъни, «Закий Валидий Тўғондан бугунгача янги тарихчиларнинг асарларида Амир Темур қиёфасининг турлича акс эттирилиши (1912–2005)» деган маъruzasi билан қатнашган. Унда олим қарийб юз йил орасида Туркиядা, Оврупо, Америка, Японияда яратилган Темурга оид асарлардаги қарашлар ва фикрларни қиёслаб, ибратли хулосалар чиқаради.

Муаллифнинг ёзишича, тарихни яратган буюк давлат арбобларининг қиёфалари турли даврларда турлича чизилади ва ҳар хил баҳоланади; ҳукмрон сиёсий вазият таъсирида тарихчиларнинг фикрлари ва баҳолари бир-биридан кескин фарқ қилиши мумкин. XX асргача Темур асосан бир тарафлама баҳолангани ва қоралангани маълум. Закий Валидий 1912 йилда босилган «Турк ва татар тарихи» асарида Темурни ижобий баҳолайди. Ҳолбуки, 1924 – 1990 йиллар орасида советлар мамлакатида у «золим, феодал» дей қораланди; Туркияда фақат Отатурк даврида улуғланди, аммо кейин у

асосан манфий баҳоланди; Фарбий Оврупо, Америка, Япониядаги асарларда эса унинг сиймоси ижобий акс эттирилди. Темур Хўжанинг таъкидлашича, Темурнинг давлат сиёсати мавзусида китоб ёзган Маҳмуд асад Бўзкурт Отатуркнинг Темурни жуда яхши кўрганини айтаркан, бир воқеани баён қиласди. Отатурк Темур ва Боязид жангини аъёнларга харита воситасида ҳикоя этаркан, «Қаранг, Йилдирим Темурни шундай сиқувга олганки, ундан Темурдан бошқаси қутулиб чиқиб кетолмасди. Темур сиқувдан чиқа олди ва уни енгди... Мен Темур замонида туғилсайдим, унинг қилган ишларини қилолмасдим. Агарда Темур менинг замонимда туғилсайди, у мендан кўра кўпроқ ишларни бажааради», деган экан. Боязидни бир қаҳрамон, қўмондон сифатида улуғлаган Отатурк, уни Темур билан қиёсларкан, Темурнинг қаршисида Йилдирим бир боладир, деган. Шунингдек, Отатурк 1923 йил Бурсада ўқитувчилар билан учрашганида ҳам Темурни улуғлаб, оила ва ўқитувчи мавзусида сўзларкан, Темурнинг хотини унинг ҳаётида катта роль ўйнаганини, эри билан бирга отда юрганини, энг яқин маслаҳатчиси бўлгани ва жаҳонгирнинг ёнидаги уламолари каби фикри ва йўл-йўриги билан эрининг давлат қуриши ва юксалишига хизмат қилганини таъкидлаб, улардан ибрат олишга чақирган.

Муаллифнинг билдиришича, Отатурк «ёшларнинг тарбиясига катта таъсир кўрсатади, Темур ҳақида ёзинглар», дейди. Ўшандан кейин Рашод Акрамнинг «Темур ва ўғиллари» деган 64 бетлик, расмли китоби нашр этилади (1934). Ёзувчи буюк жаҳонгирнинг ҳаёти ва фаолиятининг ибратли жиҳатларини ёшларга уқтиаркан, «Темур буюк бир қўмондон, музaffer император бўлиши билан бирга, буюк бир адабиёт ҳомийси, бир Месен бўлган. (Месен – Рим императори Октавиан даврида шоирларга ҳомийлик қилган бадавлат шахс, меценат) Темурнинг турк ҳарб ва сиёсат тарихида накадар юксак мавқеи бор эса, турк фикр ва санъат оламида ҳам у қадар қийматли ўрни бордир» деб ёзган.

Отатуркдан кейинги даврдаги Курат, Ўзтуна каби машҳур тарихчилар Темурни бирёқлама, манфий йўналишда баҳолаганларини; кейинги даврларда эса, И smoил Ака, Гурсўй Сўлмас, Хайринса Алан каби тарихчиларнинг Темурни та-

рафсиз тадқиқ этгандарини, айниңса, унинг қурилишга, юрт ободлиги ва фаровонлигига берган эътиборини улуглаганини Темур Хўжа маърузасида далиллар билан ифодалаган.

Закий Таштаннинг «Турк адабиётида Темур мавзусидағи илк роман: Дундар Алп, «Шарқнинг энг буюк ҳукмдори Темурланг (1914)» дейилган маърузасида («Türk Edebiyatında Timur'u ele Alan İlk Roman: Dundar Alp, Sarkın En Büyük Hukumdarı Timurlenk (1914)» бу роман жуда чуқур таҳлил қилинган («Ölümünün 600. Yılında Emir Timur ve Mirası Uluslararası Sempozyumu» маърузалар матни китоби, 363–379-бетлар). Бу тадқиқотда муаллифнинг Темур шахсига юксак ҳурмат билан ёндошгани сезилиб туради. Бир изоҳида у Темурнинг бутун Осиёning ҳукмдорига айланганини, Усмонли салтанати худудларига ҳам кириб борганини, 1400 йилда Сивас, Арзинжон, Малатия каби муҳим шаҳарларни олганини, икки йилдан сўнгра Йилдирим Боязид уларни қайтариб олганини ва 1402 йилда Анқарада, Чубук жангига енгилганини таъкидлайди.

Закий Таштан Дундар Алпдан олдин ҳам Темур айрим романларда тилга олинганини айтади. Масалан, Номиқ Камол «Жазми» (1883) романида бу мавзуга қўл урган, у асар сўзбошисида Темурнинг фаолиятини юксак баҳолаб, унинг байроби дунёнинг улкан қисмida ҳилпираганини, тўрт юз миллион мусулмонга ҳукмронлик қилганини, фотиҳлик бобида Искандарни сояда қолдириб кетганини, шунингдек, Темур ва Йилдирим ўртасидаги уруш Усмонли салтанати тарихидағи энг катта мағлубият эканини айтган. З. Таштаннинг ёзишича, Темур тилга олинган яна бир роман Аҳмад Ҳилмийнинг «Етим Турғут» асаридир (1910). Унинг «Оталаримиз турклар» бобида муаллиф Темурнинг Хулаку ва Чингиз каби урушда кўп қон тўkkанини, аммо улардан фарқи, Темур жантсанъатини энг яхши билган буюк қўмондон эканини; шунингдек, Йилдиримнинг ҳаёти давомида ҳеч мағлуб бўлмаганини, фақат ўзи каби бир турк подшоҳи билан урушда бир бор енгилганини ифода этган.

Муаллифнинг таъкидлашича, асарда Темурнинг йигирма ёшидан кейинги, 1350–1391 йиллар орасидаги ҳаёти, тарихий ва сиёсий шахсияти, руҳий дунёси бадиий ифодасини топган. Воқеалар туркларнинг асл ватанида, икки дарё оралиги –

Мовароунахрда, Хурносонда, Самарқанд, Олмалиқ ва Туркестоннинг кенг саҳроларида бўлиб ўтади. Қисқаси, олим Темур бош ижобий қаҳрамон сифатида тасвиirlанган бу асарни жуда чуқур таҳлил қилган, унинг тадқиқоти тўла ўзбекчага ўғирилиб, ўқувчиларга етказилса, янада яхши бўлади деб ўйлаймиз.

* * *

Дундар Алпнинг романи турк романчилигига қандай ўрин тадқиқотчилиари асарларига мурожаат этамиз.

Турк адабиётидаги илк роман Шамсиддин Сомий (1850 – 1904)нинг «Таашшуқи Талъат ва Фитнат», яъни Талъатнинг Фитнатга ошиқлиги ҳақидаги асаридир (таълифи роман 1289 й., 1872 й. босилган дея таъкидланмоқда; 12 жилдлик «Büyük Türk Klasikleri», Ötüken – Söğüt нашриёти, İstanbul 1989 у. cilt 9, s. 111–112).

Ёш олимлардан Мұхаррам Даванч ва Эмраҳ Қайимқояннинг ёзишича, дунёда тарихий роман жанрига асос солган, 1814 йилда босилган илк роман муаллифи француз Валтер Скотт дир. Турк адабиётида эса, тарихий мавзуда ёзилган илк роман Аҳмад Мидхатнинг 1871 йилда чиққан «Йеничерилер» (янги-чериклар) романидир. У асарда Учинчи Салим даврида ўтказилган айрим янгиликлар ва у ислоҳотларга қарши чиққан янгиличерикларнинг саргузашти ишқий можаролар воситасида ҳикоя қилинган. Муаллифларнинг таъкидлашича, машрутият даврида яратилган романлар миллий тушунчани уйғотиш учун ёзилгани билан ажralиб туради. Улар, профессор Закий Таштан айтганидек, «Фазлий Нажибнинг «Даҳшатлар ичida»» (3-жилд, 1909–1910), Аҳмад Ҳилмийнинг «Ўксиз Турфут» (1910), Сулаймон Судийнинг «Қызыл кўшк» (1914), Дундар Алпнинг «Шарқнинг энг буюк ҳукмдори Темур» (1914), Васиф Қодирийнинг «Шимол шамоли» (1915), Аҳмад Ножийнинг «Қамар сulton» (1914) романлариидир. (Doç. Dr. Muhammet Davanç (Eskişehir Osmangazi Ün. Fen-Ed Fak.) ve Emrah Kayımkaya (öğretmen, MEB) «Ragip Şevki Yeşim in Hayatı, Edebi Şahsiyeti Ve Tarihi Romanları» мақоласи (Turkish Studiyes – International Periodial

For The Languages, Literature and History of Turkish or Turkic Volime 6/3 Summer 2011, p. 205 – 220 TURKEY).

Юқоридаги фикрларга кўра шуни айтиш мумкин: Дундар Алпнинг бу романни дунёдаги илк романдан юз йилча, турк адабиётидаги илк тарихий романдан қирқ йилча кейин, ўзбек адабиётидаги илк романдан эса ўн йилча олдин нашр этилган.

* * *

Демак, ўн тўққизинчи асрнинг иккинчи ярмида ёзилган турк тарихий романлари умуман миллий тушунчани уйғотишга йўналтирилган бўлса, 1910 йиллардаги тарихий романлар туркчиликояси асосида яратилган, улардаги бош мақсад Усмонли салтанатининг чўкиши, кетма-кет енгилишлар натижасида руҳсизланиб қолган миллатни жонлантиришга қаратилган. Бу романлар ичida Дундар Алпнинг «Шарқнинг энг буюк ҳукмдори Темур» романи ҳам алоҳида ўрин тутади.

Биз халқимизнинг мустамлакачилик зулмидан кутулганини ва миллий руҳни юксалтирадиган бундайин асарга жамиятимиизда катта эҳтиёж борлигини ҳисобга олган ҳолда бу романни таржима қилдик. Яна шу жиҳати ҳам мухимки, бу асар Темур ижобий қаҳрамон қилиб тасвирланган туркий тилдаги илк роман сифатида ҳам нодирдир. Шунинг учун уни биз ўзбекчага ўтиришдик.

Бу асарнинг ўзбекчага ўтиришимизга яна бир сабаб, Темур бу асарда шарқдаги кўплаб туркий халқларни бир салтанат, яъни ўша даврда дунёнинг энг буюк кучидан бирига айланган Темур империяси байроби остида тўплаб, тинчликда идора қилгани, бир-бирига душман майдо қавмларнинг доимий уруш-жанжалли ҳукмронлигига барҳам бериши билан бир қаторда, Чин деворидан Анқарагача бўлган ҳудудларда барқарорлик яратган жаҳоншумул давлат арбоби сифатида тасвирлангандир.

Бу романдан кейин ҳам турк адабиётида Темур мавзусида асарлар яратилган.

Турк олимларининг тадқиқотларида ёзилишича, Биринчи жаҳон уруши оқибатида Усмонли давлати йиқитилиб, Туркия республикаси қурилгандан сўнгра яратилган илк роман «Қизил туғ», жумхурият чоғида усмонлилар даврини акс эттирган роман эса Низомиддин Нозифнинг «Қора Довуд» (1928) асаридир. Хуллас, 1920–1990 йиллар орасида тарихий мавзуда Абдулла Зиё Кўзанўғлининг «Отли хон» (1920), «Қўлсиз қаҳрамон» (1930), Фазлий Нажибининг «Саройлардаги мажнунлар» (1928), Камолиддин Шукрийнинг «Венециялик қул» (1931), Тархан Танининг «Темурланг» (1935), Акрам Рашиднинг «Хайриддин Барбарус» (1937), Фаридиддин Фозил Тулбандчининг «Барбарус Хайриддин келяпти» (1949), Мурод Сартўглининг «Теодоранинг ўлими» (1950), Камол Тоҳирнинг «Асир шаҳар одамлари» (1956), Элхон Таруснинг «Хукукмат қўноғи» (1962), Тарик Буғранинг «Кичик оға» (1964), Роғиб Шавқий Яшимнинг «Ёш Усмон» (1964), Маҳмат Сайданинг «Нумруд Мустафо» (1970), Ёвуз Баҳодирўғлининг «Бухоро ўт ичида» (1974), Йилмаз Бўйуноғанинг «Малазиртнинг уч отлифи» (1985), Севинч Чўқимнинг «Август бошоғи» (1989) романлари яратилган (юқоридаги манба, 208-бет).

Биз, Тархан Танининг «Темурланг» романи билан таниш эмасмиз, шунинг учун бу асар ҳақида бир нарса дейолмаймиз.

Отатурк давридан кейин босилган Темур мавзусига оид китоблардан бири Қодирий Юрттатопиннинг «Йилдирим Боязид ва Темурланг» асаридир («Кун» нашриёти, Истанбул 1953). Китобга Мунир Хайрий Эгэйли сўзбоши ёзган, унда машҳур итальян рассоми Бонифацийнинг Йилдирим Боязид рангтасвири берилган. Тўпламда америкалик атоқли тарихчи Брестид (Bresttad)нинг Европанинг ўрта аср қолоқлигидан кутулиб, янги даврга қадам қўйиши туркларнинг Истанбулни фатҳ этиши билан боғлиқлиги ҳақидаги фоятда муҳим фикрлари бор. Яъни, америкалик олим шундай дейди: «Турклар бир шаҳарни, аввал унинг қаршиисига бир қалъа қуриб, обдан моддий ва маънавий таъсирлари остига олиб, ичкаридан

эса рухан таназзулга учратиб, сўнгра бир ҳужум билан забт этадирлар. Истанбул фатҳининг ана шундай илк тайёргарлигини Биринчи Боязид бажарган эди. Унинг сўнгги ҳужумга ўтишига Темур монелик қилганди. Иккинчи Маҳмат бобосининг ўша ишини охирига етказиб, Истанбулни эгаллади. Истанбул фатҳи, бир қалъанинг йиқилиши ё бой берилиши эмас, бир дунёқараашнинг, зеҳниятнинг йиқилишидир. Турк тўпларининг ўқлари, янги техника ва маданиятнинг ўрта аср қалъаси ва дунёқараши устидан ғалабасидир, унинг тору мор этилиши тимсолидир. Шунинг учун 1453 йилни тарих ўрта асрнинг тугаши ва янги замоннинг бошланиши деб қабул қилган. Шунга кўра, Маҳмат Фотиҳ янги бир маданиятнинг асосчисидир. Бу ютуқлар учун у ота-боболари ва улар яратган анъана олдида бурчлидир» (4-6.).

* * *

Дундар Алпнинг романи 1912 йилда босилганича XX асрда қайта нашр бўлмаган. Муаллифнинг таржимаи ҳолига оид бирор манба учратмадик, шу боис бу мавзуда ҳам бир не айтолмаймиз.

Роман 2005 йилда Истанбулда, «Evrece Publishing» нашриётида бугунги туркча ёзувда босилиб чиқди (Dündar ALP. Şarkın Büyük Hakanı Timurlenk. Evreca Publishing yay. İstanbul 2005). Китобда нашрга тайёрлаган шахснинг кимлиги айтилмаган. Муаллиф ҳақида ҳам ҳеч нарса ёзилмаган. Албатта, қарийб юз йилча аввал босилган ва унутилаёзган бир тарихий асарнинг ўқувчилар қўлига тегиши қувонарли ва хайрли ҳодисадир.

Таржима жараёнида бу нашр ҳам кўз ўнгимизда турди ва усмонлича матнга солиштириб ўқирканмиз, баъзи фикрлар пайдо бўлди. Роман – санъат асари, унда бир жумла тугул, бир сўз ўзгарса ҳам, унга путур етади. Бизнингча, эски адабиёт намуналари тадбил этилиб (яъни бирор сўз, ҳарф ўзгартирилмасдан) нашр қилингани маъқул; бугунги китобхонга тушунарсиз сўзларга асар ҳошиясида изоҳ берилиши кифоя. Афсуски, бу нашрда бошқача йўл тутилган, асарнинг тилини бугунги китобхонга мослаймиз деган ниятда эркин бир тарзда ёндошлиб, ҳатто романнинг номи ҳам қисқартириб

юборилган: «Şarkın Büyük Hakanı Timurlenk». Юқорида биз бадий асарда ҳар бир сўз алоҳида маънога ва қимматга эгалигини таъкидлагандик. Мана, роман матнидаги, «Шарқнинг энг буюк ҳукмдори Темурланг» деган сарлавҳадаги биргина «энг» сўзининг қисқартирилиши боис муаллифнинг Темурга муносабати пасайтириб, бузиб берилган. «Шарқнинг буюк хоқони» деган баҳо билан «Шарқнинг энг буюк ҳукмдори Темур» деган фикрнинг бир-биридан жуда катта фарки бор. Яъни, қадимги турклар империя қурганларида, беш ё ўнта давлатнинг бошида бир хон, барча хонлар бошида бир хоқон (қаған) ўтирган. Темур фақат туркий давлатларни бирлаштириб қолмай, форс, араб ва бир неча бошқа диндаги бошқа миллатларнинг давлатларини ҳам забт этган, уларни бошқарган бир ҳукмдор эди. Шуну кўзда тутиб, биз таржимада муаллифнинг сарлавҳасини ўзгартирмадик. Хуллас, бир сўзни ўзгартириш қанчалар асарга зарар берганини шу бир мисолда ҳар ҳолда ойдинлашди.

Нашрда айрим атамалар ва исмларнинг янгилик ўқилгани ва хато ёзилгани ҳам кўзга ташланади. Масалан, барлос атамасини йерлас (Yerlas s.12), Абу Тарагай (أبو طارق أغوي) (تغلق تیمور) (13 б.) Tap Afa (Tar Ağa, s.12) сulton Туғлуқ Темур (Tağlaq Timur s.66), Шер Баҳром (شیر بهرام) (161 б.) Шимшир Баҳром (imşir Behram s.113), Жужи суоласи (چوچی) (232 б.) Жевжи (Cevci, s.163) дея; ёки усмонлича матнадаги қайинбиродари (فتن براوری) (141 б.) Kayınpederi (s. 99), яъни қайниси сўзи қайнотаси дея бузиб берилган.

Роман муаллифи эски туркларда қўшинга оид сўзларни ҳам унумли ишлата билган. Масалан, Темур қилган хизмати учун мингбоши унвонига эришади, усмонлича матнадаги «Арслон Темур, сени мингбоши қилдим!» (45 б) дейилган хитоб янги нашрда «Seni Meniğbaşı yaptım!» (s.34) яъни, «Сени Маниғбоши қилдим» дея маъносиз тарзда ифодаланган. Араб ҳарфлари мингбоши шаклида ёзилгани балки ноширларни адаштиргандир.

Усмонлича матнадаги «Bir Mahkümiet-i Müdhişe» (35) сарлавҳаси «Müthiş Bir Mahkümiet» (s. 27) дея ўзгартиргани ҳолда, муаллиф тили тарихийликка терс ўлароқ «вали-нематлари» ибораси «liderleri лидерлари», «интиқом рухи»

эса «intikam psikolojisi интикам психолўжиси» дәя бузиб берилган.

Усмонлича матнда ҳам, Туркистон ўлкаси мұхитига номуносиб сўзлар қўлланилган ўринлар бор. Масалан, Султон Туғлуқ Темур қўмандон Т. Баҳодирга «ўн минг лира эҳсон берилсин» дейди (112 б., янги нашрда тузатилиб, ўн минг олтин, дейилган (79 б.), бу янги нашрнинг тайёрлаганларнинг ютуғидир, албатта. Чунки лира Туркия мұхитига оид пул бирлиги, Туркистон тарихига боғлиқ асарда олтин ё акча дейилиши мувофиқдир.

Табдил ёки ноширга оид нуқсонлардан ташқари, асарда айнан муаллифга тегишли баъзи камчиликлар ҳам сезилади. Булар асосан тарихий мұхиттага мос бўлмаган сўз ва атамалардир. Масалан, муаллиф режа, лойиха маъносидаги «проже» (усм. 87 б., янги нашрда 63 б.), рицар англамидаги шўвалие (усм. 229 б., 158) сўзларини қўллайди. Аммо булар жузъий нуқсонлар бўлиб, асарнинг умумий ютугини пасайтирумайди деб ўйлаймиз.

Тағин шуни ҳам айтиш керакки, муаллиф матнидаги эски усуулга хос узун, мураккаб жумлалар кескин қисқартирилиб, асарга жуда қаттиқ зарба берилган. Масалан, Темур ва Тоштуғойнинг тўй кечасидаги тўй тасвири табиат гўзаллигига мутаносиб, эски давр руҳига мос тасвирларда берилган. Аммо янги нашрда у қисқартириб юборилган. Қисқа шакли шу: «Timur çok sevdiği Olcay Türkkan'a kavuştuğu bu geçede insanların sevinçlerine karşılık sabahlara kadar uyumadı. Türkkan'in güzelliğine dair söylediği hikayeler yetersiz kalıyordu» (s. 40). Бу парча усмонлича матнда қуйидагича берилган: «... Temur sevdiği Olcay Türkkan'eye kavuşduğu bu geçede haricin suru sururine mukabil sabahlara kadar uyumadı... Mülkin sevdığının hak-i payi hüsnüna sarpdigi pürnür naşideleri bir demet halinde geçen saatlarının her anına hadiya ediyor ve yine medh-u tevsifinde pek aciz kaldığı Olcay Türkkanının şasaa-i mahasnini saymağa başlayarak diger bir demet hazırlamağa hasrı nefş ediyordu» (усмонличаси, 54 б.). Ўзбекчаси: «Темур севгилиси Тоштуғой Турканга қовуштан бу кечада, тўйнинг суруру завқидан таъсирланибми, тонггача ухлай олмади. У хаёлан бор-йўғини севгили ёрига бахш айлар, унинг гўзаллиги берган бу пурнур, нашидали соатларнинг ҳар бир онига ўз ҳаётини ҳадя этар ва

яна мадху тавсифида жудаям ожиз қолгани Үлжой Туркан гүзәллиги күкига термула-термула унинг порлоқ юлдузларини санамоққа бошлар ва улардан ўйларида бир гулдаста ясар эди...»

Янги нашрдаги бундай қисқартиришлар оқибатида маъно бузилган ўринлар ҳам учрайди. Масалан, «Ertesi gün orada Sultan Taqlak Timuru aramaya başladı...» (98 б.), яъни, «Эртаси кун у ерда султон Тағлақ Темурни қидирмоққа бошлади...» жумласи усмонлича матнда бошқача. Яъни «Эртаси кун у ердаги султон Туғлуқ тарафдорлари билан биргаликда Темурни қидирмоққа бошлади» («Ertesi kün orada şah Tuğluk tarafından olanlarla tawhid-i masayı edarak Timuru aramaya başladı...» 141 б.). Демак, бой Самарқандга келиб, шаҳарда султон Туғлуқ тарафдорларини топади ва улар билан бирга Темурни қидиради; афсуски, янги нашрда матн бузилган ва натижада, бой амир Темурни эмас, султон Туғлуқ Темурни қидираётган бўлиб қолган.

Ёки Темур Ҳиндистонга юборган изқувар Тоштуғайнинг унга юборилган махфий мактубида бундан кейин ўзининг исмини Кундуз деб ёзажагини билдирган жумла ҳам тушиб қолган, хат охирига қўйилган Тош тугой Кундуз имзоси тушиб қолгани учун унинг хатлиги ҳам билинмайди (درکی مکتوبده طاشن طغای اسمی کوندوز تفصیلات ویریشم. صُنْ مطْحَى كوندوز) ва бу романнинг яхши тушунилишига халақит қиласи (232 ва 156-бетлар).

Бу каби жузъий нуқсонлар, албатта, 2005 йилдаги нашрнинг қыммати ва аҳамиятини озайтирмайди, чунки у қарийб юз йилдан кейин Дундар Алпнинг Темур ҳақидаги бу муҳташам романи билан яна бир бор турк ўқувчисини таништирди, биз буни самимий қутлаймиз.

Романнинг янги нашри борасида атайн узунроқ фикр юритганимизнинг сабаби бор. Яъни, агарда асар усмонличадан эмас, мана шу янги нашрдан бошқа тилларга ўгирилса, бу ва бу каби хатолар ўша таржималарга ўтиши табиийдир. Бундан шу хulosса чиқмокда: асар 2005 йилдаги нашрдан эмас, имкони борича аслидан, 1912 йилда босилган матндан бошқа тилга ўгирилиши фойдалидир деб ўйлаймиз.

* * *

Биз таржимани нашрга тайёрлашда баъзи ўзгариришлар қилдик, буни айтиб ўтиш жоиз. Маълумки, XX асртагача Темур ҳақида ёзилган деярли барча китобларда уни Темурланг деб аташган; бу романни аср бошида Туркияда битган муаллиф ҳам Темурланг деб ёзган. Биз таржимада Темур деб олдик; романнинг илк боби сарлавҳасиз бошланган, асар давомидаги бобларнинг сарлавҳаси борлигини кўзда тутиб, мазмундан келиб чиқиб, унга «Номаълум отлиқ» дея сарлавҳа қўйдик.

Муаллиф роман сўзбошисида «Кейинги даврларда дунёда шаклланаётган миллий ҳокимиятни ўз даврида у кашф этган; тузуклари, сиёсий тутумлари билан улусига қонун ҳукмронлигини кўрсатмоқча интилган, фақат бунга эришолмаган. Темур даҳосининг ёдгори бўлмиш қурултой (мажлиси маъбусон – депутатлар кенгashi) унинг қийматини, буюклигини кўрсатувчи бир тарихий ҳақиқатдир. Темурнинг кимлигини англамак учун биргина ўша шоҳ асарни – қурултойни билмак ҳам етарлидир» дейди. Дунёда энг илғор давлат ва конституцияни Францияда яратилган деган фикр қабул қилинган. Демократиянинг энг муҳим асосларидан бири ҳалқ ва унинг вакиллари билан кенгашиб иш қилишдир. Муаллиф Темурнинг буюк ишларидан бири, ўша XIV–XV асрларда давлат юритиш тузугини яратганини ва салтанатни қурултой-парламент во-ситасида бошқарганини таъкидламоқда. Демак, депутатлар иш юритадиган парламент Темур давлатида бўлгани фактини алоҳида ургулаш билан муаллиф биз адолатни гарбдан ўрганаётганимиз йўқ, буни беш юз йил олдин Темур амалда қўллаб кўрсатиб қўйибди, деган фикрни илгари сураётгани, бунга терс қараш пуч бир сафсата экани буғунги ўқувчига-да аён. Шундан келиб чиқиб, Темур ҳақида бу роман ўзига хос бадиий қимматга эга бўлиши билан бирга, буғунги мустақил Ўзбекистон учун муҳим сиёсий аҳамиятга моликлигини ҳам таъкидлаш лозим. Темур дунёning катта бир қисмини ана шу қурултойга суюниб бошқарганида, бошқарувни адолат асосида юритганини, у замонларда ҳали Оврупода шаҳар давлатлар ҳукм сургани, Америкада ҳам ҳали замонавий давлатлар қурилмаганини ҳисобга олганда, бу тарихий ҳодисанинг ижтимоий аҳамияти янада аён бўлади деб ўйлаймиз.

Тоҳир ҚАҲҲОР

МУНДАРИЖА

Тоҳир Қаҳҳор таржимаси:

<i>Мұхтарам түркликка (Сүзбоши) Дундар Алп</i>	3
I. Номаълум отлик	8
II. Тутқунлик	13
III. Даҳшатли ҳукм	23
IV. Қалья ичидан забт этилади	28
V. Кундузи уруш, кечаси түй	35
VI. Машъум кеча	39
VII. Мудхиш интиқом	42
VIII. Қотилларга нима бўлди	45
IX. Фалокат	53
X. Мактубнинг сири	56
XI. Султон Туғлуқнинг буйруғи	64
XII. Такал Баҳодирнинг қўшини	69
XIII. Ўлим ҳукмидан сўнг	74
XIV. Ўзингдан бало чиқса	89
XV. Темурнинг қайноғаси Ҳусайн душманлар орасида	94
XVI. Фалаба нишони	97
XVII. Мовароуннаҳр ҳукмдорлиги ва Темурнинг тахтига чиқиши	103
XVIII. Тикбошли жаҳонгир насли	109
XIX. Қоплон ҳузурида	115
XX. Темурнинг Мўскўва юриши	118
XXI. Интиқом	120
XXII. Қипчоқ сафарининг сўнги	134

Собир Сайхон таржимаси:

XXIII. Эронлик темирчининг фитнаси ва Темур кўшинининг мағлубияти	136
XXIV. Қотиллар ер остида	142
XXV. Эрон музafferияти ва қасос	146
XXVI. Хизир ўлдирган қоровул	151
XXVII. Турк аскари	155
XXVIII. Дехли сultonига қарши уруш эълони	158
XXIX. Бу ким эди?	160
XXX. Малъунлар қилмиши	162
XXXI. Хотима	165
Темур ҳакидаги илк туркча роман. (<i>Сўнгсўз</i>) <i>Toχur Қаҳҳор</i> ...	166

Адабий-бадий нашр

Дүндар АЛП

**Шарқнинг энг буюк
хукмдори ТЕМУР**

Роман

Муқовада *Алишер АЛИҚУЛОВ*
суратларидан фойдаланилди

Усмонли туркчадан Тоҳир Қаҳҳор ва
Собир Сайхон таржимаси

Муҳаррир *И. Аҳмедов*
Рассом-дизайнер *Д. Мулла-Ахунов*
Техник муҳаррир *Б. Каримов*
Кичик муҳаррир *Г. Ерапиева*
Мусаҳҳих *Ш. Шоабдураҳимова*
Компьютерда тайёрловчилаар: *Л. Абкеримова,*
Г. Кулназарова

Нашриёт лицензияси А1 № 158, 14.08.2009.

Босишига 2018 йил 10 сентябрда рухсат ўтилди. Офсет когози.
Бичими $84 \times 108^1/_{32}$. «Times» гарнитурасида оффсет усулида босилди.
Шартли босма табоги 9,66. Нашр табоги 9,98.
Адади 5000 нусха. Буюргма № 17-519.

Ўзбекистон Матбуот ва ахборот агентлигининг «O'zbekiston»
нашриёт-матбаа ижодий уйи. 100011, Тошкент, Навоий кўчаси, 30.

e-mail: uzbekistan@iptd-uzbekistan.uz
www.iptd-uzbekistan.uz

Алп, Дундар.

A 54 Шарқнинг энг буюк ҳукмдори Темур [Матн]:
/Д.Алп. –Тошкент: «O'zbekiston» НМИУ, 2018. –1846.

ISBN 978-9943-25-427-5

уўқ 821.512.161.-31

КБК 84(5Турк)



«O'ZBEKISTON»

ISBN 978-9943-25-427-5

9 789943 254275